

Mateo Jesúsnoa Yoikĩ Keneni

*Jesucristo ãfe xinifãfe anefo
(Lc. 3.23-38)*

¹ Ë mato yoinõ a taeyoi ipaonifo Jesucristo ãfe xinifo. Jesucristo ãfe xini David. Nã David ãfe xini Abraham. Nãfo Jesucristo ãfe xinifo taeyoi iyopaonifo.

² Nã Abraham ãfe fake Isaaca ini. Isaaca ãfe fake Jacobo ini. Jacobo fake Judá ini. Æfe extofori ini.

³ Judapa fake Fares fe Zara ini. Æto afa Tamar ini. Fares ãfe fake Esrom ini. Esrom ãfe fake Aram ini.

⁴ Aram ãfe fake Aminadab ini. Aminadab ãfe fake Naasón ini. Naasón ãfe fake Salmón ini.

⁵ Salmón fake Booz ini. Booz ãfe afa Rahab ini. Booz ãfe fake Obed ini. Obed ãfe afa Rut ini. Obed ãfe fake Isaí ini.

⁶ Isaí ãfe fake xanĩfo David ini. Xanĩfo David ãfe fake Salomón ini. Salomón ãfe ãfa fene fetsaya iyopaoni, Urías.

⁷ Salomón ãfe fake Roboam ini. Roboam ãfe fake Abías ini. Abías ãfe fake Asa ini.

⁸ Asa ãfe fake Josafat ini. Josafat ãfe fake Joram ini. Joram ãfe fake Ozías ini.

⁹ Ozías ãfe fake Jotam ini. Jotam ãfe fake Acaz ini. Acaz ãfe fake Ezequías ini.

¹⁰ Ezequías ãfe fake Manasés ini. Manasés ãfe fake Amón ini. Amón ãfe fake Josías ini.

¹¹ Josías ãfe fake Jeconías ini; ãfe extofori ini. Mã Jeconías rama xanĩfo ikaino, Babilonia anoxõ xanĩfãfe ãfe sorarofõ nĩchini israelifo ato ifitanõfo

anã ato yonomaxikakĩ. Mã sorarofãfe ato ifitanai-fono israelifo Babilonia ano fonifo. Jeconíasri iy-onifo. Jeconías ãfe extofori kainifo.

¹² Nãskata Babilonia anoax fake fetsafori kainifo. Jeconías ãfe fake Salatiel ini. Salatiel ãfe fake Zorobabel ini.

¹³ Zorobabel ãfe fake Abiud ini. Abiud ãfe fake Eliaquim ini. Eliaquim ãfe fake Azor ini.

¹⁴ Azor ãfe fake Sadoc ini. Sadoc ãfe fake Aquim ini. Aquim ãfe fake Eliud ini.

¹⁵ Eliud ãfe fake Eleazar ini. Eleazar ãfe fake Matán ini. Matán ãfe fake Jacobo ini.

¹⁶ Jacobo ãfe fake José ini. Nã José ãfe ãfi ini, María. Nã María fake ini, Jesús. Jesús ãfe ane fetsa Cristo ini.

¹⁷ Abraham ãfe fenafo ichapa ini, nã David kainitiã catorce inifo Abraham ãfe fenafo. Askatari nã David ãfe fenafo ichapa ini. Nãskano David ãfe kaifo yora fetsafãfe Babilonia ano ato iyonifo ato yonomaxikakĩ. Babilonia ano ikanax David ãfe fenafo catorce inifo. Askatari David ãfe fenafo Babilonia anoax anã fenifo ãto mai ano. Mã fenixakakĩ David ãfe fena fetsafori kainifo catorce inifo. Askatari Cristo kaini.

María Jesucristo kãini

(Lc. 2.1-7)

¹⁸ Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani.

¹⁹ José Nios Ifofasharakõiax sharakõi ini. Nãskaxõ José María yõapainima yorafãfe ferotaifi. Fomãxopaoni. Nãskaxõ tosa yoixoma José María enepaini.

²⁰ Nāskano José āfe namapa òini Niospa āfe ājirinĩ yoiaito. Yoikĩ iskafani: “José, rateyamafe María fe fianāxiki. Na fake nanea Niospa Yōshi Sharaōxō akaki.

²¹ María fake feronāfake fii kiki. Mĩ anekĩ Jesús faxikai. Nāato ato ifipakenakaki. Nāskaxō afe yorafo āto chaka soaxoxii kiki ato nimapakexakĩ,” ixō ājirinĩ José yoini.

²²⁻²³ Chanĩmakōi nāskakōi nā Nios yoimisto yoini keskarakōi. Iskafakĩ kirika keneyoni Niospa shināmanaino:

Kēro xotofake feronāfake fe imisma fake onixii. Fake feronāfake fixō anekĩ Emanuel faxii,

ixō yoini. (Akka nōko mekapa Emanuel fakĩ, “Nios nofe ika,” ixō nō yoimis.)

²⁴ Mā ājirinĩ yoiano José moinākafani. Nā ājirinĩ yoia keskafakĩ, José María fini. Mā fixō āfe pexe ano iyon.

²⁵ Mā afe fīanāx afe chotanānima āfe fake kāiyonō. Mā fake kāiano anekĩ Jesús fani.

2

Feronāfakefo fishi tāpikōimisfo a xini oaikirinoax mai fetsa anoax Jesús ōipai fenifo

¹ Herodes xanīfo ikano Jesús kāini Belén pexe rasi anoax, Judea mai anoax. Nāskano a xini oaikirinoax mai fetsa anoax feronāfakefo fishi tāpikōimisfo fenifo Jerusalén ano.

² Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaito. Nāskakē nō oa Jerusalén ano xanīfo ōiyoi. Nō akiki

inimai nō oa, ‘Mī nōko xanīfokōi,’ ixō yoipaikī,” fanifo.

³ Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo.

⁴⁻⁵ Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Fanīax Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

⁶ Belén, Judá mai anoax pishtakōi. Akka pexe rasi fetsafo efapakōifo. Askafīax Belén shara-finakōia ixii māmāi israelifo āto xanīfo finakōia kāixiaino Belén anoax. Nāskakē āfe inakōifo israelifo āto xanīfokōi ixii, ixō kirikaki keneni Niospa meka yoimisto Niospa shināmanaino,” fanifo.

⁷ Nāskakē Herodes a fishi tāpimisfo ato yōkani onexō tsōa nikayamanō: “¿Afetīa fishi mā ōitamē?” ato fani.

⁸ Nāskaxō ato nīchini Belén ano. Herodes tāpipaikī, “Belén ano fotakāfe a fake tāpīxikakī. Mā fichixō ea yoifexikakī ēri akiki inimaikanō,” ato fani āa ato pārakī.

⁹ Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano.

¹⁰ Nā fishi anā ōikanax inimakōinifo.

¹¹ Nāskakanax pexe mēra ikifaikaxō fake yome fichinifo afa María yafi. Mā fichikaxō ratokonō mai chachipakefofānifo, a fakeki inimakakī. Nāskakaxō

āto kafo fēpekaxō afama mīshti sharakōifo Jesús inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo.

¹² Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

María feta José Jesús ichokinifo Egipto mai ari

¹³ Askata a fishi tāpimisfo mā foaifono, José namakē, Niospa āfe ājirinī yoini: “Moinākafafe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiaino mā anā onō. Herodes na fake yome fenai kiki retepaikī,” Niospa ājirinī José fani namakē.

¹⁴ Nāskata moinākafata, nā fakishi fonifo María fe José āto fake Jesús iyoi fokani Egipto ano.

¹⁵ Egipto ano José fe María ipaonifo mā Herodes naano fexixakakī. Nāskakē Egipto ano iyopaonifo. Niospa meka yoimisto nānorikōi kirika keneyoni Niospa shināmanaino iskafakī: “Ēfe fake ē kena Egipto anoa,” ixō Niospa meka yoimisto kirika kenenī.

Fakefo retenōfo Herodes ato manamani

¹⁶ Fishi tāpimisfo Herodes fomākani. Fai fētsa foafono nikai, Herodes ōitifishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afetīama nō nā fishi ōikī taefati, mā xini rafe aka,” fanifo. Nāskakē Herodes sorarofa ato manamani fake feronāfake xini rafe akafo, yome mīshtifoya ato retenōfo, Belén anoafu retekāta, a Belén pasotai ikafori ato retenōfo.

17-18 Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

19 Mā Herodes naano Niospa ājirinī afianā José yoini namakē iskafakī:

20 “Moinākafafe. Mī āfi feta mī fake iyotaxiki Israel mai ano. A fake yomefo retepaimisfo mā naafoki,” fani.

21 Nāskafaino moinākafani José. Āfe āfiri mōini āfe fake yafi. Nāskakanax Israel ano anā fonifo.

22 Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesús iyokani.

23 Nāskax nokonifo Nazarete pexe rasi ano. Nāno inifo. Nānori taeyoikōi Niospa meka yoimisfāfe yoyonifo, “Cristo Nazarete ano imis,” fakakī, a inōpokoai yoikakī. Nāskakōini.

3

*Juan Maotista tsōa istomaxō ato yoini
(Mr. 1.1-8; Lc. 3.1-9, 15-17; Jn. 1.19-28)*

1 Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni.

2 Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

3 Isaías kirika kenekī yoiyoni a inōpokoai yoikī Niospa shināmanaino. Iskafakī yoini:

Tsōa istoma anoxō yorafo yoixii akiki feaifono. Iskafaki ato yoixii: “Mā nōko Ifo oi kiki.

Nāskakē itipinīsharakāfe. Āfe fai sharafaxokāfe.

Māto chaka xatekāfe,” ixō ato yoiaito nikaxikani, ixō Isaías kirika keneyoni Juanoa yoikī.

4 Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni.

5 Nāskano Jerusalén anoafu yafi Judea anoafu fenifo Juan nikai fekani. A faka Jordán chaima ikafori fenifo.

6 Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

7 Nāskaifono fariseofo xanīfo metsamafo feaifono, saduceofo xanīfo metsamafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afesikai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, mā kai afaa tāpīama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato

maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafiāx ixō mato pārano mā chiifā mēra katiro fetsa afaa tāpiamoto mato pārano. Askara Niospa mato ifitiroma mākairoko shināito, ēroko mato maotisafaano.

⁸ Māto chaka xatekāfe, Nios shinākāfe. Mā Nios shināito ē mato maotisafapakai.

⁹ Ē mato anā yoinō nikakapo. Mā shinātiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōikī Nios shinākanax. Akka mākai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafai.

¹⁰ Akka fana fimiyamaito ifāfe reratiro. Āfe tapori tsekaxō koofatiro anā niyamanō. Nāskarifikī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito.

¹¹ Nāskakē ē mato maotisafai māto chaka mā xatepaiyaito Nios Ifofapaikī. Akka nā ea keskarama mā chaima oi kiki, nā sharafinakōia. Aato afama mīshti fatiro, ē atiroma keskara. Akka ē afaama. Mā Nios chanīmara faino aato āfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii.

¹² Akka yōra āfe tarepa aros fanaxō mā pachi-

ano topitiro. Nāskaxō katotiro a sharafo fixō a chakafo potaxō koofatiro. Nāskarifikā a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii afe isharapakexanōfo. Akka nā nikakaspamisfo chiifā mēra ato potano anoax omiskōipakenakafo. Chiifā mēranoax omiskōi xate-nakafoma,” ixō Juan ato yoini.

*Juan Jesús maotisafani faka Jordán anoxō
(Mr. 1.9-11; Lc. 3.21-22)*

¹³ Askata Galilea anoax Jesús kani faka Jordán ari Juan maotisafanō.

¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mīa maotisafatiro,” fani.

Jesús askafaino, Juan Jesús maotisafani.

¹⁶ Nāskata Jesús faka mēranoax fininākfānaino nai fepekemetani. Ariax Niospa Yōshi Shara akiki fotonī, oa rifi keskara Jesús ōiaino.

¹⁷ Askaino nai mēraxō Āpa yoiaito nikani iskafaito: “Mī ēfe Fakekōi ē mia noikōi. Ē mikiki inimasharakōi,” ikaito nikanifo.

4

*Satanás chakata Jesús afara chakafamapaini
(Mr. 1.12-13; Lc. 4.1-13)*

¹ Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

² Mā cuarenta nia oxax Jesús fonãikõini afaa pishta piyamax.

³ Nãno Satanás akiki nokoni. Mā akiki nokoxõ ifofamapaini. Askatari chakafamapaini. Iskafakī yoini: “Mī Niospa Fakemākī na tokirifo pãa fapo,” fani.

⁴ Askafaito Jesús kemani: “Maa, na mī ea yoiai keskara ē akima. A nō piati fisti nō shināima ni-paikī. Akka Epa Niospa āfe meka fisti shara nō shinātiro. Nāskara Niospa meka yoimisto keneni,” Jesús fani.

⁵ Jesús askafaino Satanás iyoni Jerusalén ano a Nios kīfiti pexefā māmākīa.

⁶ Nānoxõ yoini iskafakī: “Mī Niospa Fakekõiaxroko mī niriāx ichopakekafanikai. Mī ichopakekafanax mī afeskaimakai. Nā Niospa meka kirikaki keneaki isakai: ‘Niospa āfe ājirifo yoixii mia kexenõfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenõma,’ kirika kenea iskaki,” Satanás Jesús fani.

⁷ Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxõ nō yoitiro: “Ē afara afeskarafaito, ea Niospa kexei,” ixõ nō shinātiro. Akka, “Niospa ea amapaiyai keskara nā fisti ē atiroki Niospa ea kexenõ,” ixõ shinākāfe,’ ikaki na kirika keneano,” Jesús fani.

⁸ Askata Satanás Jesús iyoni mächifā mñññ. Arixõ õimani nā maifo tii sharafinakõia.

⁹ “Õipo. Mī ea ratokonõ mai chachixõ, ‘Mī ēfe ifoki,’ mī ea faito na maitio keyokõi ē mia inātiro mī āfe ifo inõ,” fani.

¹⁰ Askafaito Jesús kemani: “Satanás. Emakinoax katāfe. Ē mia ifofaimakai. Na kirika kenea ano Niospa meka yoimisto iskafani: ‘Nā nōko Ifo Nios fisti nō ratokonō mai chachixō nō yoitirokī, nā fistimāi nōko Ifokē,’” fani.

¹¹ Askafaino Satanás Jesús makinoax kaino Niospa āfe ājirifo akiki fotonifo pimaxikakī.

Galilea anoxō Jesús ato yoikī taefani

(Mr. 1.14-15; Lc. 4.14-15)

¹² Akka mā Juan sorarofāfe karaxa mēra iki-mana nikata Jesús Galilea mai ano anā oni.

¹³ Nazarete anoax Capernaúm ano nokoni ano ixiki. Nā Galilea ĩa kesemē Capernaúm ini. Nānori yora fetsafori osia ini. Zabulonōfo fe Neftalifo ano ikafo ini.

¹⁴⁻¹⁶ Isaías kirika kenekī yoini keskakōi Jesús nāno ipaoni. Isaías kirika kenekī iskafani:

Zabulonōfo fe Neftalifo āto mai ano ikafo ĩa Galilea ano. Faka Jordán okiri chai poketa nāno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxō, oa koshi penai keskara ōixikani. Fakish mēra ipafikeranaxakakī atoki penarisatani,

ixō Isaías a inōpokoai yoikī Jesúsnoa keneni. Nāskarifiāi omiskōipakenakafo mēra ikeranafo. Askafikeranafono atoki Jesús nokoaitia nā Ifofaafō tii ato nimapakenaka.

¹⁷ Anoxō Jesús ato yoikī taefakī iskafani: “Mā chaima nōko Ifo Nios xanīfo finakōia oi kiki. Nāskakē shināmitsayanā mātō chaka xatekāfe. Afaa chakafatamaroko Niospa meka nikakōikāfe,” ixō Jesús ato yoini.

Jesús cuatro feronãfake kenani tarafanãfãñe foe fimisfono ãfe inakõi inõfo

(Mr. 1.16-20; Lc. 5.1-11)

¹⁸ Ato yoita Jesús Galilea ãa kesemẽ kani. Kakĩ fichini Simón yafi onefetsa Andrés. Simón ãfe ane fetsa Pedro ipaoni. Nã rafeta tarafanãfãñe fimisfo inifo, ãto tarafanãfã faka naki poteaifãfe.

¹⁹ “Efe fokãfe. Mãfi tarafanãfãñe fimiskĩ. Mã foe ichapa rasi tarafanãfãñe fiaĩ keskari fakĩ iskaratĩari mã ekeki yora ichapa efexii ãe ãto Ifo inõ,” ixõ Jesús ato yoini.

²⁰ Ato askafaino tarafanãfã fafaikani afe fonifo.

²¹ Askata ori chaimashta kaxõ Zebedeo fake raferi fichini, Santiago yafi Juan. Nã rafeta ãto apa feta kanõa nakixõ tarafanãfã itipinĩ fanifo, kishifakãkĩ. Nã raferi, “Efe fokãfe,” Jesús ato fani.

²² Ato askafaino ãto apa kanõa ano nĩchifainifo Jesús fe fokakĩ.

Jesús yora ichapafõ tãpimani

(Lc. 6.17-19)

²³ Mã askafaxõ afe foafono nã Galilea anoafõ kafãsakĩ Niospa meka ato yoini. Judeofãfe ichanãti pexe mẽraxõ Jesús ato Niospa meka shara yoisharakĩ iskafani: “Itipinĩsharakãfe. Nios nonoax mãto xanĩfo ipai kikĩ,” ixõ ato yoifofãsafani. Askatari a isinĩ ikaifo fetsa fetsatapafõ ato sharafãpani.

²⁴ Askafaano nikakaxõ Siria mai anoafõ isinĩ ikaifo akiki efenifo ato sharafapanõ. Isinĩ ikaifo fetsa fetsatapafõ akiki efenifo. A yõshi chaka ãto mẽra naneaforti ato sharafani. A nĩsoaforti efeta, a finimismaforti efeta, a chatofori efenifo. Ato keyokõi sharafapani.

25 Askafaito yorafã rasichi chĩfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekãta Jesús chĩfafainifo.

5

Machi mǎnǎnǎxõ Jesús ato yoini (Lc. 6.20-23)

1-2 Yorafã rasi akiki feaifono õi Jesús ato paxafãini kaax, machi pochinĩ tsaoni. Tsaano ãfe meka tãpipaimisfo akiki fenifo. ãfe meka nikai fekani. Akiki feafono ato yoikĩ iskafani:

3 “Fẽtsa ãto shinã mēraxõ shinãkĩ iskafax: ‘Ëakai ã ishara tiroma. Ë Nios yopakõ,’ ikaito Niospa inimamaxii mǎmǎi Nios Ifo sharafaino ãfe fakekõ inõ.

4 “Fetsa shinãmitsakõifiaino chipo Niospa noikĩ inimamaxii.

5 “Fetsa kakapaimisma imisno Niospa inimamasharaxii. ‘Keyokõ maitio atonã ixii,’ ixõ Niospa yoiyoni keskara atonãri ixii.

6 “Fẽtsa Niospa meka noikõikĩ Niospa ato imapaiyai keskara shara ipaikõikani, nã keskarafo Niospa ato inimamaxii.

7 “Fẽtsa fetsafori noikĩ ato sharafaito Niospa tãpia. Nãskakẽ ari Niospa noikĩ axosharapakenaka inimamakĩ.

8 “Fẽtsa Nios shinãsharakĩ, ãfe õiti mēra afaa chaka shinãtama Nios fisti shinãkĩ chipo Nios õixii. Nãskax inimakõixii.

⁹ “Akka noikaspā faatanāifono fētsafāfe ato raenā faano, nāfo Niospa ato yoikī iskafaxii: ‘Mā ēfe fakefo,’ ixō ato yoiaino inimakōixikani.

¹⁰ “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexesharakōiano nāskakē inimakōixii.

¹¹⁻¹² “Mā ea Ifofakē fetsafāfe mato ĭchakani, mato omiskōimayanā askatari matoōnoa meka chaka yoikani meka fetsa fetsatapafo. Nā mato chakafaifo keskafakīri māto xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mekexona nai mēranoa mātonā inō,” ixō Jesús afe imisfo ato yoini.

*“Mā tashi keskarata askatari mā pena keskara,”
ixō a Ifofafo Jesús ato yoini
(Mr. 9.50; Lc. 14.34-35)*

¹³ Anā Jesús ato yoini iskafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai toa pishta fichipaima. Mā paispakē anā nō pitiroma. Nāskakē nō potatiro. Nāskarifiāi mā tashi keskara. Mā nono mai ano isharaino yorafāfe mato ōikani inimatirofo. Askafixō mā Nios anā Ifofasharayamaito matoōxō tsōakai tāpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mā kai afaama,’ ixō yoitirofo.

¹⁴ “Nāskatari mā oa luz peeikai keskarakī. Akka pexe rasi māchi keya mǎnǎnēnoax onetiroma. Chai

ixõ penakõi nõ õitiro. Nãskarífiái matoõxõ yorafãfe xafakã eõnoa nikatirofo.

¹⁵ Nãskafakĩri tsõakai fakishaino õipaifikĩ luz fe-potiroma. Tapo kamaki luz õtaxõ kesho fe-potiroma. Askatamaroko tapo kamaki fomãkã nõ õtaxõ tsãotiro a pexe mēra ikafãfe õisharanõfo.

¹⁶ Nãskarífiái isharakãfe. Mã askaito mato õikakĩ tãpitirofo mã eõnoax xafakã isharakẽ. Askata mãto Epa Nios nai mēra ikano aõnoa yoikĩ iskafaxikani: ‘¡Aicho! Na yorafo Niosnoax isharakõimisfo. Āto Nios sharakõi,’ ixõ yoixikani,” Jesús ato fani yoikĩ.

Jesús ato yoini a Niospa shinãmanaino Moisés keneniõnoa nikasharakõinõfo

¹⁷ Anã Jesús ato yoini: “Mã shinãiraka iskafakĩ: ‘A Moisés Niospa shinãmanaino keneni, askatari a Niospa meka yoimis fetsafãferi kirika kenenifo afo Jesús noko nikamakaspai,’ ixõ mã shinãiraka. Anori shinãyamakãfe. Ēkai Moisés feta a Niospa meka yoimis fetsafãfe kenenifo keskara ě potayoi onima. Askatamaroko nã kenenifo keskara ě ato tãpimaxii ě ftoni nai mēranoax.

¹⁸ Akka ě mato xafakã yoi. Ea nikasharakãfe. Nai fe mai keyoyoamano a Moisés yoini keskara tsõa fetsafatiroma. Askatari afaa nõ potatiroma. Akka mã keyokõi mitokomeano, mai fe nai keyoxii. Mã afama mĩshtifo keyoano nõ anã Moisés mekari nõ yopaxima.

¹⁹ Akka fẽtsa Moisés meka nikasharayamaxõ fet-safori ato meka chaka tãpimanaino nikakaspamisfo a Moisés keneni keskara. Nã feronãfake Epa Nios ika ariax anã afaa itiro. Nãskafekẽ fẽtsa Niospa meka nikasharataifakĩ fetsafori Niospa

meka xafakĭa yoiāx Epa Nios ika anoāx afe xanĭfo itiroki.

²⁰ Askano nā fariseofo fe a Moisés yoikĭ kirika keneni keskara ato tāpimamisfo, ‘Nōfi sharakōi,’ ifiamisxakakĭ Niospa yoini keskara keyokōi nikafoma. Akka a Moisés yoikĭ keneni keskara nikakōikanaxma tsoa Epa Nios ika ari nokotirofoma,” ixō Jesús ato yoini.

“Ōitifshkiyamakāfe,” ixō Jesús ato yoini

(Lc. 12.57-59)

²¹ Anā Jesús ato yoini iskafakĭ: “Mā mā nikamiskĭ a Moisés nōko xinifo ato yoipaoni keskara. Iskafakĭ ato yoini: ‘Tsoa reteyamakāfe. Mā fetsa retekē xanĭfofo ano mato iyotirofo matori kopikiri retematirofo,’ ixō nōko xinifāfe yoinifo.

²² Mēstekōi anori yoifinikē ē mato meka fetsari mēstekōi yoinō. Ea nikasharakāfe. Fētsa fetsa ĭchaito mĭ xanĭfofo ari iyotiro a omiskōimanō. Askatari fētsa fetsa chakafai iskafakĭ: ‘Mĭ afaa tāpiama. Mĭ tatimakōi,’ faito Niospa a omiskōipakenakafo mēra chiifā mēra potatiro anoāx omiskōipakexanō.

²³⁻²⁴ “Nāskakē mā Nios kĭfiti pexefā mēraxō mā kĭfipaikĭ mā iskafaki shināino: ‘Ooa, ē fetsa chakafaa ē raefama,’ ixō shinākĭ, anā Nios kĭfixoma nā mā Nios ināpaifafāinai fetsa ano koshi fotakāfe. Akiki nokoxō yoisharafe anā mikiki raenō. Nāskaxō anā mā Epa Nios kĭfitiro.

²⁵ “Mā fetsa nimiano matoki oxō mato iskafatiro: ‘Mĭ ea nimia. ¿Afetĭa mĭ ea kopifaimē? Mĭ ea kopifayamaito ē mia xanĭfo ano iyoikai,’ mato faito, xanĭfo ano kayoxoma koshi raefakāfe. Akka mā askafayamaino xanĭfo ano mato iyotiro.

Mã mato iyoano xanĩfãfe policia yoitiro iskafakĩ: ‘Na feronãfãke fetsa nimiakĩ kopifaamaki, karaxa mẽra ikimafe,’ fatiro.

²⁶ Ë mato paraima. Fẽtsa mato karaxa mẽra ikimanano mã fena tseketiroma. Akka nã mã nimia kopifatĩa mã tseketiro,” ixõ Jesús ato yoini.

“Mãto ãfikõima chotapaiyamakãfe,” Jesús ato fani

²⁷ Anã Jesús ato yoini: “Mã mã nikamis a nõko xini Moisés yoini keskara. Iskafakĩ ato yoini: ‘Mãto ãfima chotayamakãfe. Askatari kẽromãri mãto fenema chotamayamakãfe,’ ixõ ato yoini.

²⁸ Nãskara chanĩma. Nãskakẽ ãri mato yoi, fẽtsa ãfe ãfima õikĩ ãfe shinã mẽraxõ shinã: ‘Ë na kẽro chotapai,’ ixõ shinãkĩ ãfe shinã mẽraxõ chotai.

²⁹ “Akka mãto fẽro õikĩ mã chakafatiro. Nãskakẽ afara chaka õiyamakãfe afara chakafaxikakima, nã nõko fero tsekaxõ nõ õitiroma keskafakĩ. Mã mãto chaka xateyamax omiskõipakenakafo mẽra mã katiro. Akka mã mãto chaka xateax mã Nios ika ari kaax mã afe ipaxatiro. Askara shara.

³⁰ Nãskarifikĩ mãto mẽke kayakai aõxori mato afara chakafamakẽ, mextemekãfe. Mã askafax shara mã itiroki. Nãskarifikĩ mãto chaka xatekãfe nã mã mextemea keskaraxõ. Akka mã mãto chaka xateyamax, nã omiskõipakenakafo mẽra mã katiro. Akka mã mãto chaka xateax, Nios ari mã kaax afe mã ipaxatiro. Askara shara,” ixõ Jesús ato yoini.

*Feronãfake ãfe ãfi fe enẽnãtirofoõnoa Jesús ato yoini
(Mt. 19.9; Mr. 10.11-12; Lc. 16.18)*

³¹ Anã Jesús ato yoini: “Nāskatari Moisés nōko xinifo yoini iskafakī: ‘Fētsa āfe āfi potaxikī a potay-oxoma iskafatiro kirika kenexō: “Ē anã mia fi-paima. Ē mia eneikai,” ixō kenexotiro,’ ixō Moisés ato yoini.

³² Akka anori Moisés yoifinikē anã meka fetsari ē mato yoinō. Tsōa āfe āfi chotayamafiano, feronāfake āfe āfi eneano nã kēro feronāfāke fetsa fe chotanāi chakanai. Askatari feronāfake fētsa nã kēro fīax chakanai āfe āfikōima chotai,” ixō Jesús ato yoini.

“A mā yoiyomis keskara akāfe,” ixō Jesús ato yoini

³³ Askata anã Jesús ato yoini: “Mā mā nikamis a Moisés nōko xinifo yoini keskara. Ato iskafakī yoipaoni: ‘A mā Nios yoiyomis keskara axosharakāfe. A mā yoiyomis keskara Epa Niospa mā nikakī akka mā ayamano nã chakakōi itiro,’ ixō Moisés nōko xinifo yoini.

³⁴ Akka nānori ato yoifinikē, ēri mato yoisharanō. Nikakapo. Mā fetsafo yoiyomis keskara axosharakāfe. Iskafakī yoiyamakāfe: ‘A ē mato yoiyoa keskara ē axii. Ē mato yoiyoa keskara ē ayamaino Epa Niospa ea omiskōimatiro,’ ixō yoiyamakāfe. Askatari, ‘A ē mato yoia keskara ē akēma keyokōi nai mēraxō ea omiskōimatiro,’ ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiroma.

³⁵ Askatari, ‘A ē mato yoiyoa keskara ē ayamaino nono mai anoafāfe ea omiskōimatiro,’ ixō anori yoiyamakāfe. Keyokōi mai ano Epa Niosnã. Askatari, ‘A ē mato yoiyoa keskara ē ayamaino a

Jerusalén anoafāfe ea omiskōimatirofo,’ ixō anori yoiyamakāfe. Nā Jerusalén nōko xanīfo finakōi Niosnā.

³⁶ Askatari, ‘A ě mato yoiyoa keskara ě ayamaino ěfe māpo ea omiskōimatiro,’ ixō yoiyamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro.

³⁷ Akka fetsafo parayamakāfe. ‘Ĕ mia axōikai,’ ixō axokāfe. Askatari, ‘Ĕ mia axōima,’ ixō axoyamakāfe. ‘A ě yoiyoa keskara ě ayamaino afaa ranā ea omiskōimatiro,’ ixō anori yoiyamakāfe. Mā askara yoikī mā chakafai,” ato fani.

*“Tsoa kopiyamakāfe,” Jesús ato fani
(Lc. 6.29-30)*

³⁸ Anā Jesús ato yoini iskafakī: “Mā mā nikamiski a nōko xinifo Moisés yoini. Iskafakī ato yoini: ‘Fĕtsa mato fero tsĕkaito, kopikiri mā fero tsĕkatiro. Askatari mato piti tĕkeaito, pitiri mā tĕketiro,’ ixō Moisés yoini.

³⁹ Akka nōko xinifo anori yoifinifono, ě mato meka fetsa yoinō. Ea nikakapo ě mato yoinō. Fĕtsa mato chakafayanā mato tapasaito, ‘Takai fetsari ea afe,’ fakāfe mato tāpinōfo mā ato kopiyamaito.

⁴⁰ Fĕtsa mia xanīfo ano iyoxō mia rapati fīapayaito, ināfe fotanō. Mī chōpari ināfe.

⁴¹ Xanīfo iyamakī soraronō, ‘Ea pisha chaima foxōikafe,’ mato fafiaito, mā chai foxotiro.

⁴² Akka fĕtsa mato afarafo yōkaito inākāfe. ‘Ea ināyope,’ mato faito ināfe fīshkoyamakāfe,” ixō Jesús ato fani.

*“Mato noikaspafiaifono mǎroko ato noikǎfe,”
Jesús ato fani*

(Lc. 6.27-28, 32-36)

⁴³ Anǎ Jesús ato yoini iskafakǐ: “Askatari mǎ mǎ nikamis a nōko xinifo yoipaonifo keskara. Iskafakǐ ato yoipaonifo: ‘Mǎto kaifo noikǎfe. Akka a mato noikaspaifo ato kopikiri noikaspakǎfe,’ ixō nōko xinifo yoipaonifo.

⁴⁴ Anori yoifinifono, akka ě mato yoi a mato noikaspaifo ato kopikima ato noikǎfe. Askatari ato axosharakǎfe. Askatari a mato omiskōimamisfo Epa Nios ato kǐfixokǎfe.

⁴⁵ Mǎ askafai Niospa fake mǎ iki. Akka Niospa xini onifani yora chakafoya, yora sharafo ato chaxanō. Askatari oiri imani nǎ yora sharafoya a yora chakafori ato onifaxoni. Nǎskakē mǎri a mato chakafaifoya a mato sharafaifo keyokōi ato noikǎfe. Nǎskax mǎ Niospa fake ikikai.

⁴⁶ Akka a mato noiaifos mǎ ato noia fetsafo noiyamata askarakai sharama. Akka yora chakafo a ato paraxō kori ichapa ato fǐamisfori aska famis. Mǎ askaino Nios matoki inimaima.

⁴⁷ Mato fe yorafos mǎ noia askarakai afaama. Akka a Nios Ifofaafomari nǎskarifiakani aa ranǎri noinǎkani.

⁴⁸ Nǎskakē Epa Nios nai mēraxō yorafo noiai keskafakǐ mǎri yorafo keyokōi noikǎfe. A Epa Niospa shinǎsharamis keskafakǐ mǎri askafakǎfe,” ixō Jesús ato yoini.

6

*“Afaamaisfori ato noikǐ afara ato inǎsharakǎfe,”
Jesús ato fani*

¹ Anã Jesús ato yoini iskafakī: “Mā fetsafo sharafaino, ‘Nā feronāfake sharakōi ea fanōfora,’ ixō anori shināyamakāfe yorafāfe ferotaifi. Mā askaino yorafāfe, ‘Sharara,’ mato fafiaifono, akka Epa Nioskai matoki inimatiroma. Nāskaxō mato afaa inātiroma.

² Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, ‘Sharara noko fanōfora,’ ikaxō. Askatari fofāsakakī afaamaisfo ato afara ināfofāsafamisfo, ‘Noko yoisharanōfora,’ ikaxō. Akka askafiaifono Niospa ato afaa ināxima.

³ A afara yopaifo mā afara inākī tsoa yoiyamakāfe tsōa tāpiyamanō.

⁴ Akka tsōa ōiyamaino a afaamaisfo mā ato ināino Epa Nios matoki inimani. Nāskaxō mato afara axosharatiro,” ixō Jesús ato yoini.

*“Epa Nios kīfikī iskafakāfe,” ixō Jesús ato fani
(Lc. 11.2-4)*

⁵ Anã Jesús ato yoini iskafakī: “Mā Epa Nios kīfiatīa a chanīmisfāfe kīfimisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotaifi Epa Nios kīfimisfo: ‘Noko ōinōfora,’ ikaxō. Epa Nios shinātamarko ato ōimapaikani. Yorafāfe ato ōiaifono askamisfo. Akka Epa Nios atoki inimaima. Nāskakē ato afara shara ināxiima.

⁶ Akka māri ato keskara iyamakāfe. Mā Nios kīfikī tsōa mato ōiyamaino nānoxō Epa Nios kīfikāfe. Māto pexe kene mēra ikixō tsōa mato ōiyamaino nānoxō Epa Nios kīfikāfe. Akka yorafāfe mato ōiyamafiaino Epa Nios fistichi mato nikatiro.

Nāskakē matoki inimai. Nāskaxō afara shara mato ināxii.

⁷ “Akka a Nios chanīmara faafāfema kīfimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima.

⁸ Akka māri ato keskara iyamakāfe. Mā Epa Niospa tāpiakī mā afara yopaito, mā yōkayoamano.

⁹ Akka mā kīfikī iskafatiro:

Epa Niosi, mī fisti sharafinakōia. Mī nai mēra ika. Nō mia noikōi.

¹⁰ Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo.

¹¹ Nā pena tii a nō piiai noko ināfafāife nō afaa yopayamanō.

¹² Nō afara chakafaito nōko chaka noko soaxōfe nā noko chakafaifāfe nō ato raefai keskafakī.

¹³ Nokoki Satanás chaka omayamafe, askaki-maroko nomakinoa pōtafe nō nikayamanō, ixō kīfikī iskafakāfe.

¹⁴ “Akka fetsafāfe mato chakafaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiro.

¹⁵ Akka mā fetsafo raefayamaito Epa Niospari mato chaka soaxotiroma,” ixō Jesús ato yoini.

Foni tenemisfoōna Jesús ato yoini

¹⁶ Anā Jesús ato yoini iskafakī: “Ē mato yoiyonō. Mā foni tenei oa shināmitsai keskara mātō femānā iyamakāfe a āa keparanāmisfo ikaifo keskai. Afāfe foni tenekani āto femānā shināmitsai keskara

ikani yorafãfe ato õikani. Askatari foaromekanima yorafãfe ato õinõfo. Nãskakẽ Epa Niosnoa shinãkanima. Askaifono Epa Nios atoki inimaima. Nãskakẽ ato afaa inãima. Akka mãri foni tenei ato keskara iyamakãfe.

¹⁷⁻¹⁸ Akka mã foni tenei mã Nios shinãyanã mã fechokometiro. Askatari fõxti mã foaromesharatiro. Nãskakẽ Epa Nios fistichi tãpitiro yorafãfe tãpiafomano. Mã askaito yorafãfe tãpitirofoma mã foni teneaito. Akka Epa Nios fistichi tãpitiro. Nãskakẽ Epa Nios matoki inimatiro. Askatari mato afara shara inãxii,” ixõ Jesús ato yoini.

*“Epa Nios ika anoxõ afara sharakõifo mato mekexona,” ixõ Jesús ato yoini
(Lc. 12.33-34)*

¹⁹ Anã Jesús ato yoini iskafakĩ: “Nono mai anoxõ afama mĩshti ichapa mekeyamakãfe. Mato nakaxa pĩaino mã fenotiroki. Askatari chakanai fetsetiro. Askatari yometsofo mãto pexe mẽra ikixõ mãto afama mĩshtifo keyokõi mato fĩano mã fenotiro.

²⁰ Akka afama mĩshti noitama Nios noikãfe. Nã mato yoini keskara akãfe. Mã akiki nokoaito nã mato afara sharakõi mekexona mato inãxii. Akka ono nai mẽraxõ afama mĩshti mato mekexona, a nakaxa mato pĩatiroma. Askatari chakanaima. Askatari anã mãto pexe mẽra ikiax tsoa yomet-sotiroma.

²¹ Akka mãto afama mĩshtifo noikĩ mã shinãfafãini. Nã mãto afama mĩshtifo mã shinãfafãinai keskafakĩ Niosri shinãfafãikãfe, a noikĩ yonoxosharakãfe,” ixõ Jesús ato yoini.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini (Lc. 11.34-36)

²² Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa ōisharatiro. Nāskatari nō isharakōitiro.

²³ Akka nōko fero chakakē nō ōisharatiroma. Fakishkōi itiro. Nāskarifiakī nōko ōiti mēraxō nō chaka shinākī nō afara chakafamis nō itiro. Akka ōisharakāfe. Mā Epa Nios shināi xafakīa ifiaxō āfe meka kachikiri faxō mā anā xafakīa shinātiroma. Fakish keskara mā itiro,” ixō Jesús ato yoini.

“Nōko afama mīshti noisharatama nō Nios noisharakōitiro,” Jesús ato fani (Lc. 16.13)

²⁴ Anā Jesús ato yoini iskafakī: “Tsōa āfe ifo rafe yonosharaxotiro. Fetsa noikaspata, fetsa noisharatiro, nā yoiāi keskarakōi axotiro, akka a fētsa amapaiyai keskara axotiro ma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiro,” ixō Jesús ato yoini.

“Epa Niospa āfe fakefo kexesharamis,” ixō Jesús ato yoini (Lc. 12.22-31)

²⁵ Anā Jesús ato yoini iskafakī: “Anā ē mato yoisharanō. Ea nikasharakāfe. Shināchakayamakāfe. Nō afaa piyamata, afaari nō ayaima iyamakāfe. Askatari afaari nō safeima ixō shināchakayamakāfe. Akka a nō piaitokai noko

imasharatiroma. Askatari a nõ safeatori nõko yora noko imasharaxotiro.

²⁶ Akka shinākapo. Peyafāfe afaa fanamisfoma. Afaari topimisfoma. Askaxori afaa mekemisfoma. Nāskafekē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainīfofā mato kexesharakōimis.

²⁷ Nāskakē, ¿afeskakī mā shināchakaimē? A nõ shināchakaitokai pena fisti noko anā nimatiroma. Nāskakē afaa shināchakayamakāfe.

²⁸ “Askatari iskakī shināyamakāfe: ‘Ooa. ¿Fanīa ē rapati fitiromē safexiki?’ ixō anori shināyamakāfe. Akka shinākapo afeskax charofo foaikamakī. Nā charofāfe yonokanima. Askatari xapo toro atirofoma rapati faxikakī.

²⁹ Nāskafīax charofo sharamīshiti foaikani. Nāskarari xanīfo Salomón rapati sharafinakōia safefixō nā charofo finōama.

³⁰ Akka Niospa nafefo sharashtafo onifani. Sharafiano nõ sepakī xateano natiro. Nāskaxō nõ koofatiro. Akka Niospa nafefo finōmainīfofā mato noikī mato rapati safematiro mato kexesharaxō. Akka mā shināchakakī mā Nios chanīmara fasharaima.

³¹ Nāskakē shināchakayamakāfe. Shinākī iskafayamakāfe: ‘Ooa. Ē fonāiki a ē piiai keyoano, a ē ayairi keyoano koriyaxomari ē afaa safeima,’ ixō anori shināchakayamakāfe.

³² Akka nā Nios Ifofaifāfema iskara shināmisfo. A piiai fisti shinākata, a safepaiyaifori shināmisfo. Akka Epa Niospa mā mato tāpia afarafo mā yopaito.

³³ Nāskakē Nios māto xanīfoōnoa shinākāfe. A Niospa mato amapaiyai keskara nāskara fisti shinākōikāfe. Mā askafaito afara fetsa mā yopaito Epa Niospa mato ināxii.

³⁴ Nāskakē shināchakayamakāfe. Yoi iskayamakāfe: ‘Ooa. Ē tāpiama penama afara chaka afeskara afiaino. Ē nā keskara tenetiroma,’ ixō shināyamakāfe. Shinākī iskafakāfe: ‘Epa Niospa na penata ea kexesharamis keskafakī penamari ea kexesharai,’ ixō nānori shinākāfe,” ixō Jesús ato yoini.

7

“Fetsafo mekafakī chakafayamakāfe,” ixō Jesús ato yoini

(Lc. 6.37-38, 41-42)

¹ Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Naato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma.

² Akka māri nāato akai keskafakī afara mā chakafaito, matori Niospa omiskōimaxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma.

³ ¿Afeskakī ifi pasta pishta fetsa feronaki ikano mā ōimē, māroko ifi pasta efapa feostamefixō?

⁴ Akka, ¿mā shināimamē a mā ifi pasta efapa feostamea? Akka, ¿afeskakī mā fetsa iskafaimē?: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama.

⁵ Nāskax mā chanīkōi mā ato parapaimis. Akka ē mato yoinō ea nikakapo. Akka mātō fero mēranoa a ifi pastafā mā feostamea tsekayokāfe. Nāskaxō ōisharakī, a fetsafo ifi pasta pishta feronaki ika mā tsekaxotiro. Nāskarifikī mātō chaka xateyamaxō mā fetsafo chaka xatematiroma. Akka mātō chaka xatexō fetsafo mā chaka xatematiro.

⁶ “Ē meka fetsari mato yoinō mā tāpinō. Paxta pōfe nō nami shara ināpaifiaino noko keyotiro mi-fiki. Askatari kochi nō afara shara ināino peama peamakī chakana fatiro. Nāskari fakī yorafāfe Niospa meka shara nikakaspakī chakafatirofo, Epa Nios chakafakī mekafakakī. Askafono Epa Niospa meka shara anā ato yoipaiyamakāfe,” ixō Jesús ato yoini.

“Nō Epa Nios afara yōkaito noko inātiro,” ixō Jesús ato yoini

(Lc. 6.31; 11.9-13)

⁷⁻⁸ Anā Jesús ato yoini iskafakī: “Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitīa. Nāskakē Epa Nios kīfifafāikāfe mā kīfiaito mato ināi kiki. Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfiaito ināsharakōixii.

⁹ “Akka mātō fake mato yoa yōkaito, ¿mā tokiri inātiromē? Maa. Mākai mātō fake mā askafatiroma.

¹⁰ Askatari, ¿mātō fāke mato foe yōkaito mā rono inātiromē? Maa. Mākai mātō fake mā askafatiroma.

¹¹ Akka mā chakafixō mātō fakefo kexesharaxō afara sharafo mā ato inātiro. Nāskarifikā Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nā nai mēraxō mato mekexona.

¹² “Nā mā fichipaiyai keskafakī fetsafāfe mato axosharaifono, nāskarifikā māri fetsafo axosharakāfe. Moisés feta a Niospa meka yoimifāfe nānori yoinifo kirika kenekakī,” ixō Jesús ato yoini.

*Fepoti pishtaōnoa Jesús ato yoini
(Lc. 13.24)*

¹³ Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra.

¹⁴ Akka fepoti pishta ano fai kaa, pishta feka. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

*Ifi āfe fimioxō nō tāpitiro afe keskaramākī
(Lc. 6.43-44)*

¹⁵ Anā Jesús ato yoini iskafakī: “Ōisharakāfe, a chanāifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimifomaki. Akka afofi ovejafo keskarafō fikanax akka āto shinā mēra poomā pōfefe keskarakōifo. Nāskakē ato fishtayamakāfe.

¹⁶ Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi

moxaya foaitiroma. Nāskaxō nō tāpitiro mox-ayafo ōikī xopakairokokē. Nāskarifikā nō tāpitiro kachafimāi moxayakē.

¹⁷ Akka ifi shara fimi sharaya itiro. Akka ifi chaka fimi chakaya itiro.

¹⁸ Nāskakē Ifi shara fimi chakaya itiroma. Ifi chakari fimi sharaya itiroma.

¹⁹ Akka ififo fimi sharaya iyamaito ifāfe reraxō koofatiro.

²⁰ Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini

(Lc. 13.25-27)

²¹ Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī.

²² Akka mā mai keyoaino nā onifanifo tii keyokōi Niospa ichanāfaxii. Nā nikakaspamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato maki-noa potamis. Mī aneōxori nō afama mīshti famis yorafāfe atiroma keskafakī. Noko shināfe, Ifo,’ ixō ea yoixikani.

²³ Askaifono ē ato xafakīa yoixii iskafakī: ‘Mā kai efe yorama. Māfi ato pāramiski. Afara chaka fisti

mã famiski. Emakinoax fotakãfe,' ã ato faxii," ixõ Jesús ato yoini.

Pexe rafeõnoa Jesús ato yoini

(Mr. 1.22; Lc. 6.47-49)

²⁴ Anã Jesús ato yoini iskafakĩ: "Akka nã ea nikaito nã ã yoiai keskara aki, nã yõra pexe fakĩ tãpixõ mai chai põkixõ mai teikĩ pexe kishi nĩchitiro keskafakĩ.

²⁵ Akka oi ikaino, pexe nãmã faka faitiro. Askatari nãfefakĩ pexe afeskafatiroma. Nãskakẽ pexe paketiro ma nã mai teikõikimã pexe kishi niano.

²⁶ Akka nã ã yoiaito ea nikafikĩ a ã yoiai keskara nikaima, askara yora nã yora tatimato pexe fakĩ mashi ano pexe fatiro keskarakõi.

²⁷ Akka oi ikaino faka faitiro. Askatari nãfefakĩ pexe potatiro. Nãskax pexe chakanatiro. Nãskarifiakĩ fẽtsa ãfe meka nikafikĩ ea nikaima afofi fenoĩ fetsekani. Nãskakẽ omiskõipakenakafo," ixõ Jesús ato yoini.

²⁸⁻²⁹ Nãskata mã Jesús mekai xateano yorafãfe nikakaxõ, "¡Kee! Nikakapo. Nato tãpikĩ finakõia, a Moisés yoikĩ kirika kenenĩ keskara ato tãpimamisfo keskarama, meka sharakõi nato yoi," fanifo.

8

Jesús yora rashkishiai sharafani

(Mr. 1.40-45; Lc. 5.12-16)

¹ Askata Jesús ato yoikĩ xateta mãchi keya ariax tisirimepakeaito yorafãfe chĩfafainifo afe fõkakĩ.

² Jesús kaino feronãfake isinĩ iki rashkishi fetseax Jesúski oni. Akiki oxõ ratokonõ

mai chachipakefofã yoini iskafakĩ: “Ifo, ea sharafapaikĩ mĩ ea sharafatiro,” fani.

³ Askafaino Jesús ãfe mēkemã ramãyanã yoini iskafakĩ: “Ë mia sharafanõ. Iskaratĩa mĩ sharaikai,” faino, a rashkishi fetseai koshikõi sharatani.

⁴ Mã sharano Jesús nĩchini iskafakĩ yoiyanã: “Mĩ tsoa yoiki. Akka nã ato Nios kĩfixomis ispatãfe. Nãskaxõ ovejanã fake foxõ inãfe mia retexonõ Moisés yoini keskafakĩ. Nãskaxõ keyokõichi tãpinõfo a mĩ isinĩ imis mã mĩ sharano,” ixõ Jesús yoini.

*Jesús sharafani romanõ xanĩfãfe ãfe ina yonaito
(Lc. 7.1-10)*

⁵ Askafafãini Capernaúm ano kani. Nãno akiki soraro xanĩfo nokoni a yonoxomis sharafamapai.

⁶ Nokoxõ yoini: “Ifo, a ea yonoxomis isinĩ iki. Ëfe pexe ano rakax omiskõiferoikima,” fani.

⁷ Askafaino, “Ë kanõkĩ sharafaxikĩ,” fani.

⁸ “Ifo, êkai afama. Akka mĩ tsoa keskarama. Mĩ finakõiakĩ ãfe pexe ano kayamafe. Mĩ mekapa a ea yonoxomis ea sharafaxõfe nonoxõ.

⁹ Akka eari ãfe xanĩfãfe yonomamis. Ëri sorarofõ yonomatiro. ‘Katãfe,’ ã faino karisatiro. Askatari, ‘Ekeki ofe,’ ã faino ekeki orisatiro. Nãskakẽ a ea yonoxomis afara ea axõfe ã faino ea axotiro. Akka mĩ afama mĩshti fatiroki. Mĩ mekapa a ea yonoxomis ea sharafaxõfe,” ixõ yoini.

¹⁰ Askafaito nikakĩ a afe foafo Jesús ato yoini: “Kee, nikakapo. Na feronãfake israeliyamafixõ ea chanĩmara fakĩ finakõi fetsafo keskarama. Akka Israel anoafãfe ea iskafamisfoma chanĩmara fakakĩ.

11 Ĕ mato xafakĭa yoinō. Na maitio ano ikafo Nios chanĭmara fakanax nōko xinifo Abrahamnō Isaacanō Jacobonō ichanāxikani Nios yorafo ixikakĭ.

12 Akka atiri nōko kaifo nā israelifo Niospa afe yorafo ato imapaifiaino chanĭmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

13 Nāskata Jesús yoini soraro xanĭfo: “Mĭ pexe ano katāfe. Mĭ ea chanĭmara faino a mia yonox-omis mā sharaki,” fani.

Jesús Pedro rayos sharafani
(Mr. 1.29-31; Lc. 4.38-39)

14 Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini.

15 Jesús ōikĭ āfe mēkemā ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākafāta Jesús pimani.

A isinĭ ikaifo Jesús ato sharafani
(Mr. 1.32-34; Lc. 4.40-41)

16 Nāskano mā xini kaino a isinĭ ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani.

17 Nānori Niospa meka yoimisto Isaías a inōpokoai yoikĭ kirika kenekĭ iskafani: “Nō isinĭ imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika keneni keskara Jesús ani.

*A afe fopaimisfoōnoa Jesús ato yoini
(Lc. 9.57-62)*

¹⁸ Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō ĩamāfā pokefainō fokāfe,” ato fani.

¹⁹ Akka Jesús kayoamano a Moisés yoikī kirika keneni keskara ato tāpimamis akiki oxō yoikī iskafani: “Maestro, ěri mefe kapai nā mī kai ari ěri mefe kafāsaxiki,” faito,

²⁰ Jesús kemani: “Akka maxoteneroa kiniya, peyafori naayafo akka ěkai pexe yama,” fani.

²¹ Askatari a afe kafāsamis fĕtsa iskafakī yoini: “Maestro, ea nĕchiyofe ěfe epa naito ě maifayotanō. Chipa mia Ifofaxiki,” faito, Jesús kemani:

²² “Iskaratĕa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

*Jesús nefe yafi ĩamāfā poo iki meseniaito nishpa
fani*

(Mr. 4.35-41; Lc. 8.22-25)

²³ Nāskata Jesús kanōanāfānē naneinĕkafāni aōxō tāpimisfori afe naneinĕfofānifo.

²⁴ ĩamāfā pokefainafono atoki nĕfēfā nokoni. Jesús kanōanāfā xaki mĕra rakax oxano nefeyanā ĩamāfā poo ini. Kanōanāfā faka fospikōini.

²⁵ Askaino aōxō tāpimisfāfe mōinifo iskafayanā: “ĭIfo, mā nō āsaikai! ĭNō āsayamanō moife!” fanifo.

²⁶ Askafaifono, Jesús ato yoini: “ĕAfeskai mā rateimĕ? Mā ea chanĕmara fasharama. Nāskakē mā ratei,” ato fani. Ato askafata, fininākafāta fāsikōi, “ĭNĕfe, nishpafe!” fata, “ĭĬamā, nishpafe!” fani. Askafaino anā ĩamāfā feroinima.

27 Askafaito òikani yoinānifo: “¡Keel! ¿Na feronāfake afe keskaramē na nefe feta ĩamāfānē ato yoiaito nikaifo?” ikanax yoinānifo.

Feronāfake rafeta Gadara mai anoxō niafaka chakafo nanea-fono Jesús ato makinoa potani (Mr. 5.1-20; Lc. 8.26-39)

28 Askata Jesús okiri ĩamāfā aōxō tāpimisfo feta pofefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinifā mēranoax. Nā rafe mesekōi ipaonifo. Nāskakē yorafāfe a ikafo ano tsōa ato finōtiriroma ipaoni atoki mesekakĩ. Nā maiyafo ano nā rafe ipaonifo.

29 Nāskakē Jesús fichikanax fāsikōi fiisiyanā yoinifo: “Mifi Niospa Fakeki. Akka, ¿mĩ noko afeskafaiyoamē? ¿Mĩ noko omiskōimaniyoamē?” Jesús fanifo.

30 Askafaifono chaimaxō kōchifā rasichi pinifo.

31 Nāskakē niafaka chakafāfe Jesús iskafanifo: “Mĩ nā feronāfake rafe makinoa mĩ noko potaimākai kochifo mēra noko nīchife,” faifono,

32 “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra ikinifo. Nāskakē kochi rasi ichoax ĩamāfā mēra keyopakeni. Nāskax āsai fetseni.

33 Askaito òikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafo rafe mā Jesús ato makinoa niafaka pōta. Askatari nōko kochifo mēra ikimanano keyokōi nāfoya nōko kochifo ĩamāfā mēra keyopakeax āsai fetsea,” ato fanifo.

³⁴ Ato yoiiaifono nikakanax keyokōi nã pexefo tii anoax Jesúski fenifo. Akiki nokokaxō yoinifo: “Na nõko mai anoax katãfe,” fanifo.

9

Jesús yora finimisma sharafani

(Mr. 2.1-12; Lc. 5.17-26)

¹ Askata Jesús kanõanãfã mēra nanekaini. Ìamãfã okiri pokefaini kaax ãfe mai ano nokoni.

² Nãno ikano a feronãfake finimisma yorafãfe akiki efenifo ãfe ratatinĩ rataxō Jesús sharafanõ ikaxō. Jesús õini shinãifãfe iskakakĩ na finimisma Jesús sharafai kiki ikaxō. Nãskakē a finimisma Jesús iskafani: “Efe yorashta, inimafe. Iskaratĩa mẽ mia chaka soaxonaki,” fani.

³ Askafaino a Moisés yoikĩ kirika kenei keskara ato tãpimamisfãfe atirito nikakaxō ãto shinã mēraxō shinãnifo iskafakakĩ: “Natokai ato chaka soaxotiro. Nios fistichi ato chaka soaxotirokĩ. Akka nato noko feparapai, ‘È Niosra’ noko fapai,” ixõ ãto shinã mēraxō shinãnifo.

⁴ Askaifono Jesús tãpixõ a shinãifo keskara ato yoini: “¿Afeskakĩ mãto shinã mēraxõ mã chaka shinãimē?”

⁵⁻⁶ Èfi Cristokĩ ã yorafo ato chaka soaxotiro. Akka, ¿ã afaa fatiromē? Mē mia chaka soaxona ã fatiroraka. Askatari ã mia sharafaa ã fatiroraka,” ato fani. “Akka ã mato tãpimanõ ã Niosxõ mato chaka soaxotiro nono mai anoxõ.” Nãskata Jesús a feronãfake finimisma yoini: “Fininãkafata mĩ rakati fifaini mĩ pexe ano katãfe,” Jesús fani.

⁷ Jesús askafaino a finimisma fininãkafãta ãfe pexe ano kani.

⁸ Askaito òikani yorafo ratei fetsenifo. “¡Kee, òikapo! Nios tsoa keskarama. Fãsi sharakõi. Nõ òimisma keskara mã noko rama òimana. Niospa Yõshi Sharaõxõ na feronãfake finimisma Jesús ãfe mekapa mã sharafaa. Askatari ãfe chakari mã soaxona,” ikanax yoinãnifo.

*Jesús Mateo ifini aõxõ tãpimis inõ
(Mr. 2.13-17; Lc. 5.27-32)*

⁹ Jesús nãnoax kakĩ feronãfake fisti fichini, ãfe ane Mateo,* ãfe xanĩfo kori fixõi tsaokẽ. Nãskaito Jesús yoini: “Efe kofe ẽ mia tãpimanõ,” faino Mateo fininãkafã Jesús fe kani.

¹⁰ Nãskafaito Mateo Jesús iyoni ãfe pexe anoxõ pikikakĩ. Askatari a yora chakafori afe inifo a xanĩfo kori fixomisfo. Nãfãfe ãa chanĩxõ kori finõmainĩfofã fimisfo inifo. Askatari a yora fetsafo chakafamisfori fekanax akairi mãsa ano Jesús fe tsaonifo a feta pixikakĩ. Jesúsxõ tãpimisfori nãno ato fe tsaonifo ato feta pixikakĩ.

¹¹ Askaito òikakĩ fariseofãfe Jesúsxõ tãpimisfo yõkanifo: “¿Afeskakĩ mãto maestro nã ato kori fixomisfo feta piimẽ, a yora fetsa chakafo fetari pii?” fanifo.

¹²⁻¹³ Askafaifãfe nikakĩ Jesús ato yoini: “A sharafãfe notoro fenakanima. Akka nã isinĩ ikaifãfe notoro fenakani. Nãskafakĩri yorafãfe yoimisfo iskakakĩ: ‘Èkai afaa chakafamisma. Nãskakẽ ẽ afaa yopaima ẽfe chaka ea soaxonõ,’ imisfo. Nãskakẽ ẽ ato chaka soaxotiroma. Akka fetsafãfe yoikĩ iskafaifono: ‘È afara chakafamis. Nãskakẽ a ẽ imis keskara ẽ anã ipaima,’ ikaifono

* **9:9** Mateo ane rafeya ipaoni. ãfe ane fetsa Levi.

ẽ ato chaka soaxotiro. Akka nã nõ sharakõi ikaifoõ^{noax} ẽ onima. Akka ẽ oni a yora chakafo ãto chaka ato soaxoxiki. Akka ẽ mato yoipai mã tâpinõ a Niospa ato shinãmanaino iskafakĩ kenenifo: ‘Mã yoinãfo retexõ ea inãxiki mã koamis mãto chaka soapaikĩ, askara ẽ fichipaima. Akka ẽ fichipai fetsafo mã ato noikĩ mã ato sharafaxõaito,’ ixõ kenenifo.

“Akka ẽ onima a yora sharafoõ^{noax}. Askatamaroko a yora chakafoõ^{noax} ẽ oni ato chaka soaxoxiki,” ixõ Jesús ato yoini.

*Nã foni tenemisfofãfe Jesús yõkanifo
(Mr. 2.18-22; Lc. 5.33-39)*

¹⁴ Juan ãfe inafõ fẽkaxõ Jesús yoinifo iskafakakĩ: “Fariseofãfe foni tenekĩ feyafamisfo Nios shinãkakĩ. Nõri askafamis foni tenekĩ Nios shinãkĩ. Akka, ¿afeskakĩ mĩõxõ tâpimisfãfe foni tenekanimamẽ?” fanifo.

¹⁵ Askafafãfe Jesús ato kemani: “Feronãfake ãfiyaino, yorafo ano fisti ichanãkaxõ afara fetsa fetsatapafõ afeta pitirofo inimayanã, aicho fakakĩ akiki inimakakĩ. Nã kẽromã ãfe fene ano ato fe ikano tsõa foni tenetirofoma inimakakĩ. Akka mã fene rẽteafono afe yorafãfe shinãkakĩ foni tenetiro,” ixõ Jesús ato yoini.

¹⁶ “Tsõa sama fenaya sama xini kishi fatiroma. Nõ askafaino sama fena samama chakanatiro. Nãskatari sama fena fe sama xini isharatiroma. Nãskakëri nã ẽ mato yoiai keskara mã nikakõixõ a mã ipaoni keskara anã mã itiroma mãmãi ea nikakõiax. A mã ipaoni keskara shinãmakita nãskax mãto yora fena keskara shara itiro.

17 Nāskarifikāi tsōa māmā fata koiro pisha xini mēra nanetiroma nā māmānō faraxakaino toxamāianō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma. Nāskarifikāi tsōa māmā fata koiro pisha xini mēra nanetiroma nā māmānō faraxakaino toxamāianō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiai keskara ōsinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma,” ixō Jesús ato yoini.

*Jairo fake xotofake mā nakē Jesús otofani.
Askatari kēromāri Jesús rapati mēeax sharani
(Mr. 5.21-43; Lc. 8.40-56)*

18 Nānori Jesús ato yoiano judeofāfe xanīfo nokoni. Jesúski nokoxō xanīfāfe a nāmā ratokonō mai chachipakefofā yoini: “Ēfe fake xotofake rama naa. Akka mī kaxō mī mēkemā mī ramāino anā ototiro,” xanīfāfe Jesús fani.

19 Askafaino Jesús finināfata aōxō tāpimisfo fe kani xanīfo acho.

20 Askatari nānori kēro imi nesemisma ini, doce xinia amis imi nesekima. Nā kēromā Jesús kaito acho kaxō a kachikirixori āfe tari kexa ramākani.

21 “Ē ãfe tari mẽeax ě sharatirora,” ixõ ãfe shinã mẽraxõ shinãni.

22 Akka Jesús ifiakekafãta nã kĕro fichini. Fichita yoini: “Yõxashta, rateyamafe. Mĩ ea chanĩmara faax mã mĩ sharaki,” Jesús faino nã kĕro imi niserisatani.

23 Askata mã Jesús nokoax xanĩfãfe pexe mẽra ikikaini. Anoxõ Jesús õia yorafãfe ãto xãiti manenifo, yora fetsafo oiakani sheesaifono.

24 Askaifono Jesús ato iskafani: “Nonoax fõtakãfe. Na fakekai naamaki. Oxaki,” ato faito Jesús õsanifo.

25 Ato kãimata xotofake mĕtsoinĩfofãnaino koshikõĩ fininãkafani.

26 Nãskata Jesús nã xotofake naa otoakĕ nikakanax pexefo tii chanifofãsanifo.

Fĕxo rafĕ Jesús sharafani

27 Nãskata Jesús xanĩfãfe pexe anoax kaino fĕxo rafetari chĩfafainifo iskafayanã fãsikõĩ: “Mĩ nõko xini David fenaki, noko noife,” fanifo.

28 Askafaifono Jesús pexe fetsa mẽra ikikaini. Nãno afe ikiafono Jesús ato yõkani: “¿Mã chanĩmara faimĕ a ě mato sharafatiro?” ato faito, “Ēje, Ifo, nõ mia chanĩmara fai,” fanifo.

29 Nãskata ato fero ramãkayanã ato yoini: “Ea chanĩmara faaxfi mã sharaikai,” ato fani.

30 Ato askafaino õisharanifo. Nãskakĕ Jesús ato yoisharani: “Ea nikakapo. A ě mato sharafaa tsoa yoiyamakãfe,” ato fani.

31 Akka ato anori yoifekĕ nã Jesús sharafaa nã ano ikafo ato yoifofãsafanifo nã rafeta.

Feronãfake mekamisma Jesús sharafani

³² Nã fẽxo rafe imisfo pexe mẽranoax tsekefainafono fetsafãfe feronãfake mekamisma Jesúski efenifo Jesús sharafanõ. Niafaka chaka a mẽra naneano mekamisma ini.

³³ Jesús mã feronãfake makinoa niafaka chaka potano nã feronãfake mekamisma mekani. Nãskakẽ nã ano ikafo rateyanã yoinãnifo: “¡Kee, õikapo! Na nõko mai Israel anoxõ Jesús akai keskara tsõa õimisma,” ikanax yoinãnifo.

³⁴ Askafaifono fariseofãfe yoinifo: “Nato nãfaka xanĩfoõxõ niafaka potai,” ikanax yoinãnifo chakafakĩ mekafakani.

Jesús yorafo shinãkõini

³⁵ Nãskakẽ Jesús pexefo tii judeofo ikafo ano kafãsani. Judeofãfe ichanãti pexe mẽraxõ Jesús Niospa meka shara ato yoisharani iskafakĩ: “Isharakãfe. Nios mãto xanĩfokõi ipai kiki,” ixõ ato yoifofãsafani. Nãskaxõ a isinĩ ikaifo fetsa fetsatapafo ato sharafani.

³⁶ Yorafã rasi akiki feaifono õikĩ Jesús ato shinãkõini fekaxteaifãfe õikĩ, nã ovejafo ifomaiskanax tsõa ato kexeyamano fofãsatirofo keskara ato õikĩ.

³⁷ Nãskaxõ a aõxõ tãpimisfo ato yoini iskafakĩ: “Yora ichapafãfe ea nikayamafiaifono ichapatoma ea yonoxokani eõnoa ato yoikakĩ. Nãskakẽ mã Epa Nios kĩfikãfe a yonoxomisfo katonõ eõnoa ato yoinõfo.

³⁸ Akka Epa Nios kĩfikãfe yorafo nĩchinõ ẽfe meka ato yoitanõfo ea Ifofanõfo,” ixõ Jesús ato yoini.

10

*Jesús aõxõ tãpimisfo doce feronãfake ifini
(Mr. 3.13-19; Lc. 6.12-16)*

¹ Askata Jesús aõxõ tãpimisfo kenani: “Ekeki fekãfe,” ato faino, akiki foaifono ato yoini aõxõ yorafo sharafanõfo, a niafaka chakafo yorafo mëra nanea ato makinoa potanõfo, a isinĩ ikaifo fetsa fetsatapafo aõxõ sharafanõfo.

² Nã feronãfake docefãfe ãto anefo iskarakĩ: fetsa Simón. Nã Simón ãfe ane fetsa Pedro. Æfe exto Andrés. Fetsafori ãto ane Santiago, ãfe exto Juan, nã rafe Zebedeo fake ini.

³ Felipe, Bartolomé, Tomás, Mateo, nã Mateo Roma anoxõ xanĩfo kori fixomis ini. Askatari Santiago fetsa, Alfeopa fake, Tadeori ini.

⁴ Simón fetsa nãato ãfe kaifo feta romanõfo potapaini anã israelifo yonomayamanõfo. Askatari Judas Iscarioteri ifini, nãato Jesús chakafakĩ ato achimani Jesús retenõfo. Nã tii Jesús ifini aõxõ tãpimiskõi inõfo.

Jesús aõxõ tãpimisfo nĩchini Nios Xanĩfoõnoa ato yoitanõfo

(Mr. 6.7-13; Lc. 9.1-6)

⁵ Nãskata Jesús aõxõ tãpimisfo nĩchini ato iskafakĩ yoiyanã: “Nã nõko kaifomafãfe ãto mai ano foyamakani. Askatari nã samãritanõfo ikafo anoriri foyamakani.

⁶ Akka nã nõko kaifo israelifo ato mëra fotakãfe. Nãfo oveja fenoafo keskarafokĩ.

⁷ Fokaxõ ato yoikĩ iskafatakãfe: ‘Mã chaima nõko Ifo Nios oi kiki nõko xanĩfo finakõia ixii,’ ixõ ato yoitakãfe.

⁸ A isinĩ ikaifo ěfe sharaõxõ ato sharafatakãfe. Askatari naafono ato otofatakãfe. A rashkishii fetseaifori ato sharafatakãfe. A niafaka chakafori ãto mĕra naneafõ ato makinoa põtatakãfe. Akka ěfe shara kaxpa ě mato minia afaa ě mato yõkama. Nãskari fakĩ, ato kaxpa sharafatakãfe.

⁹⁻¹⁰ “Akka mã kakĩ afaa mã fokiki. Mãto kori foyamata, mãto rapati fetsa foyamata, mãto sapato fetsa foyamata, mãto forosa foyamata, mãto mĕsteti foyamata fakãki, eõxõ ěfe meka mã ato tãpimani kaikai. Nãskakĕ mã afara yopaito mato inãtirofo mã pinõ a mato nikamisfãfe.

¹¹ “Mã pexe rasi ano nokoxõ nã feronãfãke Nios Ifofasharakõia fenakãfe. A keskara fichixõ ãfe pexe ano iyoxõ Niospa meka ato yoisharaxikaki nã mã kaitĩa.

¹² Nã pexe mĕra ikixõ ato yoikĩ iskafakãfe: ‘Aicho. Nõ mato õiyoa,’ ato fakãfe.

¹³ Akka mato ifisharaino, mã tãpitiro nã pexe ifãfe afe yorafo ĩkisharamis. Nã mã yoiiai keskafakĩ Epa Niospa axosharai tanaima shara inõ. Akka a mato ifisharayamaifo, afãfe afe yorafo ĩkisharamisfoma. Nãskakĕ nã mã yoiiai keskafakĩ Epa Niospa ato axosharaima.

¹⁴ Akka pexe fetsa mĕraxõ mato ifikaspafono, a pexe mĕranoax mã tseketiro. Askatari pexe rasi mĕraxori mato askafaifono, mã anoax katiro. Mã anoax tsekekaikĩ mãto taekinoa mã mapo taa taa atiro ato õimakĩ. Mã askafaino tãpitirofo Nios atoki inimayamaino.

¹⁵ Ě mato paraima yoi. Nã pexe rasi Sodoma anoafõ feta Gomorra anoafãfe afara chakakõi fapaoifõ. Nãskakĕ Niospa nã ato omiskõimanaitĩa

ato omiskōimaxii. Akka nã mato nikakaspaifo nãfo
ato omiskōimaki finakōixii,” ixō Jesús ato yoini.

“Mato omiskōimakani kiki,” ixō Jesús ato yoini

¹⁶ Anã Jesús ato yoini iskafakī: “Ōikapo. Ē mato nīchikai nã yora chakafo mēra. Akka nã yora chakafāfe nã poomānā ovejafo pipaitiro keskafakani kiki mato. Mato askafaifono nã poomā onāyakōi keskara ikāfe eōxō tāpisharakāfe. Nã rīfi afaa chaka shināmisma keskafakī māri askara shinākāfe.

¹⁷ Ōisharakaki. Nã yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki.

¹⁸ Nāskakaxō xanīfofo ano mato iyotirofo eōxō. Akka anoxō na meka shara eōnoa mā ato yoixii. Askatari judeofomari mātō kaifomafori na meka shara eōnoa mā ato yoixii.

¹⁹ Akka mato achikaxō xanīfofo ano mato ināifono shināchakayamakāfe afeskaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii.

²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ “Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apafāferi āto fakefo ato achimakani fetsafāfe ato retenōfo. Fakefāferi āto apa yafi āto afaki ōitifishkikakī ato achimakani fetsafāfe ato retenōfo.

²² Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifikī mā ēfe

meka nikasharakōiaito ě mato kexesharakōixii Epa Nios fe mā isharapakexanō.

²³ Akka pexe rasi anoxō mato omiskōimanaifono, pexe rasi fetsa ano ichotakāfe. Akka ě mato yoisharanō. Ea nikasharakāfe. Mā israelifāfe pexe rasi anoxō keyokōi mā ato yoioamano, ě orisaxii.

²⁴ “Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma.

²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: ‘Mī niafaka yōshi chakafāfe xanīfo. Mī Beelzebú,’ ixō ea yoimisfo. Ě mato Ifofekē ea askafamisfo. Akka matori askafakakī finakōixikani,” ixō Jesús ato yoini.

Akka Nios fistiki nō mesetiro (Lc. 12.2-7)

²⁶ Anā Jesús ato yoini iskafakī: “Akka mato omiskōimafiaifono, atoki rateyamakāfe. Akka nā afara one yoifimisfono Niospa ato xafakīa kāimaxoxii, afarari fomāpaimisfono, nāfori Niospa ato xafakīa kāimaxoxii.

²⁷ Akka nā ě mato yoimis yorafāfe ato ferotaifi xafakīa ato yoisharakāfe.

²⁸ Akka mato retepaifiaifono rateyamakāfe. Afāfe mato retetitirofono, akka mato fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiro.

29 “Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapaiyamaino tsōakai nā peya mīshtifo retetiroma.

30 Akka ē mato yoi, Epa Niospa mātō foo fisti rasi mato tāpikakōia.

31 Nāskakē rateyamakāfe. Nā peya mīshtifo kexesharamis keskafakī, matori Epa Niospa kexesharakī finakōiakī,” ixō Jesús ato yoini.

“Akka atiri yorafāfe, ‘Jesús ēfe Ifora’ ea famisfo yorafāfe ferotaifi. Akka atirifāferi, ‘Jesús ēfe Ifomara’ ea famisfo,” ixō Jesús ato yoini

(Lc. 12.8-9)

32 Anā Jesús ato yoini iskafakī: “Yora fetsafāfe ferotaifi, ‘Jesús ēfe Ifora’ ea faifāfe ēri ēfe Epa Nios nai mēra ika anoxō, ‘Nafō efe yoraki’ ē ato faxii.

33 Akka nā yora fetsafāfe ferotaifi, ‘Jesús ēfe Ifomara’ ea faifāfe ēri, ‘Nafō efe yorafomara’ ē ato faxii ēfe Epa Nios arixō,” ixō Jesús ato yoini.

“Akka atirifāfe ea chanīmara faifono, atirifāferi ea chanīmara fakanima,” ixō Jesús ato yoini

(Lc. 12.51-53; 14.26-27)

34 Anā Jesús ato yoini iskafakī: “¿Mā shināimē maitio anoax keyokōi yorafo eōnoax inimanōfo ē oni? Maa. Anorima. Akka nā ē mato yoiai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākani.

35 Akka āfe apa ea chanīmara faino āfe fāke ea chanīmara fakaspakī āfe apaki ōititfishkitiro. Askatari āfe āfari ea chanīmara faino āfe fake

xotofāke ea chanīmara fakaspakī āfe afaki ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafoki ōitifishkitiro. Akka ē nai mēranoax matoki oyamanikē askakeranafoma.

³⁶ Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikas-patirofo.

³⁷ “Fētsa āfe apa yafi āfe afa noikī finakōixō akka ea noikī finayamax, ea Ifofamis itiroma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itiroma.

³⁸ Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoikī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma.

³⁹ Akka fētsa iskafakī shināi: ‘Ē Jesús Ifofaito ea omiskōimakanira,’ ixō shinākī, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifikī ea potaxma nā keskara yora naax efe isharapakenaka,” ixō Jesús ato yoini.

*Akka fetsafāfe ato sharafaxōaino, Niospa afara shara ināxii
(Mr. 9.41)*

⁴⁰ Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino.

⁴¹ Akka fētsa shinākī iskafatiro: ‘Nāatofi Niospa meka yoimiski. Nāskakē ē āfe meka nikasharai,’

ixõ yoitiro. Akka nã Niospa meka yoimis afara shara inãi keskafakĩ ari Niospa inãsharaxii. Nãskakẽ fẽtsari shinãkĩ iskafatiro: ‘Nã feronãfake sharaki Niospa meka nikasharamiski. Nãskakẽ ãfe meka ẽ nikakõi,’ ixõ shinãino, nã Niospa meka yoimis afara shara inãi keskafakĩ ari afara shara inãsharaxii.

⁴² Fẽtsa ea chanĩmara faxõ ea Ifofakĩ, aato shinãi iskatiro: ‘Ë Jesús Ifofamis. Nãskakẽ afara shara ẽ axõi,’ ixõ shinãkĩ afara shara axotiro. Nãskakẽ ẽ yoinõ, ea nikakapo. Faka pishta mã fetsa ayamakẽ Niospa matori afara shara inãsharaxii,” ixõ Jesús ato yoini.

11

Juan aõxõ tãpimisfo Jesúski nĩchini (Lc. 7.18-35)

¹ Askata Jesús aõxõ tãpimisfo doce ato tãpimaxõ ato nĩchini yorafo Niospa meka shara ato tãpimatanõfo. Jesús mã ato yoikĩ keyoax ari kani, fetsafo tãpimanikai a pexe rasi chaimashta ikafo ano.

²⁻³ Askatari Juan Maotista karaxa mẽra ixõ nikani Jesús Apa Niosxõ yorafo sharafaito. Nãskakẽ tãpisharapaini. Nãskaxõ karaxa mẽraxõ aõxõ tãpimisfo nĩchini Jesús ano. Mã ato nĩchia fõkaxõ yõkanifo: “¿Mĩmẽ Cristo nã Epa Niospa nokoki nĩchiai, askayamai fetsa nokoki oiraka nã nõ manai?” ixõ yõkatanõfo Juan ato nĩchini.

⁴⁻⁵ Mã Jesús ano nokokaxõ yõkanifo. Askafai-fono Jesús ato kemani: “Fokaxõ Juan yoitakãfe a mã õiyanã a mã nikafori. Yoitakãfe, mã fẽxofãfe

sharakaxō ōisharakani kiki, askatari nā chatofori mā sharakanax niafoki, a rashkishiaifori mā sharafokī, a pastofāferi mā nikasharakani kiki, a namisfori mā otoafoki, a afaamaisfāferi Niospa meka shara nikakani kiki afeskaxō Epa Niospa noko ifitiromakī.”

⁶ Nāskaxō ato yoini: “Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

Jesús ato yoini Juanoa

⁷ Nā a Juan ato nīchia rafe mā foaifono Jesús yorafo yoikī taefani Juanoa. “¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama.

⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safe-tirofo.

⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama.

¹⁰ Akka nā Juanoa yoikī Isaías kirika keneni iskafakī:

Mī nai ariax mai ano oyoamano, nā ēfe meka yoimis ē nīchi taefakī mīonoa ato yoiaino itipinī sharakaxō mia nikakōinōfo, ixō keneni.

¹¹ Akka ē mato yoi ē mato paraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fet-safāferi afaayamafikaxō ea Ifofaifono Nios atoki

inimakōirikai. Nāskakē Juan Maotista finakōifiano fetsafāfe finōkōiafo Niospa ato ōimis.

¹² “Nā Juan ato matotisa fapanitīa Niospa meka nikanixakakī, iskaratīari yorafo Nios ika ano ikipaikōikani. Iskakī shināmisfo; ‘Nios xanīfo ariax ēri āfe yora ipai afe nīpaxakī. Afaa pishtakai ea nētefatiroma ē āfe yora inō,’ ixō shināmisfo.

¹³ Akka Juan oniyamano taeyoi nā Niospa meka yoimisfo feta Moisésri keneni iskafakī: ‘Nā noko ifimis nōko Xanīfo finasharakōi oxii,’ ixō kenenifo. Akka nā Niospa meka yoimisfāfe kenenifo keskara nānorikōi Juan ato yoini.

¹⁴ Niospa meka yoimisto keneni iskafakī: ‘Ē matoki Elías nīchixii,’ ixō Niospa yoini. Akka mā āfe meka chanīmara fapaikī mā tāpitiro nā Juan Elías keskarari.

¹⁵ Mā ea nikatirokī ea nikakāfe. Ēfe meka mātō shinā mēra nanekāfe,” ato fani.

¹⁶ Nāskaxō anā ato yoini: “Iskaratīa na niyoafo afe keskarafomāki ē mato yoinō mā tāpinō. Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyaifo keskai tsoa kaxesharayamaino ato yoitirofo iskafakakī:

¹⁷ ‘Nō nōko xāiti maneano akka mā mairamisma. Askatari shināmitsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma.

¹⁸⁻¹⁹ Nāskafakīri Juan yafi ea mā mekafai. Juankai pikī finapaimisma nā ōiai pishta pimis, askatari fimi ene pae pishta ayamisma. Nāskakē aōnoa mā yoia iskafakī: ‘Nā Juan niafaka yōshi chakaya,’ mā famis. Akka ē yorakōi ē Niospa

Fakekōi piyanā ē ayasharamis. Akka mā ea iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fixomisfo ferī rafemis,’ mā ea famis. Akka ē shara imis ea Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

*Pexe rasi anoxō Jesús nikakaspanifo
(Lc. 10.13-15)*

²⁰⁻²¹ Askata anori ato yoita Jesús nā pexe rasi anoafō ato yōani iskafakī: “Ooa, Corazin anoafāfe Betsaida anoafō fe, mā omiskōi finakōixii. Akka Tiro anoxō Sidón anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘Ooa, nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo.

²² Akka Niospa Tiro anoafō yafi Sidón anoafori ato omiskōimafiakī ato omiskōimasharaima, akka matoroko omiskōimakī finakōixii.

²³ Akka, ¿nō Capernaúm anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii. Akka yōra atiroma keskara afara shara ē mato ispafiano mātō chaka mākai xateama. Akka nā ē mato ōimana keskara Sodoma anoafō ē ato ōimamiskē āto chaka xatekeranafo. Nāskakē keyokeranafoma. Askatari āto pexefā rasi keyokeranama.

²⁴ Ē mato yoinō. Afetīara Epa Niospa nā chanīmara faafoma ato omiskōimani. Nā Sodoma

ano ipaonifo omiskōixikani. Akka māfi omiskōi finakōixii,” ixō Jesús ato yoini.

“Ekeki fekāfe ẽ mato shināmasharanō,” ixō Jesús ato yoini

(Lc. 10.21-22)

²⁵ Ato askafata Jesús Apa kīfini iskafakī: “Epa, ẽ mia aicho fai. Keyokōi nai mēranoafoya nono mai anofo mī āto Ifo. Mī sharafinakōi. Akka atirifāfe kirika kene tāpifikaxō mia Ifofakaxoma. Iskafakī shināmisfo: ‘Tsoa fetsakai noko keskarama. Nō tāpikōia,’ ixō shināmisfo. Akka nāfo mī meka mī ato tāpimanimā. Akka nā kirika kene tāpikaxoma, mia Ifofaifono nāfo mī meka shara mī ato tāpimani,

²⁶ nā mī fichipaiyai keskafakī,” ixō Jesús yoini.

²⁷ Askata anā Jesús ato yoini iskafakī: “Epa Niospa a tāpia keskara eari keyokōi tāpimani, ẽmāi āfe Fakekē. Akka tsōakai ea tāpiama, ẽfe Epa fistichi ea tāpikōia. Nāskarifikī tsōa ẽfe Epa tāpiama, akka eres fisti ẽ tāpikōia. Akka nā fetsafori ẽ ato tāpimanaino nāfāferi Epa Nios tāpitirofo.

²⁸ Akka mā shināchakakōikī ea kīfikāfe. Nāskaxō mā ea chanīmara fasharayanā mā ea nikasharaito a mato fekaxtefai ẽ mato potaxotiro anā mā shināchakayamanō.

²⁹ Akka ea shinākōikī eōxō mā tāpisharakōitiro. Ẽ mato noikī fenāmāshta ẽ mato yonomamis tene-masharayanā. Nāskaxō mā anā shināchakatiroma.

³⁰ Akka a ẽ mato amapaiyai keskara anā fekaxma. Nāskakē anā mātō ōiti fekaxtetiroma,” Jesús ato fani.

12

Nā judeofāfe pena tenetitīa Jesúsxō tāpimisfāfe aros keskara metesfenifo

(Mr. 2.23-28; Lc. 6.1-5)

¹ Askata judeofāfe āto pena tenetitīa Jesús aōxō tāpimisfo fe tarepa kani. Aōxō tāpimisfāfe fonāikakī aros keskara meteskaxō pii fonifo.

² Fariseofāfe ōikakī Jesús yoinifo: “Ōipo, Jesús. Iskaratīa nōko pena teneti. Akka Moisés noko yoini na pena tenetitīa tsōa pishta yonotiroma. Akka mī inafāfe yonokani na aros keskara meteskakī,” ixō yoinifo.

³ Ato askafaifono Jesús ato kemani: “Akka, ʒa nōko xini Davidōnoa kirika kenenifo keskara mā ōimismē David afaa afeska fanimē āfe inafō feta fonāikōikī?”

⁴ Nāskaxō Nios kīfiti pexefā mēra ikikaixō a mēranoa pāa ato pikīni fonāikōikī ano afaayamano. Akka nā pāa nā judeofo ato Nios kīfixomisfonā ini. Nāskakē fetsafāfe nā pāa tsōa pitiroma ini. Nānori Niospa Moisés yoifinino akka fonāikōikī David pini a afe rafeafo feta.

⁵ Akka, ʒa Moisés keneni keskarari mā tāpiamamē? Iskafakī yoini: ‘Nios kīfiti pexefā mēra a ato Nios kīfixomisfāfe yonotirofo nā pena tenetitīa. Nāskakē afaa chakafakanima,’ ixō Moisés keneni.

⁶ Nios kīfiti pexefā sharafiano akka ē na pexefā finōkōia.

⁷⁻⁸ Epa Niospa shināmanaino Niospa meka yoimisto Oseas kirika keneni iskafakī: ‘Mā yoināfo inafō retexō ea ināxikī, mā koofamis ea shinākī nā shara. Askafiano fetsafo noikī,

mã ato sharafaxõaito ã õimis nã sharafinakõia, ixõ kirika keneni Niospa shinãmanaino. Niospa noko yoimis keskara mã tãpisharaxõ, mã ato yoikĩ chakafakeranama. Nãskakẽ ã mato yoi iskafakĩ, ãfe Epa Niospa ea nãmã nĩchini xanĩfofinakõi ã inõ. Nãskakẽ ã yoitiro afaa nõ atiomakĩ pena tenetitĩa. ã mato yoi na ãfe inafãfe akaifo keskara shara,” ixõ ato yoini.

Feronãfake mẽke yõshiya Jesús sharafani
(Mr. 3.1-6; Lc. 6.6-11)

⁹ Nãskata Jesús nãnoax kaax judeofãfe ãto ichanãti pexe mẽra ikitoshini.

¹⁰ Nãno feronãfake ãfe mẽke yõshia ini. Nãskakẽ fariseofãfe Jesús yõkanifo afara chakafaito yõaxikakĩ. Iskafakĩ yõkanifo: “Maestro, pena tenetitĩa, ¿nõ yora sharafatiromẽ?” ixõ yõkanifo.

¹¹ Askafaifono Jesús ato kemani iskafakĩ: “Mã ovejayaxõ mãto oveja kini mẽra pakeano, ¿mã pena tenetitĩa mã ifirisafatiromamẽ?” ato fani.

¹² “Akka yorafo sharafinakõiafo, oveja keskarafoma. Nãskakẽ yorafo nõ shinãkĩ pena tenetitĩa nõ ato sharafatiro. Nãskaxõ nõ afaa chakafaima. Na pena tenetitĩa yorafo nõ sharafakĩ Epa Niospa õia shara,” ixõ Jesús ato yoini.

¹³ Nãskata a feronãfake mẽke yõshiya Jesús yoini iskafakĩ: “Mẽshafe,” faino, nã feronãfake mẽke yõshiya mẽshatanaino ãfe mẽke sharatani. Nã takai fetsa keskara shara ini.

¹⁴ Nãskata fariseofo mã tsekekanax yoinãnifo: “¿Afeskaxõ nõ Jesús ato achimatiromẽ retenõfo?” ikanax yoinãnifo.

Epa Niospa shinãmanaino Isaías keneni Jesúsnoa a inõpokoai yoikĩ

¹⁵ Jesús nãnoax kani mã tâpiax retapaiyaifono. Nãskakẽ anoax kaino yorafã rasichi chĩfainifo. Akka a isinĩ ikaifo Jesús ato sharafapani.

¹⁶ Akka ato sharafaxõ ato yoini: “Ë Niospa Fakekĩ tosa yoiyamakãfe,” ato fani.

¹⁷ Nãskarakõi Isaías kirika keneni Niospa shinãmanaino Jesúsnoa.

¹⁸ Iskafakĩ keneni:

Õikapo. Nakĩa ea yonoxomis ã katoni. Ë aõ noikõi. Ë akiki inimakõi. Ëfe Yõshi Shara ã afe rafemamis. Nã maifotio ano ikafãfe ãfe meka nikasharaifono ã ato chaka soaxotiro efe yora inõfo.

¹⁹ Nakai yora fetsafo fe feratenãxima. Meka mitsisipato ato yoima.

²⁰ Akka tafa kerexma ã xatexima. Askatari chii ketesharayamaito ã nokafaxima. Askatamaroko ã ketefaxii. Nãskarifikĩ yorafãfe ãfe meka nikapafifikĩ nikasharayamaifono ã ato potaima. Ato potatamaroko ã ato axosharai ea Ifo sharafanõfo.

²¹ Nãskakẽ keyokõi maitio ano ikafãfe yoixikani iskafakakĩ: “Nã fistichi noko ifitiro nõ aõnoax Epa Nios fe nĩpaxanõ,” ixõ yoixikani. Nãskara Isaías yoikĩ kirikaki keneni. Nãskarakõi nõ õi Isaías keneni.

Yora fetsafãfe, “Jesús niafakaõxõ ato sharafaira,” fanifo

(Mr. 3.20-30; Lc. 11.14-23; 12.10)

²² Askata Jesúski feronãfake fẽxo efenifo. Askatari mekamisma ini. A mẽra niafaka chaka

naneano Jesús sharafanō akiki efenifo. Nāskakē Jesús a fēxo ōimasharani, askatari mekamasharani anā mekanō.

²³ Askafaito ōikani yoinānifo: “¡Kee! Ōikapo. Jesús afama mīshti shara fatiro. Akka, ¿namē David āfe fena nā Epa Niospa katonī, nāmē na nō manai?” ikax yoinānifo.

²⁴ Askafaifāfe nikakaxō fariseofāfe yoinifo: “Maa. Natokai Epa Niosxō niafaka chaka potatiroma. Akka nā niafaka chakafāfe āto xanīfo nā Beelzebúxō ato makinoa niafaka chaka potai,” ikax yoinānifo.

²⁵ Askafaifono Jesús tāpini a shināifo keskara. Nāskaxō ato yoini: “Yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofo.

²⁶ Nāskarifiakī Satanás āfe niafaka chakafo potaxō anā afaa afeska fatiroma.

²⁷ Akka mā ea iskafai: ‘Nato niafaka xanīfoōxō niafaka chakafo ato makinoa potai,’ mā ea fai. Akka ea yoikapo, ¿tsōaōxō mātō inafāfe niafaka chakafo potafomakī? Akka, ‘Niosxō nōko inafāfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino.

²⁸ Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafāfe ea Ifo sharafaxii.

²⁹ “Ē anā mato yoinō, nikasharakāfe. Akka, ¿afeskaxō yorafāfe feronāfake mitsisipakōi āfe pexe kene mēranoa āfe rapatifo fīatirofomē? Akka rapati

fīakakī achixō metexkere akaxō āfe rapati fīatirofo. Askafakaxō fīaifonokai ato afeska fatiroma.

³⁰ “Akka fetsa efe rafepaikima ea nikakaspai. Akka fētsa ēfe meka nikakaspai ea noikaspai. Nāskakē fetsafāferi ea Ifofaifono fichikaspakani. Askakimaroko emakinoa ato paxkanāfapai Epa Nios Ifofayamanōfo.

³¹ “Nāskakē ē mato yoi. Fētsa afara fetsafo chakafakē Niospa āfe chaka soaxotiro. Askatari fētsa afara chaka yoiaino Niospa āfe chaka soaxotiro. Akka ēfe Yōshi Shara chakafakī mekafaito, Niospa āfe chaka soaxonakama. Āto chaka neepakenaka.

³² Askatari fētsa Niospa Fake yorakōi chakafaino Epa Niospa āfe chaka soaxotiro. Akka fētsa Epa Niospa Yōshi Shara mekafakī chakafaino, Epa Niospa āfe chaka soaxonakama. Āto chaka neepakenaka. Nā naitīari āfe chaka aō neepakenaka,” ixō Jesús ato yoini.

*Ifi āfe fimioxō nō tāpitiro afe keskaramākī
(Lc. 6.43-45)*

³³ Anā Jesús ato yoini iskafakī: “Akka shinākapo. Ifi shara āfe fimi sharakōi itiro. Akka ifi chaka āfe fimiri chaka itiro. Ififo āfe fimioxō nō tāpitiro afe keskaramākī.

³⁴ Akka māfi keyokōi chakakōi, nā rono pae keskarakōi mā. Nāskaxō meka shara mā yoitiro ma māmāi chakakōixō. Nā mātō shināmā mā shināi keskafakī chakai mā mekamis.

³⁵ Nāskarifikī yora sharapa meka shara yoitiro, āfe ōiti mēraxomāi shara shinākī. Akka yora chakapari meka chaka yoitiro, āfe ōiti mēraxomāi chaka

shinākī. Nāskaxō nā āfe ōiti mēraxō shināi keskara yoitiro.

³⁶ Akka ě mato yoinō. Fatora penata keyokōi Niospa ato ichanāfai tāpikōixō ato yoixiki fatofāfe chanīmara faafomākī, akka fatofāferi nikakaspakanimākī. Nāskatari nā shinātama chaka yoimisfori Niospa ato shināmaxii kiki.

³⁷ Akka mā mātō mekaoxō mā Nios ispatiro mā isharamākī, askayamai mā isharamamākī. Nāskax isharax mā afe nipanaka. Askatari mā meka chaka yoimisno nā omiskōipakenakafo mēra mato potaxii. Mātō mekapa mato omiskōimaxii,” ixō Jesús ato yoini.

Yora chakafāfe, “Tsōa atiroma keskara noko ispafe nō mia chanīmara fanō,” ixō yōkanifo

(Mr. 8.12; Lc. 11.29-32)

³⁸ Askata fariseofo feta a Moisés yoikī kirika kenei keskara ato tāpimamisfāfe Jesús iskafanifo: “Maestro, nō ōipai tsōa atiroma keskara mī faito,” ixō yoinifo.

³⁹ Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiroma keskara noko ispafe,’ mā ea fai. Akka nā Jonás ini keskara nā fisti mā ōixii.

⁴⁰ Akka nā Jonás ini keskai ěri askai. Jonás fafīnōa xaki mēra tres nia ini. Nāskarifiai ěri mai mēra maiax tres nia ixii.

⁴¹ Akka fatora penata nā Niospa yorafo keyokōi ichanāfaitīa ato yoixii fatofāfe chanīmara faafomākī, akka fatofāferi nikakaspakanimākai. Nāskakē nā Nínive anoafāfe mato yoixikani iskafakakī: ‘Jonáspa noko Niospa meka yoiaito

nikaxõ nõko chaka xatexõ nõ Niospa meka chanĩmara fani. Akka mã Niospa Fake nikafikĩ mãto chaka mã xatemisma,' ixõ mato yoixikani. Akka ẽ Jonás finõfekẽkai mã ea nikapaimisma.

⁴² Askatari okirinoax nã nafa kẽro ãto xanĩfo ipaoni nõko xanĩfo Salomón õipai chai inoaxkõi oni. Afara sharafo tãpikõia nikaferani oni. 'Afara shara ea tãpimanõ,' ikax akiki oni. Akka ẽ nã Salomón ẽ finõfekẽ, mãkai ea nikapaima. Akka keyokõi mã mai keyoano Niospa noko yoixii fatofomãkĩ sharafo fatoforimãkĩ nikayospafo. Askatari nã kẽromã mato yoixii iskafakĩ: 'Mãfi chakakõifokĩ. ¿Afeskakĩ mã Niospa Fake nikakaspamismẽ? Mãto xanĩfo Salomón tãpikõia keskafakĩ nãato keyokõi tãpikõifiano. Akka ẽ Salomón nikaikai chaikõi ẽ kani. Akka mãkai nã Jesús mato fe ifiakẽ mã nikakaspamis nãato tãpikõifekẽ,' ixõ mato yoixii," ixõ Jesús ato yoini.

*Anã niafaka chaka yoraki nanetiro
(Lc. 11.24-26)*

⁴³⁻⁴⁴ Anã Jesús ato yoini iskafakĩ: "Ë mato yoinõ meka fetsafaxõ. Niafaka chaka feronãfake makinoax tsekeax kafãsatiro tsõa istoma ano fenafofãfõfãitiro ano tsoaxõ tenepaikĩ. Akka tsoa fichixoma niafaka chakata anã shinãtiro: 'A ẽ anoax tsekeita ano ẽ anã kapai,' itiro. Mã nokoxõ õia nã feronãfake nã pexe xaka mãtsomea keskara shara ini.

⁴⁵ Nãskakẽ nã nãafaka afe niafaka siete efetiro nã chaka finakõiafo, nãfo nã feronãfake mẽra iki fetsenõ. Nãskakẽ nã feronãfake chaka finakõi itiro a iypaoni keskarama," ixõ Jesús ato yoini.

*Jesús õifekani ãfe afanõ ãfe extonõ fenifo
(Mr. 3.31-35; Lc. 8.19-21)*

⁴⁶ Jesús yorafo yoiaino ãfe afanõ ãfe extonõ akiki fenifo afe mekapaikani, pexe emãiti nikaxõ mananifo.

⁴⁷ Fẽtsa yoini: “Mĩ efanõ mĩ extonõ emãiti niafo mefe mekapaikani,” fani.

⁴⁸ Askafaino kemakĩ: “¿Fatomẽ ãfe efa keskarrafo ãfe exto keskarafori?” ato fani.

⁴⁹ Nãskata a aõxõ tãpimisfo yoini mẽtoxõ: “Nafu ãfe efafo keskarrafo, ãfe exto keskarafori ã ato õi.

⁵⁰ Akka nã ãfe Epa nai mẽra ikato ato amapaiyai keskara akaifo nãfofi ãfe extofo ãfe chikofori ãfe efafori,” ixõ Jesús ato yoini.

13

*Jesús ato yoini meka fetsafaxõ fimi exe saamis-
noa*

(Mr. 4.1-9; Lc. 8.4-8)

¹ Askata na pena fisti Jesús pexe mẽranoax tsekekaini kaax, ãamãfã kesemẽ tsaoni.

² Nãno tsaono yorafã rasi akiki fenifo, ãfe meka nikai fekani. Akka Jesús kanõanãfã xaki mẽra tsaõxõ ato yoiaino nikanifo, ãamãfã kesemẽxõ.

³ Askata meka fetsafaxõ afama mĩshti Jesús ato yoini iskafakĩ: “Feronãfake fistichi fimi exe saafoni ãfe nõxati mẽra kẽchoxõ fokĩ.

⁴ Fimi exe saafokaino ranãri fai nẽxpakĩa pakeaino a kachikirixori peyafãfe pini.

⁵ Nãskata fimi exe ranãri makexfoki pakei fetseni mai shara anoma. Nãskakẽ samamakõi fimi exe foaipaini.

⁶ Akka mǎ foaipaiyaito xinĩ namani, yosipanǎ, ǎfe tapokairoko mai mēra kasharakē. Foaikax, samama nani xinĩ tsasifaano.

⁷ Ranǎri fimi exefo moxafo mēra pakei fetseni. Moxafo mēranoax moxafoya foaipaiyaito mox-afǎfe namani.

⁸ Akka fimi exe ranǎri mai shara ano pakeni. Nǎskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini.

⁹ Mǎ pachoyakĩ ea nikasharakōikǎfe,” ato fani.

Meka fetsafaxō yorafo yoixō a aōxō tāpimisfo xafakĩakōi ato yoini

(Mr. 4.10-12; Lc. 8.9-10)

¹⁰ Nǎskata Jesúski a aōxō tāpimisfo fēkaxō yōkanifo: “¿Afeskakĩ meka fetsafaxō mĩ yorafo yoimē? Meka xafakĩa mĩ ato yoimisma,” ixō yōkanifo.

¹¹ Askafaifǎfe Jesús ato kemani: “Akka afeskaxō Epa Niospa afe yorafo ĩkinǎmakĩ ě mato fisti tāpimanō.

¹² Akka nǎ Niospa meka nikasharakōiaifo ǎfe Yōshi Shara āto mēra naneano nǎato ato tāpimasharakōixii kiki. Nǎskaxō mǎ tāpikĩ finasharakōi. Akka nǎ nikasharayamaifǎfe tāpisharakanamax nǎfo fenokōixikani.

¹³ Nǎskakē meka fetsafaxō ě ato yoi. Akka ōifikakĩ tāpikanima. Askatari nikafikakĩ nikasharakanima.

¹⁴ Nǎnori a Niospa meka yoimisto Isaías kirika keneni a inōpokoai yoikĩ. Iskafakĩ yoini:

Nikataifafiafikakĩ nikakanima. Ōifikakĩ tāpikanima.

¹⁵ Nǎ yorafo āto mapo kerexkōifo. Askatari āto pachō fēstokōifo. Askatari āto fero fepoa

keskarafo. Nāskaxō ēfe meka chanĩmara fakanima. Nāskakē ē āto chaka soaxotiroma, ixō Niospa yoini keskara Isaías kirika keneni.

¹⁶ “Akka mā kai ato keskarama. Ē mato yoia keskara mā nikasharamis. Ē mato tāpimanai keskara mā tāpisharakōia.

¹⁷ Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifikakī ōipaonifoma. A ē mato yoimis keskara nikasharapaifikakī nikapaonifoma,” ixō Jesús ato yoini.

Jesús meka fetsafaxō fimi exe saamisnoa ato yoini ato tāpimasharakōixiki

(Mr. 4.13-20; Lc. 8.11-15)

¹⁸ Anā Jesús ato yoini iskafakī: “Nā ē mato meka fetsafaxō yoiai nā fimi exe saamisfoōnoa ē mato yoikai. Nikasharakāfe tāpixikakī.

¹⁹ Atiri fimi exe fai kesemē pakeaino peyafāfe pinifo. Nāskafakīri fētsa Nios Xanīfoōnoa nikafikī Niospa meka nikasharayamaito, nā Satanás chakata Niospa meka fīatiro.

²⁰⁻²¹ Akka atiri fimi exe makex mēra pakeax, foaipai fiaito xinī namani, āfe tapo mai mēra ikikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiroma, anā Nios Ifofayamaino Niospa meka anā āfe shinā mēra nanetiroma.

²² Akka atiri fimi exe moxafo mēranoax foaikax yosinima. Nāskari fakī fētsa Niospa meka nikasharamax, nāskaxō afara fetsa shinākī, āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimatiro,’ ixō shinākī Niospa meka anā shināima. Nāskakē

Niospa meka nikafikĩ afara fetsafo shinãino, afaa Niospa axotiroma.

²³ Akka atiri fimi exe mai shara anoax foaikax mã yosiāx fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakĩri fētsa Niospa meka nikakōikĩ Niospa meka nanexō nikasharakōitiro. Akka fētsa Niospa meka nikakōisharakĩ nã fimi exe cien keskara itiro, fētsari nikasharakōi nã fimi exe sesenta keskara itiro, fētsari nikakōisharakĩ nã fimi exe treinta keskara itiro,” ixō Jesús ato yoini.

Meka fetsafaxō afara fetsa ato tãpimaxiki anã Jesús ato yoini

²⁴ Anã Jesús meka fetsafaxō afara fetsa ato tãpimaxii ato yoini iskafakĩ: “Ē mato yoinō nã Nios xanĩfokōi ika anoax afe keskara ixikanimākai. Ifokōi faafo afe keskaramākĩ ě mato anã yoinō. Nã yorafāfe Nios Ifokōi faafāfe fimi exe shara fana keskarafo.

²⁵ Akka tare ifo āfe inafō fe oxano, a ato noikaspamis fakishi kaxō a fana shara ano fana chakafanafaini kani.

²⁶ Akka nã fana shara foaikĩ pei sharayakōi foaini. Askatari fana chakari foaini.

²⁷ Nāskata a tare ifoki āfe inafō fokaxō yoinifo: ‘Ifo, fana shara mĩ tarepa mĩ fanafiano, akka, ¿fanāx na fana chaka foaikamē?’ ixō yōkanifo.

²⁸ “Askafaifono nã tare ifāfe ato yoini: ‘Nã noko noikaspamisfāfe fanafo rakikĩa,’ ato feito āfe inafāfe yoinifo: ‘¿Na fana chaka nō tsekatiromē?’ fanifo.

²⁹ Akka a tare ifāfe ato yoini iskafakĩ: ‘Maa, fana chaka tsekapaikĩ fana sharari mã tsekatiro.

³⁰ Nāskanōki. Nā fana sharafoya yosiyonō nā fana shara āfe fimi topiaifotīa, ē mato yoixinō iskafakī: “Na fana chakafo xatekāfe. Xatexō mextexō koaxikaki. Nāskata nā fana sharafos ēfe tapas mēra ea faxoxikakī,” ’ ixō a tare ifāfe ato yoitiro keskafakī, nāskarifikakī Epa Niospa mato paxkanāfaxii ea Ifofaafō ē ato ifixii. Akka ea Ifofayamafo chiifā mēra ē ato nīchixii,” Jesús ato fani.

Mostaza exeōnoa yoikī meka fetsafaxō Jesús ato tāpimani

(Mr. 4.30-32; Lc. 13.18-19)

³¹⁻³² Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko ikinā ē mato yoinō. Nā fimi exe mostaza yōra āfe tarepa fanatiro. Akka nā mostaza exe pish-takōi. Akka mā yosiax efapakōi itiro fana fetsafo keskarama. Nāskakē peyafāfe āfe teshpafo ano naa faxō too fatiro. Nāskari fakī taefakī pishta mā Epa Nios Ifofayotiro. Nāskaxō fisti rasichi mā Ifofayotiro. Akka chipo ichapakōichi atirofo Nios Ifofakakī,” ixō ato yoini.

Meka fetsafaxō pāa faraxika keskaraōnoa Jesús ato yoini

(Lc. 13.20-21)

³³ Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko ikinā ē mato yoinō. Nā kēromā pāa fakī levaduraya arinā osixō kamosakano faraxitiro keskara. Nāskarifiakī nō ōitiroma. Yorafāfe Niospa meka āto shinā mēra naneano nō ōiyamafiaino āto ōiti fetsafakanax Nios keskara shara itirofo,” ixō Jesús ato yoini.

Afama m̄shtikiri yoikĩ meka fetsafaxõ Jesús ato yoipaoni

(Mr. 4.33-34)

³⁴ Askatari Jesús nã yorafã rasi yoini meka fet-safaxõ afara fetsa ato tãpimaxii. Akka meka fet-safaxõ Jesús m̄xotaima ato yoipaoni.

³⁵ Akka nã Niospa meka yoimisto a inõpokoai yoikĩ kirika kenekĩ keskakõifakĩ Jesús nãskakõi fani. Iskafakĩ keneni Jesúsnoa yoikĩ:

È ato meka fetsafaxõ yoixii. Niospa keyokõi onifanitĩa nãskatari a nikamifoma ã ato tãpimaxii,
ixõ Jesúsnoa yoikĩ keneni.

Jesús nã fana chakafoõnoa ato tãpimani

³⁶ Askata yorafã rasi makinoax Jesús pexe m̄era ikikaini. Mã pexe m̄era kaano, aõxõ tãpimisfãfe anã yõkanifo ato yoisharanõ. “Ifo, meka fetsafaxõ mĩ noko yoia nã fana chakaõnoa nõ tãpiama. Anã noko xafakĩa yoife nõ tãpisharanõ,” ixõ yoinifo.

³⁷ Askafaifono Jesús ato kemani: “A fana shara fanamisfo keskara ãkĩa,” ato fani.

³⁸ “Akka a tare ã yoiai mã tãpitiro nã maitio ã yoi. Akka nã fimi exe shara ã yoiai nã Nios Ifofamisfo ã yoi. Akka nã fana chakafo ã yoiai nã Satanás ifofamisfo ã yoi.

³⁹ Akka nã noko noikaspamisto fimi chakafana ã yoiai, a Satanás ã yoi. Akka nã fimi exe topiaifo ã yoiaito mã nikai, mã mai keyoaino ã yoi. Akka a fimi exe topimisfo ã yoiaito mã nikai, nã Niospa ãfe ãjirifo ã yoi.

40 Nã fana chakafo xatekaxõ chĩ koatirofo keskai, nãskarifiakani nã omiskõiai nokoaitia omiskõixikani mã mai keyoaino.

41-42 Nãskarifikã ěfe ģjirifo ě nĩchixii a afara ato chakafamamisfoya a afara chaka tãpimisfori ato chii xoisai mĕra ato potanõfo anoax oiayanã omiskõipakexanõfo.

43 Akka nã Niospa meka nikasharakõiaifo, Epa Nios ika anoax nã xinĩ chaxai keskara shara ixikani. Mã pachoyakĩ ěfe meka nikasharakĩ mãto shinã mĕra nanekãfe,” ato fani.

*Afara sharakõi oneaõnoa yoikĩ meka fetsafaxõ
Jesús ato tãpimani*

44 Anã Jesús ato yoini iskafakĩ: “Ě mato yoinõ nã Nios xanĩfokõi ika anoax afe keskara ixikanimãkai. Feronãfãke tare ano yonokĩ orokĩ afara sharafinakõia fichixõ nã fichia ano anã oneni. Nãskaxõ ģfe afama mĩshti keyokõi ato minixõ mã kori fixõ nã mai fini nã afara sharakõi ģfenã inõ. Nãskarifiakĩ mã Nios Ifokõifapaikĩ mã fichikõipaitiro,” ixõ Jesús ato yoini.

*Makex oxo fakkai fakkaisai keskaraõnoa ģfe ane
perlaõnoa, meka fetsafaxõ Jesús ato tãpimani*

45-46 Anã Jesús ato yoini iskafakĩ: “Ě mato yoinõ nã Nios xanĩfokõi ika anoax afe keskara ixikanimãkai. Yora fistichi fenafofãfofãimis perla ato inãxii. Akka nã perla sharafinakõia mã fichixõ ģfe afama mĩshti keyokõi ato minixõ kori fixõ nã perla sharakõi fini. Nãskarifiakĩ nõ Epa Nios Ifofasharapaikĩ nõko afama mĩshtifo nõ shinãmakitiro Epa Niosmãi sharafinakõikĕ,” ixõ Jesús ato yoini.

Anã meka fetsafaxõ riniõnoa Jesús ato tãpimani

47 Anã Jesús ato yoini iskafakī: “Ē mato yoinō nã Nios xanīfokōi ika anoax afe keskara ixikanimākai. Nã rini faka mēra potexō foe fetsa fetsatapafo fitirofo keskara ixikani.

48 Akka nã rini mā foe fospikōiano, nã rinipa fimisfāfe faka ketokonō rini ninifotirofo. Faka ketokonō tsoxō foefo katotirofo. Nã sharafo fēta mēra nanekaxō nã chakafo potatirofo.

49 Nāskarifiaxii nōko mai keyoaino. Nāskatari Niospa āfe ājirifāfe noko paxkanā faxii nã chakafoya nã sharafo.

50 Akka nã chakafo nã chii xoisai mēra ato potaxii. Nānoax oiayanā omiskōipakenakafo,” ato fani.

Afara fena sharakōi yafi afara shara xiniōnoa Jesús ato yoini

51 Nāskaxō Jesús ato yōkani: “¿Nã ě mato yoiai keskara mā mā nikaimē?” ato faito, “Ēje, a mī noko yoiai nō nikai,” faifono anã Jesús ato yoini:

52 “Akka pexe ifāfe pexe xaki mēra āfe afara shara onekatsaxakī nã fena yafi nã xini ato ispatiro. Nāskarifiakī a Moisés yoikī kirika keneni keskara ato tāpimamisfāfe mā Nios Ifokōi faifono, Nios xanīfoōnoa ato yoitirofo. Akka meka xiniōxō meka fena sharari mā tāpitiro,” ato fani.

Jesús Nazarete anoxō nikakaspanifo

(Mr. 6.1-6; Lc. 4.16-30)

53 Askata Jesús mā meka fetsafaxō ato yoikī keyoax nānoax kani.

54 Mā kaax āfe mai anokōi nokoni. A judeofāfe āto ichanāti pexe mēraxō ato yoikī tae-fani ano. Nānoxō yorafāfe iskafanifo: “¿Kee, nikakapo! ¿Fanīxō iskara tāpixō yoimē askatari nã

tsõa atiroma keskara fai? ¿Fanĩxõ iskara tãpiamẽ?” fanifo.

⁵⁵ “Nã mĩsa famisto fakeki. ãfe afa María. ãfe extofo mã nõ õimis. Santiago ikaino, José ikaino, Simón ikaino, Judas ikaino, nãfo ãfe extofo,” fanifo.

⁵⁶ “ãfe poiפורi nofe imisfo. Nõfi Jesús tãpia. Nãkai afama. Akka, ¿afeskaxõ afama mĩshti fatiromẽ?” ikax yoinãnifo.

⁵⁷ Nãskakẽ nikakaspanifo. Akka Jesús ato yoini iskafakĩ: “Keyokõi nã maitio anoxõ Niospa meka yoimis nikatirofo. Akka nã ãfe maikõi anoxõ nikapaitirofoma. Nãskakẽ mã ea nikakaspamis,” ixõ ato yoini.

⁵⁸ Nãskakẽ anoxõ afama mĩshti ato õimanimã tsõakairoko nikaito.

14

Juan Maotista nani

(Mr. 6.14-29; Lc. 9.7-9)

¹⁻² Nãskatari Galilea anoa nã xanĩfo Herodes ini. A Jesús afama mĩshti faito nikaxõ ãfe inafõ yoini iskafakĩ: “Akka nã Juan Maotista ã ato textemayameã mã anã otoa. Mã otoxõ tsõa atiroma keskara afama mĩshtifo fai,” ixõ shinãni.

³⁻⁴ Akka Herodes Juan reteyoamano Juan yõani iskafakĩ: “Xanĩfo Herodes, mĩ exto Felipe mĩ ãfe ãfi Herodías mĩ fĩa. Askara chakakõi,” nãskafani. Nãskakẽ Herodes akiki õitifishkini. Nãskaxõ ãfe sorarofo achimani karaxa mẽra ikimaxii.

⁵ Akka Herodes Juan retepaifi yorafoki meseni yorafãfemãi chanĩmara faifono Juanmãi Niospa meka ato yoimiskẽ. Nãskakẽ Herodes shinãni

iskafakī: “Ē Juan reteskē eari yorafāfe retetirofo,” ixō shināni.

⁶⁻⁷ Akka Herodes āfe cumpleaño ikaino, yorafa ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi, “Mī afara fichipaiyai keskara ea yōkafe ē mia inānō,” ixō yoini.

⁸ Nāskakē nā kēro xomayato āfe afa ano kaxō yōkani iskafakī: “¿Ē afaa Herodes yōkatirōmē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfe fafe,” fani.

⁹ Askafaito nikai xanīfo Herodes shināmitsani. Shināmitsayanā āfe shinā mēraxō shināni iskafakī: “¡Ooa! Ē Juan ato textemapaima. Akka yorafāfe nikaifono mē na kēro xomaya yoia. Nāskakē ē Juan ato textemapaiyamafikī ē ato textemani,” ixō shināni.

¹⁰ Nāskaxō xanīfāfe āfe sorarofō yoini: “Juan textexō āfe mapo ea fixotakāfe,” ixō yoini.

¹¹ Ato askafaino fōkaxō sorarofāfe Juan textekaxō āfe mapo sapaki ratakaxō fenifo. Fēkaxō nā kēro xomaya inānifo. Nāatori āfe afa ināni.

¹² Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

Jesús cinco mil feronāfakefo ato pimani
(Mr. 6.30-44; Lc. 9.10-17; Jn. 6.1-14)

¹³ Askata Herodes sorarofō Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo.

14 Mã kanõanãfã makinoax fotoxõ akiki yorafã rasi foaito fichini. Ato õikĩ ato shinãkõini. Nãskaxõ a isinĩ ikaifo ato sharafapani.

15 Mã yãtapakeaino aõxõ tãpimisfo akiki nokokaxõ yoinifo: “Mã yãtapakei kiki nono afaamakĩ yorafo nĩchife a piaifo fitanõfo pexe rasi anoafõ,” ixõ yoinifo.

16 Askafaifono Jesús ato kemani: “Maa. Fokan-ima kiki. Mãroko ato pimakãfe,” ato faito,

17 kemanifo: “Nõ nono cinco pãaya, askatari foe rafes,” fanifo.

18 Askafaifono Jesús ato yoini: “Ea fixotakãfe,” ato fani.

19 Nãskaxõ yorafã rasi yoini fasi ano tsaonõfo. Askata foe rafe yafi cinco pãa tsofaxõ nai fois-inĩfõfã Apa Nios kĩfini iskafakĩ: “Aicho, Epa, mĩõxõ ã ato pimai. Mĩ sharakõi,” fata, pãa kaxketa foe rafeya osixõ aõxõ tãpimisfo inãni a yorafo ato inãketsanõfo.

20 Nãskax pikanax mãyakõinifo. Akka nã chete-faafõ doce fẽta fospini.

21 Nã piaifo cinco mil feronãfakefos ini. Kẽrofãferi fakefo feta pinifo.

Jesús ãamãfã femãkã kani
(Mr. 6.45-52; Jn. 6.16-21)

22 Mã cinco mil yorafo pimata Jesús aõxõ tãpimisfo yoini iskafakĩ: “Kanõanãfãnẽ nanekãfe, okiri ãamãfã pokefaitaxikãkĩ,” ixõ ato yoini. Jesús kayoxoma yorafo nĩchiaino aõxõ tãpimisfo fonifo.

23 Mã yorafo nĩchita, mãchi keya ari arese kani arixõ Apa Nios kĩfikai. Mã fakishaino, ares fisti ano ini.

24 Akka a aõxõ täpimisfo kanõanãfãnẽ mã chai foafono, nêfefaino ãamãfã poikĩ ato katimafani.

25 Akka mã penaino Jesús ãa femãkãa atoki kaito tsõa täpinima.

26 Nãskata täpikanamax aõxõ täpimisfo Jesús ãamãfã femãkãa kaito fichikanax tai tai iyanã ratekõinifo, niafakara ikanax.

27 Askaifono Jesús ato yoini: “Rateyamakãfe, êki,” ato fani.

28 Ato askafaino Pedro kemani: “Ifo, mĩmãkĩ eari kenafe êri ãamãfã femãkãa kanõ mia ari,” Pedro fani.

29 “Ofe,” Jesús fani. Nãskakẽ Pedro kanõanãfã makinoax fotopakekafã ãamãfã femãkãa Jesús ari kani.

30 Kapaifi nefeaito õi nefe kerexkõi mei mesekõini. Nãskakẽ ãamãfã mẽra ikipakekafakĩ fãsikõi kenani: “¡Ifo, ea ifife!” fani.

31 Askaito Jesús koshikõi ãfe mẽke achixõ yoini: “Mĩkai ea chanĩmara fasharama. ¿Afeskakĩ mã chanĩmara faimamẽ?” ixõ Jesús yoini.

32 Askata nã rafe kanõanãfã mẽra naneinĩfofanaifono nefe nishpatani.

33 Nãskakẽ nã kanõanãfã mẽra naneafãfe Jesús nãmã ratokonõ mai chachipakefofã yoinifo: “Chanĩma, mĩfi Niospa Fakeki,” ixõ yoinifo.

Jesús Genesaret anoafo a isinĩ ikaifo ato sharafani

(Mr. 6.53-56)

34 Akka ãamãfã pokefaikani Genesaret mai ano nokonifo.

35 Nãskata nã ano ikafãfe yorafãfe Jesús täpirisafanifo. Nãskakẽ nã chai ikafori ato yoinifo

akairi tãpinõfo. Nãskakẽ a isinĩ ikaifo Jesúski efenifo.

³⁶ Nãskakẽ Jesús yõkanifo: “¿Nõ mia tari kexa maikiri pishta ramãkatiromẽ nõ sharaxiki?” fanifo. Nãskakẽ Jesús tari ramãkanax sharai fetsenifo.

15

Jesús ato yoini afeskai yorafo chakafomakĩ

(Mr. 7.1-23)

¹ Askata fariseofo fe a Moisés yoikĩ kirika keneni keskara ato tãpimamisfo Jerusalén anoax Jesúski fẽkaxõ yõkanifo:

² “¿Afeskai na mĩõxõ tãpimisfo a nõko xinifo ipaonifo keskakanimamẽ? Akka a nõko xinifãfe yoinifo keskara tãpifikaxõ pixikakĩ mechokomek-eranafo,” ixõ yoiaifãfe Jesús ato kemani:

³ “Akka, ¿afeskakĩ mãri mãto xinifo ipaonifo keskara mã tanapaimẽ? Nãskaxõ a Niospa yoini keskara mã nikatama mã mãto xinifãfe yoimisfo keskara mã nikamis.

⁴ Akka Epa Niospa yoikĩ iskafani: ‘Mãto epa yafi mãto efa nikasharakãfe. Akka a ãto apa yafi ãto afa chakafaifo ato retemakãfe,’ ixõ Niospa yoini.

⁵⁻⁶ Nãnori Niospa yoifinikẽ mãfi ato mẽstekõi nofe yorafo mã ato tãpimamismaki. Akka mã ato yoimis iskafakĩ: ‘Mãto epa yafi mãto efa mã yoikĩ iskafatiro: “Epa, na kori ã mia inãkerana. Nãskafixõ mẽ kori keyoa ã Nios inãkĩ. Nãskakẽ ã mia anã afaa inãtiroma,” ixõ mã ato yoitiro. Nãskaxõ mãto epafo mã shinãmakĩa keskara mã itiro,’ ixõ mã ato yoimis parakĩ. Askafixõ mã ato tãpimasharamisma. A kirikaki yoikĩ Niospa meka kenenifo anori mã

yoimisma. Nã mãto xinifo ipaonifo keskara fisti mã tanamis. A Niospa yoini keskara mã akima.

⁷ Mãfi keparanãmiski. Matoõnoa yoikĩ Niospa meka yoimisto Isaías kirika kenei chanĩmakõi iskafakĩ:

⁸ Nã yorafãfe eõnoa yoisharafikakĩ ãto shinã mēraxõ ea shinãkõiafoma.

⁹ Æa kaxpa ichanãkanax fanãimisfo ea kĩfiyanã. A ato tãpimanaifo yorafãfe shinã keskarafõ. Akka askarakai Niospa shinãma, ixõ Isaías kenei, Niospa shinãmanaino.”

¹⁰ Nãskata Jesús yorafõ kenaxõ ato yoini iskafakĩ: “Ea nikasharakõikãfe tãpisharakõixikakĩ ã mato yoinõ.

¹¹ Na mã piato choshta keskara mato imatiroma. Askatamaroko yorafãfe ãto shinã mēraxõ chaka shinãkani, askatari chakai mekaifono choshta keskara Niospa ato õi,” Jesús ato fani.

¹² Askata aõxõ tãpimisfo fõkaxõ Jesús yõkanifo: “Ifo, ¿mĩ tãpimamẽ fariseofo õitifishkikani nã mĩ yoiãito nikakani?” ikaxõ yoinifo.

¹³ Askafaifono Jesús ato kemani meka fetsafaxõ: “Tare ifãfe afara chakafo fanatiroma. Askatamaroko a chaka foaikaino tsekaxõ potatiro. Nãskarifikã ãfe Epa nã nai mēra ikato afarafa fanayamaxõ, ãfe tapo tsekaxõ potaxii anã afaa inõma.

¹⁴ Akka fariseofo nikayamakãfe. Nã fẽxo keskarafoki. Akka fẽxo afe fẽxo iyopai xato mēra paketiro. Nãskarifiakĩ nã fariseofãfe Niospa meka tãpikaxoma fetsafo tãpimatirofoma. Nãskakẽ ato fe Nios ari nokotirofoma,” ixõ Jesús ato yoini.

¹⁵ Ato askafaito Pedro Jesús yoini: “A na mĩ yoia keskara meka fetsafaxõ noko yoisharafe nõ tãpisharanõ,” fani.

¹⁶ Askafaito Jesús kemani: “¿Afeskakĩ mãri mã nikasharaimamẽ?

¹⁷ Akka nõ afara piano nõko ato mẽranoax payokomeano nõ aya safatiro. Nãatokai mato chakana fatiroma.

¹⁸ Akka a mãto shinãmã shinãxõ mã afara chaka yoiaino nãato mato chakana fatiro.

¹⁹ Akka yorafãfe afara chakafakakĩ ãto shinã mẽraxõ chaka shinãtirofo, ato retetirofo, askatari ãto ãfima chotatirofo, askatari kẽro fetsa kaxefatirofo, askatari yometsotirofo, askatari chanãtirofo, askatari ato ïchatirofo.

²⁰ Akka mechokomexoma mã piaino Epa Niospa choshta keskara mato õima. Akka yorafãfe ãa shinãkaxõ afara chakafatirofo. Nãskakẽ Epa Niospa ato õi choshta keskara,” ixõ Jesús ato yoini.

*Xotofake judeoyamafixõ Jesús chanãmara fakõini
(Mr. 7.24-30)*

²¹ Askata Jesús aõxõ tãpimisfo fe kani nã pexe rasi Tiro fe Sidón chaimashta ano.

²² Askata kẽro fisti Canaán mai ano ikatsaxakĩ judeo kaifoma Jesús ano kani. Kaxõ fãsikõi yoikĩ kenani iskafakĩ: “Ifo, mĩ David fenaki, ea shinãfe. Ëfe fake xotofakeshta niafaka chakata omiskõimamiski,” ixõ yoini.

²³ Askafaito nikafikĩ Jesús kemanima. Nãskakẽ ãfe inafãfe fõkaxõ yoinifo: “Ifo, na kẽro yoife katanõ. Nocho okĩ noko fekaxtefafei kiki. Fãsikõi fiisiki kiki,” fanifo.

24 Askafaifono Jesús ato yoini: “Ĕfe Epa Niospa ea nĭchini judeofos ano, nāfo oveja fenoa keskarafō. Akka yora fetsafō ano ea nĭchinima,” ato askafani.

25 Akka nā kĕro Jesús nāmā ratokonō mai chachipakefōfāyanā iskafakĭ yoini: “Ifo, ĕfe fake ea sharafaxope,” fani.

26 Askafaino Jesús kemani meka fetsafaxō: “A fakefāfe piāi fĭaxō nō paxta inā, askarakai sharama,” fani.

27 Jesús askafaito nā kĕromā kemani: “Ĕje, Ifo. Akka paxtafāfe pitirofo a ifāfe piāi āfe potofō mĭsa nāmā keyo pakeaito,” fani.

28 Askafaito Jesús yoini nā kĕro: “Mĭ ea chanĭmara fakōini fetsafō keskarama. Akka nā mĭ ea yoiai keskara ĕ mia axonō,” ixō Jesús nā kĕro yoini. Askafaino āfe fake xotofake shararisatani.

Jesús yora ichapa sharafani

29 Askata Jesús anoax aōxō tāpimisfo fe kaax ĭa Galilea kesemĕ nokoni. Nāskata machi keya māpefainax tsaoni.

30 Nāno yorafā rasi akiki fenifo. Nā isinĭ imisfo akiki efenifo Jesús ato sharafanō. Fetsa chāto ini, fetsari fĕxo ini, fetsari mifi yōshia ini, fetsari mekamisma ini. Nāskakĕ fetsa fetsatapafo a isinĭ ikaifo Jesús keyokōi ato sharafani.

31 Ato sharafaino ōikani yorafo yoinānifo: “ĭKeel Ōikapo. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fĕxofāferi mā ōisharakani. Jesús afama mĭshti fatiro. Akka

nōfi israelifokī nōko Nios fāsi sharakōi,” ikanax yoinānifo.

Jesús cuatro mil feronāfakefo pimani
(Mr. 8.1-10)

³² Askata Jesús aōxō tāpimisfo kenaxō yoini: “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. Akka afaa pimaxoma āto pexe ano ě ato nīchiano fonāikani afaa pikanaxma fai nēxpakīa paketirofo,” ixō Jesús ato yoini.

³³ Akka ato askafaino aōxō tāpimisfāfe kemanifo: “Akka, ¿afeskaxō a nō piari nō fichitiromē na yorafo ato pimaxikī nono tsoa ikama?” fanifo.

³⁴ Askafaifono Jesús ato yōkani: “¿Afe tii mā pāayamē?” ato faito, “Siete pāa pishta, foe ichapamashtari,” fanifo.

³⁵ Nāskata nā yorafo nāmā tsaonōfo Jesús aōxō tāpimisfo ato yoini.

³⁶ Nāskata Jesús siete pāa yafi foeri tsomaxō Apa Nios kīfīni: “Aicho Epa, mīōxō ě ato pimaikai. Mī fāsi sharafinakōiaki,” fata, pāa kaxketa, foeri tekenāfaxō aōxō tāpimisfo ato ināni nā yorafā rasi ato miniketsanōfo.

³⁷ Nāskakē keyokōichi pikanax māyakōinifo. A pikī chetefaafo siete fēta fospikōia ini.

³⁸ Akka nā pāa piafo cuatro mil feronāfakefos inifo. Kērofāferi fakefofaxori ato feta pinifo.

³⁹ Nāskata Jesús yorafo yoini fōtanōfo āto pexe ano. Nāskata Jesús kanōanāfā mēra naneinākafani aōxō tāpimisfo fe. Mā naneinākafāta aōxō tāpimisfo fe mai fetsa ano kani, Magdala ano.

16

Fariseofo feta saduceofāfe, “Tsōa atiroma keskara noko ispafe nō mia chanīmara fanō,” ixō Jesús yōkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús ōifokani fonifo afara chakafamapaikani. Nāskakaxō yoinifo: “Mī Niospa Fakemākī tsōa atiroma keskara noko ispafe nō mia chanīmara fanō,” fanifo. Nāskakaxō Jesús afara chakafamapainifo.

² Askafaifono Jesús ato kemani: “Mā yātapakeaino xini iki sharapakekōikai, ‘Penama oi ikima,’ mā famis.

³ Akka mā penaino nai choshtakōi ōikī, ‘Oi iki kiki,’ mā famis. Akka nai choshtakēma ōikī, ‘Oi ikima,’ mā famis. Nai foiskī mā tāpitiro oi feyamai feima rakikīa mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō ōinō mā ea famis. Akka, ¿afeskakī mā tāpiamamē Epa Niospa noko ikīfiano?” ato askafani yoikī.

⁴ “Na yora chakafāfe ea chanīmara faafāfema ōipaikani ē Niosxō afara shara ē ato ispanō. Akka ē ato ōimanimā. Akka Jonás fafīnōfānē xeaitano fafīnōfānē xaki mēra tres nia ini. Nāskakē Niospa Jonás kāimani fafīnōfānē xāki mēranoax tsekeinō. Nāskakē a tsōa atiroma keskara ē mato ispaima,” ato fata ato makinoax Jesús kani.

“Fariseofo feta saduceofāfe anorima yoimifoki ato nikayamakāfe,” Jesús ato fani

(Mr. 8.14-21)

⁵ Nāskano Jesúsxō tāpimisfāfe okiri ĩamāfā pokefaini fōkakī a pui foaifo shināmakifainifo. Nāskakaxō shinānifo: “Kee, ĩnō afaa piikaimē? A nō piikai mā nō shināmakikerani,” ikanax yoinānifo.

⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “ĩAfeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

⁸ Akka mā tāpixō Jesús ato yoini: “ĩAfeskai nō pāayamara mā ikimē? Akka mā ea chanīmara fasharama,” ato fani.

⁹ “Mā kai ea tāpisharama. Akka, ĩmā shināimamē cinco pāa kaxkexō cinco mil feronāfakefo ē ato pimati? Akka, ĩafe tii fēta pāa fospia ikitamē?” ato fani.

¹⁰ “Askatari, ĩmā shināimamē nā siete pāa kaxkexō cuatro mil feronāfakefo ē ato pimati? Akka, ĩafe tii fēta texefafo mā fitamē?”

¹¹ Akka, ĩmā tāpīamamē pāanoa ē mato yoima? Nā fariseofoya saduceofoōnoa ē mato yoi,” Jesús ato fani.

¹² Nāskakē tāpinifo Jesús ato yoiaito. Akka nā pāa faraxitiōnoa Jesús ato yoinima. Nā fariseofāfe saduceofo feta ato anorima tāpimapaiyaito Jesús ato yoini.

*“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini
(Mr. 8.27-30; Lc. 9.18-21)*

13 Askata Jesús aõxõ tãpimisfo fe mai fetsa ari nokoni, Cesarea Filipino mai ano. Nãnoxõ aõxõ tãpimisfo yõkani iskafakĩ: “Yorafãfe, ¿afaa ea fakanimẽ ã tsoamẽ?” ato fani.

14 Ato askafaito kemanifo iskafakakĩ: “Fetsafãfe, ‘Juan Maotistara’ mia fakani. Fetsafãferi, ‘Elíasra’ mia fakani. Fetsafãferi mia iskafakani: ‘Nã Niospa meka ato yoimis nã Jeremiasã, askayamai nã Niospa meka ato yoimis fetsa rakikã,’ mia fakani,” fanifo aõxõ tãpimisfãfe.

15 “Akka, ¿mã, ea tsoara faimẽ?” ato faito, Pedro kemani iskafakĩ:

16 “Mĩfi Cristoki, nã Nios nĩpanakato Fakekõĩ,” fani.

17 Askafaito Jesús kemani iskafakĩ: “Simón, mĩfi Jonásra fakeki. Niospa mia noixõ mia sharafaxõa. Akka ã Niospa Fakekẽ tsõa mia tãpimanama. Ëfe Epa Niospa nã nai mẽra ikato ãa mia tãpimana.

18 Ë mia anã yoinõ. Mĩfi Pedroki,” ixõ Jesús yoini. Akka israeli mekapa Pedro Tokirinĩfã nõ fatiro. Tsõa tokiri efapa pĩtsi itiroma. Nãskaxõ Jesús anã yoikĩ iskafani: “Mĩ ea yoia: ‘Mĩ Cristo, nã Nios nĩpanakato Fakekõĩ,’ mĩ ea faa. Nã mĩ yoia keskaraõxõ fetsafãfe arifi chanĩmara faxikani. Nãskaiãfe efe yorafo ã ato imaxii. Nãskax ichanãxikani ea fanãkani ekeki inimakani. Yõshi chakafãfe Nios noikaspakakĩ ato namapayanã ato xatemapaifaifono tsoa xatetiroma. Nã ea Ifofaafo xatenakafoma ea fanãkani. Tokiri efapanãfã pĩtsikiki tsõa tararatiroma keskara ixikani.

19 Akka fẽtsa chamisi feputi fẽpetiro yorafo pexe mẽra ikimaxikĩ. Nãskarifiakĩ ã mia yoi mĩ yorafo eõnoa mĩ ato tãpimaxii ea Ifofanõfo. Akka mĩ ato

yoiaito nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimākī mī ato yoitiro: ‘Nā sharakōi mā atiro,’ ixō mī ato yoitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoitiro: ‘Na chaka mā atiroma.’ Nāskara mī yoiaino, Epa Niospari nā chaka ōitiro.”

²⁰ Nāskata Jesús aōxō tāpimisfo yoini: “Tsoa yoiyamakāfe ēfi Cristokī,” ato fani.

*“Chipo ea retexikani,” Jesús ato fani
(Mr. 8.31-9.1; Lc. 9.22-27)*

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafo-mano: “Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafiafono, tres nia oxata ē anā otoxii,” ixō ato yoini.

²² Askafaino Pedro Jesús ori iyoxō yoini iskafakī: “Ifo, askayamafe. Miakai retekanima kiki,” fani.

²³ Pedro askafaino Jesús texkeakekafāni. Nāskaxō iskafakī yoini: “Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi,” fani.

²⁴ Askafata Jesús aōxō tāpimisfo yoini: “Fatora fetsa ēfe inakōi ipaikī āakōi apaiyai keskara anā atiroma. Nā ē yoiai keskara nikakōitiro. Nāskakē iskatiro: ‘Ēfe Ifoxō ea retefiaifono ēkai ēfe Ifo ē potapakenakama,’ ixō shinātiro.

²⁵ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ĩpaxanō eamāi Ifofamiskē.

²⁶ Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mīshtifoya iyopaofinixakī nā omiskōipakenakafo mēra mā kaax anā aya itiroma. Nāskakē āfe afaraforikai Nios inātiroma afe ĩpaxakī.

²⁷ Akka ēfi Niospa Fakekī yorakōiri. Nāskakē sharafinakōia chaxapakefofāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii.

²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro,” ixō Jesús ato yoini.

17

Jesús āfe femānā fetsa keskara ini, fafekōini. Āfe rapatiri oxokōi ini

(Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyoni. Pedro iyota, Santiago iyota, Santiago āfe exto Juanri iyoni. Ranāri ato nīchifaini. Nāskaxō māchi keya māmākīa ato iyoini.

² Nānoax āto ferotaifi Jesús fetsa keskara ĩtani. Āfe femānā fafekōini xini keskara. Āfe rapatiri oxokōi itani oa luzpa chaxa keskara.

³ Nāskakē nānoa Moisés yafi Elías òinifo Jesús fe mekaifāfe.

⁴ Askaito Pedro Jesús yoini: “Ifo, sharakõi ano nõ oa. Akka, ¿mĩ fichipaimē ē tres tapas fanõ? Mia fetsafaxota, Moisés fetsafaxota, Elías fetsafaxota, ē fanõ,” ixõ Pedro yoini.

⁵ Akka Pedro askafaino kòinĩ ato keyokõi maipakefofāni. Nā kõi mēranoax Nios mekaito nikanifo iskaito: “Nafi ēfe Fakeki ē fichisharapaikõi. Ē akiki inimakõi. A nikakõikāfe,” ikaito nikanifo.

⁶ Nikakani Jesúsxõ tãpimisfo ratekõiyana feopakefofānifo.

⁷ Askaifono Jesús ato ano kaxõ ato ramāyanā ato yoini: “Finikāfe. Ratekakima,” ato fani.

⁸ Nāskakē foisinĩfofākakĩ anoa tsoa òinifoma, Jesús fisti nikē òinifo.

⁹ Nāskata machi keya ariax anā tisirimepakenifo mā fekani. Tisirimepakekĩ Jesús ato yoifeni: “A mā òia keskara mā tsoa yoiki. Ē naax mē anā otoano mā ato yoitiroki,” ixõ Jesús ato yoini.

¹⁰ Nāskakē a aõxõ tãpimisfāfe Jesús yõkanifo iskafakakĩ: “A Moisés yoikĩ kirika keneni keskara ato tãpimamisfāferi iskafakĩ yoinifo: ‘Cristo oyoa-mano Elías rekē oi taexii kiki,’ ixõ yoimisfo. Akka, ¿afeskakĩ iskara yoimē?” fanifo.

¹¹ Askafaifāfe Jesús ato kemani: “Chanĩma, Elías rekē oi taei nāato keyokõi itipinĩsharafaiyoi āto chaka xatenõfo.

¹² Akka ē mato yoinõ mā Elías ifana mākai tãpiama. Nāskakē nā apaiyai keskafakakĩ chakafanifo. Nāskarifikĩ ea omiskõimakani,” ixõ Jesús ato yoini.

13 Nāskakē aōxō tāpimisfāfe tāpinifo Juan Maotistaōnoa Jesús ato yoiaito.

*Jesús feronāfake naetapa niafaka chaka pōtaxoni
(Mr. 9.14-29; Lc. 9.37-43)*

14 Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefōfā Jesús yoini:

15 “Ifo, ēfe fake shināfe. Ēfe fake nīsoi omiskōimiski. Nāskakē chii naki pakeyanā faka mēra pakemiski.

16 Akka mī inafano ano ēfe fake ē efefekē mī inafāfe ēfe fake ea sharafaxomisfoma,” fani.

17 Askafaito Jesús kemani: “Ooa. Mākai ea tāpisharama. Mā afara shināmis. Akka afetiākai ē matoki onima. ¿Afetiākai mā ea tāpimē? Niri nā fake efekāfe,” Jesús ato fani.

18 Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

19 Nāskaxō aōxō tāpimisfāfe Jesús yōkanifo: “Akka, ¿afeskakīri nō niafaka yōshi chaka potatiromamē?” ixō yōkanifo.

20 Askafaifono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro.

21 Akka na keskara niafaka chaka mā foni tenekī Nios shinākī mā Epa Nios kīfiyanā mā potatiro,” ixō Jesús ato yoini.

*Anã Jesús ato yoini: “Chipo ea retexikani,” ixõ
(Mr. 9.30-32; Lc. 9.43-45)*

²²⁻²³ Askata aõxõ tãpimisfo fe Galilea ano ichanãxõ ato yoini: “Ea achikaxõ ãto xanĩfofo ano ea iyoxikani, afãfe ea retenõfo. Akka ea retefiafono tres nia oxata ã anã otoxii,” ixõ Jesús ato yoini. Ato askafaito nikakani aõxõ tãpimisfo shinãmitsakõinifo.

Nã Nios kĩfiti pexefã ano yonomisfãfe ato kori yõkanifo

²⁴ Askata Jesús aõxõ tãpimisfo fe Capernaúm ano nokoaino a Nios kĩfiti pexefã anoxõ ato kori fiamisfãfe Pedro õifokaxõ yõkanifo: “¿Mĩ Ifãfe kopi-faimamẽ na Nios kĩfiti pexefã nã ato kori fixomisfãfe?” Pedro fanifo.

²⁵ “Ëje, kopifai,” Pedro ato fani.

Askata Pedro pexe mẽra ikikainaito Jesús yoini iskafakĩ: “Simón, ¿afe keskara mĩ shinãimẽ? ¿Xanifãfe nã maitio anoa ãfe kaifo kori fĩaimẽ, askayamakĩ yora fetsafo ato fĩairaka?” ixõ Jesús Pedro yõkani.

²⁶ Askafaito Pedro kemani: “Yora fetsafo fĩatiro,” fani. “Ëje, chanĩma,” Jesús ini. “Akka ãfe kaifãfe kopifatiroma.

²⁷ Akka nokoki õitifishkiyamanõfo ãa ano kaxõ mĩshkimãtãfe. Nã mĩ fafĩ mĩshkimãna ãfe axfa mẽrañoa mĩ kori exe fichikai. Nãskakẽ nã Nios kĩfiti pexefã kori fixomisfo nõ ato kopifaikai,” ixõ Jesús Pedro yoini.

18

*“Akka, ¿tsoakaimẽ sharafinakõia?” inifo
(Mr. 9.33-37; Lc. 9.46-48)*

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini.

³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma.

⁴ Akka Nios Ifo sharakōi faax nā Nios nikakōiaifo fake yome keskarafo, askatari, ‘Nō tsoama,’ ixō shināifo nāskarafo sharafinakōiafo.

⁵ Akka fatora fētsa ēfe aneōxō na fake yome noikī nāatori ea noisharakōi,” ixō Jesús ato yoini.

Noko fētsa afara chakafamaino āfenā mesekōi itiro

(Mr. 9.42-48; Lc. 17.1-2)

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino ōikī, nā keskarafo ato achixō tokirinīfāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani.

⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka mātō mēkemā mato afara chakafamatiro, askayamākī mātō tāe mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota

keskara itaxikakĩ, oa m̃ato tae xateta pota keskara itaxikakĩ, oa m̃ato fero fetoshimea keskarakõi itaxikakĩ afaa m̃a chakafayamanõ. Akka m̃a m̃a m̃eke fisti potax anã afaa chakafayamai m̃a Epa Nios fe isharapakenakaki. Nã keskara sharakõi. Nã m̃ato m̃eke m̃a xateama keskaraxõ m̃a aõ chakafaino, nã omiskõipakenakafo m̃era m̃a kanaka ari chiifã nokanakama m̃era. Nã m̃atonã chaka finakõia ixii. Nãskatari m̃ato tae fisti xatea keskara m̃a sharafinakõia m̃a isharapakekõitiro. Nãskax, m̃a askayamaino nã omiskõipakenakafo m̃era m̃a ipanakaki ari chiifã nokanakama m̃era. Nãskatari m̃ato f̃ero chakafaino, m̃a fetoshimeax m̃a isharapakenakaki. M̃a askayamax fero rafeyax nã omiskõipakenakafo m̃era m̃a kaxii nã chiifã nokanakama m̃era,” ato askafani.

*Oveja fenoaõnoa Jesús meka fetsafaxõ ato yoini
(Lc. 15.3-7)*

¹⁰ Anã Jesús ato yoini iskafakĩ: “Nã rama ea Ifofaõnoa fakefo keskara shinãkĩ iskafayamakãfe: ‘Na rama Jesús Ifofaafokai afaafoma,’ ixõ yoiyamakãfe. Ë mato m̃estekõi yoinõ. Epa Niospa ãfe ãjirifãfe nã rama ea Ifofaafõ ato kexesharafafãimis. Nã ãjirifo Epa Nios fe imisfo. Nãskakẽ ãfe fakefo kexesharamis.

¹¹ Akka nã yorafo fenoafo ã ãto chaka soax-oniyoi ã oni isharapakexanõfo.

¹² “Akka, ¿afaa m̃a shinãimẽ? Feronãfake fetsa cien ovejaya itiro. Nãskakẽ fisti a makinoax fenoano nã noventa y nueve anã kãimatiroma nã fenoa fenakĩ.

13 Ĕ mato chanĩma yoinõ. Mã oveja fisti fichiax inimaifinakõitiro. Akka nã fenoamafoki inimatama nã fenoitaki mã fichiax inimaifinakõitiro.

14 Nãskarifiiai Epa Nios nã nai mēranoato nã rama Ifofaifo keyokõi ato noisharai ato õikĩ. Askatari tsoa pishta fenopaima ãfe fakefo,” ato fani.

Jesús chanĩmara faa fētsa mia chakafaito mĩ rae-fatiro

(Lc. 17.3)

15 Anã Jesús ato yoini iskafakĩ: “Akka meka fetsa ĕ mato yoinõ. Ea chanĩmara famis fētsa mia chakafakē mĩ yoitiro iskafakĩ: ‘Yamã, mĩ ea chakafaa,’ ixõ mĩ yoitiro. Mĩ askafaito mia nikaxõ, ‘Ĕje. Ea mĩa chakafa. Ea anã raefafe,’ ixõ mia yoiaito mĩ afe rae faatanãtiro.

16 Nã mĩ askafafaito mia nikakaspaito feronãfake fisti kenafe, askayamakĩ rafe kenafe nã rafetari nikanõfo mia chanĩmara faimãkai.

17 Nãskatari atori nikayamaito nã ea Ifofaafõ ichanãfo anoxõ ato yoife mia tãpinõfo. Nã ichanãfo anoxõ mĩ yoiaito mia nikayamaito mĩ iskafakĩ yoitiro: ‘Na feronãfãke Epa Nios Ifofafiax nã Nios Ifofaafoma keskara ika. Nãskatari nã ato pãraxõ ato kori fĩamisfo keskarakõi,’ ixõ mĩ yoitiro.

18 “Ĕ mato chanĩma yoi. Nã mã õiai fato sharakõimãkĩ mã ato yoitiro: ‘Nã sharakõi. Nãskara nõ atiro,’ ixõ ato yoitiro. Nãskara mã sharakõi õi Epa Niospari shara õi. Askata mã õikai fato chakamakĩ, mã ato yoitiro: ‘Na chaka. Nãskara nõ atiro,’ ixõ ato yoitiro. Nãskara mã õikĩ chakamakĩ, ‘Na chaka nõ atiro,’ ixõ mã yoiaino, Epa Niospari nã chaka õitiro.

19 “Askatari fetsari ě mato yoinō, ea nikakōikapo. Fatora mā rafeta nono mai anoxō mā shināsharaxō, mā Epa Nios afara yōkaiyanā mā kīfaiito ěfe Epa nai mēranoato mato afara ināsharaxii.

20 Akka rafe iyamakani tres yora ea shinākani eōnoax ichanākaxikani ěri ato fe ichanāxii,” ixō Jesús ato yoini.

21 Askata Pedro akiki kaxō Jesús yōkani: “¿Ifo, oato ea noikaspakī ea chakafamis, afe tii fakī ě yoitiromē ě raefaxiki? ¿Siete fakī ě yoitiromē?” faito,

22 Jesús kemani: “Maa. Siete fakī mī yoitiroma. Mēxotaima mī yoitiro,” fani.

Jesús anā meka fetsafaxō ato yoini feronāfake fētsa a afeta yonomis raefapainima

23 Anā Jesús ato yoini: “Nō Epa Nios Ifofaxō nō fetsafo raefatiro, Epa Niospa mato raefamis keskafakī. Nā ě mato yoiai keskara nikakapo mā tāpinō mā rae faatanāino. A xanīfāfe ato yonomamis kenani ato yoixii afe tii mā nimiamakī.

24 Xanīfāfe taefakī afe rafea kenani ichapakōi nimiano.

25 Akka a nimia koriya inima afaa kopifatiroma ini. Nāskakē xanīfāfe iskafani: ‘Mī koriyama mī kori nokotiro ma mī ea kopifapanā. Akka ě mia xanīfo fetsa ināi mī āfe ina inō ea kori inānō. Mia ināta mī āfi ināta mī fakefo ināta mī afama mīshtifo keyokōi ea ināi mī ea aō kopifanō,’ ixō xanīfāfe yoini.

26 Nāskakē āfe inapa ratokonō mai chachipakefofā yoini: ‘Ifo, ea manayofe. A ě mia nimia ě mia chipo kopifaikai,’ ixō yoini.

27 “Askafaito nikakĩ xanĩfãfe shinãkõini. Nãskaxõ yoini: ‘Rateyamafe. A mĩ ea nimia ẽ anã shinãima. Mĩ ea nimia ẽ keyokõi sofai mĩ anã ea niminõma. Kasharatãfe,’ ixõ yoini.

28-29 Nãskakẽ xanĩfãfe pexe mẽranoax kakĩ, ãfe yama fichini, nãato ichapama pishta nimia ini. Nãskakẽ fichixõ testopa achixõ temo temosayanã yoini: ‘Mĩ ea nimia ea kopifarisafãfe,’ fani. Mã eneano ratokonõ mai chachipafofã yoini, ‘Ea manayofe ẽ mia inãnõ,’ fani.

30 Askafaito nikakaspakĩ karaxa mẽra ikimani a mẽraxõ kopifanõ.

31 Nãskakẽ ranãri shinãmitsakõikakĩ a õiaifo ãto xanĩfo yoifokani fonifo.

32 Nãskakẽ xanĩfãfe kenaxõ mã oano yoini: ‘Mĩ çaka finakõia. Akça ẽ mia askafatima mĩ ea nimifiano, “A ẽ mia nimia ẽ mia kopifanõ ea manayofe,” mĩ ea faito,

33 akka mĩri mĩ yama mĩ shinãkerana nã ẽ mia noikĩ shinãti keskafakĩ,’ ixõ xanĩfãfe yoini.

34 Nãskax õitifishki finakõikĩ xanifãfe nã ãfe ina karaxa mẽra ikimani anoax omiskõi finakõinõ nã nimia kopifayanã.

35 “Ëfe Epa nai ari ikato matori askafaxii fetsafo mã raefayamaito mato omiskõimaki,” ixõ Jesús ato yoini.

19

*Feronãfake ãfe ãfi fe enãnãtirofoõnoa Jesús ato yoini
(Mr. 10.1-12; Lc. 16.18)*

1 Mã ato yoikĩ keyota Jesús aõxõ tãpimisfo fe Galilea anoax kakĩ faka Jordán pokefainax Judea mai ano nokoni.

² Nāskakē yorafā rasichi chīfafāinifo. Nārixō nā isinī ikaifo ato sharafapani.

³ Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ¿feronāfāke āfe āfi enepaikī enetiromē afeskaraito?” ixō yōkanifo.

⁴ Askafaifono Jesús ato kemani: “¿A Moisés kirika keneni mā ōimismamē? Iskafakī keneni: ‘Niospa keyokōi onifani. Feronāfake yafi kēro onifakī taefani.

⁵⁻⁶ Mā askafaxō iskafakī yoini: “Feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo,” ’ ixō Niospa yoinino Moisés keneni. Nāskakē anā yora rafema, yora fisti keskara ikani āfe āfi fe. Nāskakē feronāfāke āfe āfi enetiroma Niospamāi ato fianāmano,” ixō Jesús ato yoini.

⁷ Ato askafaino yōkanifo: “Akka, ¿afeskakī Moisés yoinimē iskafakī? ‘Feronāfāke āfe āfi eneyoxoma kirika kenexō yoitiro iskafakī: “Ē anā mia fipaima. Ē mia enei,” ’ ixō yoitiro Moisés fani,” fariseofāfe Jesús fanifo.

⁸ Askafaifono Jesús ato yoini: “Akka māri mātō xinifo keskara mā Niospa meka nikakaspamis. Akka Moisés yoini nō kēro enetiro. Akka Niospa taefakī anori shinānima.

⁹ Ē mato yoinō. Akka fētsa āfe āfi enetiroma fetsa fe chotanāyamafiano. Akka fētsa āfe āfi enexō kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai,” ixō Jesús ato yoini.

¹⁰ Askara nikakakĩ Jesús a aõxõ tãpimisfãfe yoinifo: “Akka nã mĩ noko yoiai keskara nikakanax, fianãfoma askara shara itirofo,” ikaxõ yoinifo.

¹¹ Askafaifono Jesús ato kemani: “Na ã yoiai keskara atirifãfe nikasharatirofoma. Akka nã Niospa ato shinãmanai tiitos shinãkanax nãfo shara itirofo fianãkanamax.

¹² Akka yõshikõĩ kãiax mã yosiax ãfiyatiroma. Akka fetsafori ato oxkofixotirofo ãfiyanõfoma. Akka fetsafãferi Epa Nios fisti nikakõipaikakĩ, nã fisti nikakõitirofo. Nãskakẽ afo ãfiyapakenakafoma,” ixõ Jesús ato yoini.

Jesús fakefo chishtoxõ ato mãmãyanã Epa Nios kifixopakeni

(Mr. 10.13-16; Lc. 18.15-17)

¹³ Ato askafaino yorafãfe ãto fakefo Jesúski efenifo ato mãmãpakeyanã ato Nios kifixonõ. Akka a Jesúsxõ tãpimisfãfe ato iskafanifo: “Mãto fakefo efexõ nõko Ifo fekaxtefayamakãfe,” ato fanifo.

¹⁴ Ato askafaifono Jesús ato yoini: “Ato enekãfe nã fakefo ekeki fenõfo. Ato nêtefayamakãfe. Ëfe Epa Nios xanĩfo ika ari na fakefo keskarakõifoki,” ixõ ato yoini.

¹⁵ Nãskaxõ fakefo mãmãpaketa Jesús nãnoax kani.

Feronãfake naetapa kori ichapayax Jesús fe mekani

(Mr. 10.17-31; Lc. 18.18-30)

¹⁶ Feronãfake naetapa fistichi Jesús õikaxõ yõkani: “Maestro, mĩ sharaki, ea yoife afaa shara ã afeska fatiromakĩ Nios xanĩfo fe ipaxaki,” ixõ yõkaito,

17 Jesús kemani: “¿Afeskakĩ sharara mĩ ea faimẽ? Akka Nios fisti sharafinakõia. Nios xanĩfo fe mĩ ipaxapaikĩ a Moisés yoini keskara mĩ nikasharakõitiro,” faito,

18 “¿Fatomẽ ã nikanõ?” faito, Jesús yoini iskafakĩ: “Nã Moisés yoini keskarakõi mĩ nikakõitiro. Iskafakĩ yoini: ‘Ato reteyamakãfe. Askatari mãto ãfima chotayamakãfe. Askatari atoki yometsoyamakãfe. Askatari chanĩ yoiyamakãfe. Askatari kaxpa ato parayamakãfe.

19 Askatari mãto epa yafi mãto efa nikasharakõikãfe, ato sharafakãfe. Askatari a mã chaima nikari noisharakõikãfe a mã mã noimeai keskafakĩ,” ixõ Jesús yoini.

20 Askafaito a kori ichapayato kemakĩ iskafani: “Nã mã yoiyai keskara mẽ nikakõimis. Akka, ¿afaa fetsari ã nikamamẽ?” faito,

21 Jesús kemani: “Mĩ isharakõipaikĩ, mĩ afama mĩshtifo ato minitãfe. Kori fixõ nã afaamaisfo ato inãketsatãfe. Nãskakẽ nai mẽranoax afama mĩshtifoya mĩ ixikai. Mã mĩ kori ato inãketsata anã oxõ ea Ifofasharafe,” ixõ Jesús yoini.

22 Askafaito nikai nã feronãfãke shinãchakakõi tooxinima kori ichapayamãiyaxõ ato inãkaspai. Nãskax Jesús makinoax kani.

23 Nãskaxõ Jesús aõxõ tãpimisfo yoini: “Ë mato pãraima, fekaxkõi yora kori ichapayato Epa Nios Ifofapaia.

24 Akka anã ã mato yoinõ meka fetsafaxõ. Camello akoja kini mẽra ikipaifi ikitiroma, fekaxkõi, efapamãiax. Nãskarari yora kori ichapayato Nios Ifofapai, fekaxkõi ãfe afama mĩshtifomã potakaspakĩ,” ixõ Jesús ato yoini.

25 Ato askafaito nikakakĩ a aõxõ tãpimisfãfe tãpipainifo. “¡Keel! ¿Afeskax nõ Nios fe ipaxatiromẽ?” ikanax yoinãnifo.

26 Askafãfe õikĩ Jesús ato yoini: “Yorafokai ãa ifimetirofoma. Nios fistichi yorafo ifitiro. Niospa afama mĩshtifo fatiro, yorafãfe atiroma keskara,” ixõ ato yoini.

27 Ato askafaito nikakĩ Pedro yoini: “Ifo, nõ mefe okĩ nõko afama mĩshtifo nõ õiferani nõ mefe oni. Akka, ¿afaa nõ fiimẽ?” fani.

28 Askafaito Jesús ato kemani: “Ë mato pãraima. Keyokõĩ ã ato ãkinãno sharafinakõia ea õixikani, ãfe Epa Nios keskara sharakõĩ ã ikaito. Akka mãmãĩ ea Ifofasharakatsaxakĩ nai mẽranoax mã efe xanĩfofo ixii. Mã nõko kaifo israelifãfe ãto xanĩfori mã ixii. Nã doce nofe yorafo israelifo mã ato ãkipakenakakĩ.

29 Akka yora fẽtsa eõxõ ãfe meka sharaõnoa ato yoikakĩ ãfe pexe õifaini, askatari ãfe onefetsafori õifaini, ãfe poifori õifaini, ãfe apari õifaini, ãfe afari õifaini, ãfe ãfiri õifaini, ãfe fakefori õifaini, ãfe tareri õifaini, akka nãato afama mĩshtifo fixii. Nãskatari mã naax Nios fe ipanaka.

30 Akka iskaratĩa yora ichapafãfe ato finõpaikani, nõ finakõiara ikaxõ, akka chipo fenotirofo. Akka a ato finõpaiyamaifo iskaratĩa Niospa ato finakõia imaino Nios fe ipanakafo,” ixõ ato yoini.

20

A yonomisfokiri yoikĩ meka fetsafaxõ Jesús ato yoini

1 Anã Jesús ato yoini: “Afe keskaramãkĩ Epa Niospa keyokõĩ ato ãkinã mã Ifosharafaino, ã anã meka fetsafaxõ ã mato yoinõ. Ea nikasharakãfe.

Nã tare ifo mã fakishparikõi kani yorafo fenaikai ãfe tare ano yonoxonõfo.

² Ato fichixõ ato yoini iskafakĩ: ‘Ë mato pena fisti yonomapai. Akka nã ã ato kopifamis tii mã pena fisti yonoano ã mato kopifai, ¿nãskara sharamẽ?’ ato faito, ‘Ëje, shara,’ fanifo. Nãskaxõ ãfe tare ari ato nĩchini.

³ Askata rama xini keyaino tare ifo anã kakĩ õia plaza anoxõ ranãrito manaifono yonopaikakĩ tsõa ato yonomayamaino.

⁴ Askaifono tare ifãfe ato yoini: ‘¿Mãri ãfe tare ano yonopaimẽ nã ã ato kopifamis keskafakĩ ã mato kopifanõ?’ ato faito nikakata atiri fonifo yonoi fokani.

⁵ Askata tare ifo anã xini keya kaxõ õia ranãrito mananifo yonopaikakĩ. Nãskakẽ afori nĩchini ãfe tare ano. Askata mã xini kaino anã kaxõ õia ranãritori manaifono. Nãfori nĩchini yonotanõfo.

⁶ Askatari yãtapishtakõi plaza ano anã kaxõ õia nãnoa ranãri ato fichitoshini yonopaiyaifãfe. Nãskaxõ ato yõkani: ‘¿Afaa nonoxõ mã afeskafaimẽ yonokima?’ ato faito kemanifo,

⁷ ‘Tsõa noko yonomayamaino nõ iki,’ fanifo. Askafaifono ato yoini: ‘Mãri ãfe tare ano yonotakãfe,’ ato fani.

⁸ ‘Nãskata mã fakishano nã tare ifãfe afe xanĩfo yoini iskafakĩ: ‘Ea yonoxonaifo ato kenafe ato kopifanõ. Nã rama ikiafo ato kopifakĩ taefafe. Askata nã iki taeafõ chipo ato kopifaxiki,’ fani.

⁹ Akka yãtapishtakõi ikikaxõ yonoafo nãfo ato kopifani nã pena fisti yonoafo kopifamis keskafakĩ.

¹⁰ Akka nã yonoi iki taeafãfe shinãnifo: ‘Nõ kori

ichapa fira,' ikaxõ, askafikaxõ nã fetsafãfe fiaitiri finifo.

¹¹ Nãskakẽ mã ato kopifaino, nã tare ifo mekafakakĩ yõachẽpenifo.

¹² Iskafakĩ yoinifo: 'Akka nã rama fẽkaxõ yonoafo mã ato kopifaa nã mã noko kopifaa keskafakĩ. Akka nõ xini pae meeyanã nõ yonoa nãskayanã nã pena tii,' fanifo.

¹³ Akka nã tare ifãfe fisti kemani: 'Efe yorashta, ã mia chakafakĩ mekafaama. Akka mẽ mia kopifaa nã mĩ pena fisti yonoa. Nã pena fisti ã ato kopi-famis tii ã mato kopifai ã mato faaki. Nã sharaki mã ea faaki,' fani.

¹⁴ 'Akka ã mia kopifanõ, nakĩa mĩ kori. Katãfe mĩ pexe ano. Akka nã rama ikikaxõ yonoafo nã ã mia inãi keskafakĩ atori ã inãi.

¹⁵ Nã ã inãpaiyai keska fakĩ ã ato inãtiro, ãfe korimãiyakẽ. Akka, ¿afeskai mĩ ekeki õitifishkikimẽ ã fetsafo inãsharaino?' ixõ yoini.

¹⁶ Nãskarifikĩ Epa Niospa nã taefakĩ chanĩmara faafo ato inãi keskafakĩ nã rama chanĩmara faifo nãfori ato inãsharaxii. Akka Epa Niospa yora ichapa kena a ika ano fonõfo. Nãskakẽ Epa Niospa ato kenafiaito tsõa nikayamaito nã Ifofaafos ato ifixii," ixõ Jesús ato yoini.

Anã Jesús ato yoini: "Mã chaima ea retekanira,"
ixõ

(Mr. 10.32-34; Lc. 18.31-34)

¹⁷ Askata Jesús Jerusalén ari fãi kakĩ a aõxõ tãpimisfo kenaxõ ato yoini iskafakĩ:

¹⁸ "Ea nikakãfe. Mã mã õikai iskaratĩa Jerusalén ano nõ mãpei kaikai. Nãnoxõ ea achikaxõ ea ato inãkani, a Nios ato kãfixomisfãfe ãto xanĩfofo,

askatari a Moisés yoikĩ kirika keneni keskara ato tãpimamisfo anori ea iyoxikani. Nãnoxõ, ‘Mã mĩ naikai,’ ixõ ea yoixikani kiki.

¹⁹ Nãskakaxõ yora fetsafo nõko kaifoma ea inãkani ea kamaketsayanã ea koshaketsakani. Nãskakaxõ ifi cruz ikaki ea mastakani. Akka ea askafafono tres nia oxata ã anã otoxii Epa Niospa ea otoaano,” ixõ ato yoini.

Ãfa ãfe fake rafe Jesús yoixoni
(Mr. 10.35-45)

²⁰ Zebedeo fake rafe Juan fe Santiago ini. Nã rafe ãto afa fe Jesús ano fonifo. Mã Jesúski nokoxõ nã kãromã ratokonõ mai chachipakefofãni Jesús afara shara yõkapaikĩ.

²¹ Askafaito Jesús yõkani: “¿Afaa mĩ fichipaimẽ ã mia axonõ?” faito, nã kãromã yoini: “Ifo, nã mĩ xanĩfo finakõia ikaitĩa ãfe fake raferi mefe xanĩfo inõfo ato xanĩfo imafe. Nã xanĩfãfe tsaoti ano mĩ tsaano ãfe fake rafe takairafe mefe ketaxamei tsaonõfo,” fani.

²² Askafaito Jesús nã kãromã fake rafe yoini: “Mã tãpiama a mã ea yõkai keskara. ¿A ã omiskõixiai keskara mãri omiskõitromẽ?” Jesús ato faito kemanifo: “Ëje, nõri tenetiro,” fanifo.

²³ Askafaiãfe Jesús ato yoini: “Chanĩma, mãri mã omiskõixii. Akka ãkai tsoa yoitroma, ‘Efe ketaxamei tsaofe efe rafexii’ ixõ. Akka ãfe Epa Nios fistichi yoitiro. Nã Niospa ato katoafos nãfo afe ketaxamei tsaotirofo efe rafexikakĩ,” ixõ ato yoini.

²⁴ Nãskakẽ a aõxõ tãpimis rafeta askafakĩ yõkaifãfe a aõxõ tãpimisfo fetsafãferi nikakakĩ, “¿Afeskai oa iskai rafe mekakanimẽ?” ikaxõ a rafe meepainifo.

²⁵ Askaifono Jesús ato kenaxō ato yoini: “Mā mā tāpia yora fetsafāfe āto xanīfofo afe keskarafomākī. Nā xanīfāfe mitsisipakōixō ato yonomamis. A xanīfo fe rafeafāferi ato yoimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yoimisfo.

²⁶ Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro.

²⁷ Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo ax-osharapai. Nā apaiyaifo keskara ē ato axosharai,’ ixō shinātiro.

²⁸ Akka ēri anori shināima, ēfe Epa Nios ariax ē nāmā ftoni feronāfakekōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni Satanās chaka āto ifo inōma,” ixō Jesús ato yoini.

*Jesús yora fēxo rafekōi sharafani
(Mr. 10.46-52; Lc. 18.35-43)*

²⁹ Askata Jericó anoax Jesús aōxō tāpimisfo fe kaino yorafā rasichi chīfafainifo.

³⁰ Akka fai kesemē fēxokōi rafe tsaonifo. Nānoxō Jesús fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

³¹ Askafaifono nā yorafā rasichi ato iskafanifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, noko shināfe!” fanifo.

³² Askafaifono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

³³ Ato askafaito kemanifo: “Ifo, nō fēro ōisharapaikōi,” fanifo.

³⁴ Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

21

Jesús nokoni Jerusalén ano

(Mr. 11.1-11; Lc. 19.28-40; Jn. 12.12-19)

¹ Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini,

² ato iskafayanā: “Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe.

³ Anoxō yora fētsa mato yōkai: ‘¿Afeskakī mā burro tēpeyoamē?’ mato faito, yoikī iskafakāfe: ‘Nōko Ifāfe fichipaiyaito nō ifixoniyoa. Akka samama nō mia nīchixoniyokai,’ fakāki,” a aōxō tāpimis rafe fani.

⁴ Nā Niospa meka yoimisto kirikaki kenekī yoini keskakōini Jesús.

⁵ Iskafakī keneni:

Pexe rasi Sión anoafō ato yoikāfe iskafakī: “Ōikapo. Māto xanīfokōi mā matoki oi kiki. Xanīfofiāx afama keskara oi kikī. Burro fake kamaki tsoa na feronāfakekai kakapaimisma,” ixō Niospa meka yoimisto kirika keneni.

⁶ Nā Jesúsxō tāpimisfāfe mā fōkaxō nā ato yoia keskara fanifo.

⁷ Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsaoinākafāni.

⁸ Yora ichapakōi inifo. Nāfāfe āto rapatifo kakafa fonifo fai nēxpakīa. Ranāritori epe pei xatekaxō kakafanifo.

⁹ Akka nā rekē foaifo fe a acho foaifo fāsikōi mekafonifo. Tai tai fokani. “¡Aicho! ¡Nōko xanifo David āfe fena nokoki oi kiki! ¡Sharafinakōia nokoki oi kiki Niospa nīchiano nai mēraxō! ¡Nōko Ifo Nios sharafinakōia!” ikanax tai taifonifo.

¹⁰ Nāskata Jesús Jerusalén ano kaito ōikani yorafo ratei fetsenifo ōiakefaikani. “¿Tsoamē na?” ikanax āa ranā yōināi fetsenifo.

¹¹ Askaifāfe nā Jesús fe foafāfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixō ato yoinifo.

Jesús a Nios kīfiti pexefā mēraxō a ato ināifo ato potani

(Mr. 11.15-19; Lc. 19.45-48; Jn. 2.13-22)

¹² Mā fotoax Nios kīfiti pexefā mēra Jesús ik-itoshini. Ikikaixō ōia a mēraxō yorafāfe āto afama mīshtifo ato miniketsakani inifo kori fikani. Askafaifāfe ōikī Jesús ato pōtaketsani a ato afama mīshtifo miniaifo, a ato fīaifori potani. A kori fīanōnāifo anoari āto mīsa pōtakī ato nāpakaketsani. Askatari a ato rifi miniaifori āto tsaotifori ato pōtaketsani.

¹³ Askafata ato yoini iskafakī: “Niospa shināmanaino Isaías Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe peke keskara mā famis,” ixō Jesús ato yoini.

14 Ato askafaino a Nios kīfiti pexefā ano fēxofo, chatofa Jesúski fenifo. Nāskakē anoxō Jesús ato sharafani.

15 Jesús askarafo ato sharafaino ōikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe ōinifo afama mīshtifo Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! ¡Nā Jesús David āfe fena shara-finakōia!” ikaifāfe nikakani ōitifishkinifo.

16 Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika kenano, ¿mā ōimismamē? Iskafakī kenenifo, Niospa ato shināmanaino:

 Fake yomefāfe mia fanākani, mī ato fanāimaino,
ixō kenenifo,” Jesús ato fani.

17 Askafakī ato yoita ato makinoax kani pexerasi ano Betania ano. Nāno oxafistishini.

“Fana higuera, mī anā fimiyanakama,” Jesús fani

(Mr. 11.12-14, 20-26)

18 Mā penano Jerusalén ano anā okī Jesús meea fonāikōini.

19 Mā anā kakī Jesús ōini a fana higuera fai kesemē nikē. Nāskakē akiki kaxō āfe fimi fenani pipaikī. Akka fimiya inima, āfe pei fisti ini. Nāskakē yoikī iskafani: “Anā mī fimiyanakamaki,” faino koshikōi nā higuera xanarisatani.

20 Askaito ōikakī aōxō tāpimimisfāfe yōkanifo: “Kee, ¿afeskai na ifi xanarisatanimē?” ikaxō,

21 yōkaifono Jesús ato kemani: “Ē mato pāraima mā ea nikakōixō māri atiro na ē ifi higuera xanafaa keskafakī. Nāskarifakī na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro.

22 Mā Epa Nios chanīmara fakōixō mā afara kīfaiato mato inātiro,” ixō ato Jesús yoini.

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī

(Mr. 11.27-33; Lc. 20.1-8)

23 Ato askafata Nios kīfiti pexefā mēra ikikaini. Nā Nios kīfiti pexefā mēraxō ato tāpimanaino, nā ato Nios kīfixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “¿Tsōa mia nīchinimē? ¿Tsōa mia yoiamē mī iskafanō?” ixō yōkanifo.

24-25 Askafaifono Jesús ato kemani: “Ēri mato yōkanō. Ea yoikapo ē nikanō. ¿Tsōa Juan nīchinimē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoikī iskafatiro: ‘¿Akka afeskakī mā Juan nikamismamē?’ noko fatiroki,” ikanax yoinānifo.

26 “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

27 Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri

mato yoima tsōa ea nīchinimākī ē iskafanō,” Jesús ato fani.

Meka fetsafaxō feronāfake rafeōnoa Jesús ato yoini

²⁸ Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani.

²⁹ Askafaito āfe fāke kemani: ‘Ē kapaima,’ fani. Askafiax mā shināx kani.

³⁰ “Askata āfe fake chipokori yoini iskafakī: ‘Mīri kaxō ēfe tare ano ea yonoxotāfe,’ fani. Askafaito nāato kemani iskafakī: ‘Ia, epa. Ē yonotanōkī,’ fafiax kanima.

³¹ Akka, ¿fatoto a āfe āpa fichipaiyai keskafakī axonimē?” ato faito, “Iyoato axoni,” fanifo. Nāskaxō Jesús ato yoini: “Ē mato pāraima. Nā xanīfo kori fīxomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifofaama.

³² Akka Juan ato maotisafamis oni ato tāpimaxiki afeskax mā itiromāki, Niospa fichipai keskara. Akka mā kai Juan nikamisma. Akka nā xanīfo kori fīxomisfo feta nā kēro chotaferomafāfe nikakōinifo. Akka māto chaka mā xateama mā afara fetsafo shināmis,” ixō Jesús ato yoini.

Meka fetsafaxō Jesús ato yoini a ato yonoxomis chakafoōnoa

(Mr. 12.1-12; Lc. 20.9-19)

³³ Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai

pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani.

³⁴ Akka nā fimimistīa mā āfe fanafo pachiano, a yonoxomisfo nīchini a kexexonafo ato yōkaxō nā āfenā tiiri fixotanōfo.

³⁵ Akka nā tare kexexonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo.

³⁶ Nāskakē tare ifāfe anā āfe inafo ichapakōi nīchini. Mā foafono nā tare kexemisfāfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī, ixō.

³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo.

³⁹ Nāskakata achinifo. Mā achikaxō tare pasotai iyokaxō retenifo.

⁴⁰ Akka, ¿mā tare ifo oxō a tare kexemisfo ato afeskafatiromē?” ixō Jesús ato yōkani.

⁴¹ Ato askafaito kemanifo: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “¿Na kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofōfāfe, ‘Nakai afama,’

ikaxõ Niospa Fake õikaspamisfo. Askafafiaifono Niospa ãfe Fake katonu nõko Ifo inõ. Nãskakẽ nõ akiki inimakõi, ixõ kirika ano kenenifo,” Jesús ato fani.

⁴³ “Nãskakẽ ã mato yoi, taeyoi Nios fe rafexõ ãfe meka mã ato yoiyomis. Askafixõ mã ea nikakaspai. Nãskakẽ Epa Niospa fetsafo yoi ãfe meka ato tãpimanõfo afeska faxõ Nios Ifo sharakõifatiromakĩ.

⁴⁴ Akka tokiriki fetsa pakeki aõ xao teketiro. Akka tokiri yoraki pakekĩ yamakõi fatatiro. Nãskarifiakĩ ã Niospa Fakekõixõ a ea nikakaspafono ã ato omiskõimaxii,” ixõ Jesús ato yoini.

⁴⁵ Akka nã Nios ato kifixomisfo ãto xanĩfofo feta fariseofãfe nikanifo Jesús meka fetsafaxõ ato yoiãito. Nãskakaxõ tãpinifo Jesús atoõnoa yoiãito.

⁴⁶ Nãskakaxõ achipainifo. Akka achipaifikani mesenifo yorafãfemãi chanĩmara faifono Jesús Niospa meka ato yoimiskẽ. Nãskakẽ achinifoma achipaifikakĩ.

22

Meka fetsafaxõ Jesús ato yoini a feronãfake ãfiyaino inimayanã piaifoõnoa yoiãĩ
(Lc. 14.15-24)

¹ Anã Jesús meka fetsafaxõ ato yoini iskafakĩ:

² “A Epa Nios xanĩfo ika ano iskaraki ã mato yoinõ. Nikakãfe. Nã xanĩfãfe ãfe fake ãfi fiaino fista axoxiki.

³ Akka xanĩfãfe a yonoxomisfo nĩchini ato yoi-tanõfo fenõfo. Akka mã fõkaxõ ato yoiãifono fekaspanifo.

⁴ Nāskaxō anā a yonoxomis fetsafo nīchini ato iskafayanā: ‘Ato yoikī iskafatakāfe: “Mā xanīfāfe āfe fāke āfiyaino mā itipinīsharakōi faa pixiki. Āfe fakka efapa mā ato retemana. Askatari fakka fake xoakōiari ato retemana. Mā keyokōi itipinīsharafakī, kookāfe pixikakī,” ’ ato fani.

⁵ Akka ato askafaifono ato fe fekaspanifo. Fetsa āfe tare ari kani. Fetsari kani āfe afama mīshti minikai.

⁶ Atirifāfe nā xanīfāfe inafō ato achikaxō ato seteketsayanā ato retenifo.

⁷ Nāskakē xanīfo ōitifishkifinakōini. Nāskaxō āfe sorarofo nīchini a retemitsamisfo ato reteyanā āto pexefori ato kōakī mītōkakōitanōfo.

⁸ Nāskaxō xanīfāfe a yonoxomis fetsafo yoini ato iskafakī: ‘Mē itipinīshara faa ēfe fāke āfiyaino pixiki. Akka nā chakafo ē ato kenamanafo fekas-pakōiafokī.

⁹ Akka māri fotakāfe nā pexe rasi ano. Nāria ato fichixō nā mā ōiaifo ato yoikāfe fenōfo pii fenōfo, ēfe fāke āfiyaino,’ ixō ato yoini.

¹⁰ Nāskakē a yonoxomisfo fai fētsa fonifo. Mā fōkaxō yora ichapafo fichikaxō ato efenifo. Yora sharafo efeta yora chakafori efenifo. Nāskakē xanīfāfe āfe fāke āfiyaino yorafo pexe fospikōinifo.

¹¹ “Nāskakē xanīfo pexe mēra ikikaini yorafo feito itipinīsharafaxō ato rapati sharakōi ato ināketsani safenōfo āfe fāke fista akaino. Xanīfo ikikaini ato ōikai mā sharakōi safeketsafomakī. Akka fistichi rapati shara safea inima, chapokōi safea fichini.

¹² Akka a rapati shara safeama fichixō yoini: ‘¿Afeskakī mī rapati sharakōi safeax mī oamamē ēfe

fāke āfiyafiaino?’ Askafaino nā feronāfake tooxin-
ima.

¹³ Nāskaxō xanīfāfe a yonoxomisfo yoini: ‘Na feronāfake otekere ata metexkeraxō fakishifā mēra potakāfe, anoax omiskōipakexanō eaiyanā,’ ixō ato yoini.

¹⁴ Nāskarifiyai Epa Niospa yora ichapa kenai a ika ano fenōfo nā āfe Fake Ifofaifo tii afe ipanakafo,” ixō Jesús ato yoini.

“¿Xanīfo nō kori inātiromē noko yōkaito?” ixō Jesús yōkanifo

(Mr. 12.13-17; Lc. 20.20-26)

¹⁵ Nāskata mā Jesús ato yoiato nikakata mā fokanax fariseofo yoinānifo: “¿Afeskaxō nō Jesús afara chaka yoimatiromē? Afara chaka noko yoiato nō yōaxiki,” ikanax yoinānifo.

¹⁶ Nāskafakata āto inafō nīchinifo, Herodes āfe inafoya iskafakī yoitanōfo: “Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoifiaifono. Afara mī yoipai mī ranomisma. Keyokōi nāskarafos mī ato yoimis.

¹⁷ Nāskakē noko tāpimasharafe. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikā,” fanifo. Jesús chakafamapaikakī askafanifo.

¹⁸ Askafaifāfe ōikī Jesús tāpini feparapaiyāifāfe. Ato yoini: “Feparamisfāfe, ¿afara chaka mā ea yoimapaimē eōnoa afara chaka yoipaikī?

¹⁹ Akka māto kori exe ea ispakāfe a aō mā xanīfo kopifamis,” ato fani. Ato askafaito kori exe fisti fōxonifo.

²⁰ Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano ke-neamē?” ixō ato yōkaito,

²¹ kemanifo iskafakakī: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

²² Ato askafaito nikakani, ratekōiyanā. “Kee. Āfe mekakai tsōa finōtiroma,” ikanax a makinoax fonifo ōifaikani.

“¿Yora naax anā otoax afeskatiromē?” ixō Jesús yōkanifo

(Mr. 12.18-27; Lc. 20.27-40)

²³ Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakakī: “Yora naaxkai anā afeskax ototiroma,” ixō shināmisfo. Nāskakaxō Jesús yōkai fekani fenifo iskafakakī:

²⁴ “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī keneni.

²⁵ Akka nō mia yoikī taefanō. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyai taeni. Mā āfiyax afeta fake akamax nani. Mā āfe ochi naano chipokoto fini.

²⁶ Nāskarifiyai nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax.

²⁷ Nāskata mā nai keyoafono nā kērori chipo nani.

28 Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fīpakaxō?” ixō yōkanifo.

29 Askafaifono Jesús ato kemani: “Mā kai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīrira yoiai,” ato fani.

30 “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax.

31 Akka, ¿a yorafo naax otokiaifo Niospa yoini keskara, a kirika keneano mā ōimismamē?

32 Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafi-fono naafoma keskara Epa Niospa ato ōimis. Niospa yoini iskafakī: ‘Ēkīa āto Nioskōi,’ ixō Niospa yoini.” Nāskara Jesús keyokōi ato yoini.

33 Saduceofāfe nikanifo Jesús ato askafaito, “¡Aira! ¡Nikakapo! Jesús sharakōi yoi,” ikanax yoinānifo.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo
(Mr. 12.28-34)*

34 Nāskakē saduceofo Jesús ato meka xatem-anaito nikakaxō fariseofo ichanākanax Jesús ano fenifo.

35 Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani,

³⁶ “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

³⁷⁻³⁸ Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoyaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara.

³⁹ Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mā mī noimeai keskafakī ixō Moisés keneni.

⁴⁰ Moisés noko yoini keskai afeskax nō shara itiromāki. Askatari a Niospa meka yoimisfāfe yoinifo keskai afeskaxri nō askatiromakī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

“Akka, ¿tsōa fenamē Cristo?” ixō Jesús ato yōkani (Mr. 12.35-37; Lc. 20.41-44)

⁴¹ Fariseofo afe ichanāyoafono,

⁴² Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo.

⁴³ Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

⁴⁴ Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mīnāmā nīchikai,’ ixō Epa Niospa yoinino David kirika keneni.

⁴⁵ “Akka, ¿afeskai Cristo David āfe fena itiromē, nā David Cristo ēfe Ifora fafiapaonino?” Jesús ato fani.

⁴⁶ Ato askafaino nikakakĩ tsõakai pishta kema-
ima. Nãskakẽ akiki ranokakĩ anã tsõa afaa pishta
yõkanima.

23

*Jesús ato yõani fariseofoya a Moisés yoini
keskara ato tãpimamisfo*

(Mr. 12.38-40; Lc. 11.37-54; 20.45-47)

¹ Mã askafata Jesús yorafo yoini aõxõ tãpimisfoya:

² “A Moisés yoikĩ kirika keneni keskara ato
tãpimamisfo feta fariseofãfe a Moisés yoini keskara
mato tãpimakani.

³ Akka ato nikakãfe. Nã mato yoiaifo keskara
akãfe. Akka nãfãfe nã yoiaifo keskara akanima.
Nãskakẽ nã yoiaifo keskara akâtama afara fetsafo
amisfo. Nãskakẽ mãri ato keskara iyamakãfe.

⁴ ãto patoronõ ato yoitiro iskafakĩ: ‘Na efekõi
pefexõ fõtakãfe,’ ato fafiãxõ ãri foyoikanõ ato
fatiroma. Nãskarifiakĩ a Moisés keneni ato
tãpimamisfo feta fariseofãfe mato afara fekaxkõi
yoimisfo afeskax Epa Nios fe mã itiomãkĩ Epa
Nios matoki inimanõ ikaxõ. Nãskafikaxõ mato
afara axosharamisfoma.

⁵ Afama mĩshti sharafo apaikani yorafãfe noko
õinõfora ikaxõ kakapaiyanã. Niospa meka kirikaki
kenekata koiro kafo pishta fakãta a mẽra Niospa
mekana nekaxõ ãto fishpi ano nẽtamisfo. Askatari
ãto põya anori nẽtamisfo. Askatari tari kepanãtia
chainipa safemisfo sharakõira noko fanõfo ikaxõ.

⁶ Askatari sharakõi anoxõ pipaimisfo, askatari
tsaoti sharakõi anori tsaopaimisfo ichanãti pexe
anoax, keyokõichi noko õinõfora ikanax.

⁷ Nāskakata nā yora ichapa rasi ano fopaikani noko finōkakī noko yoisharakakī, ‘Maestro noko fanōfora,’ ikanax.

⁸ “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka mātō Maestro fisti finakōiaki.

⁹ Nāskakē iskaratīa nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki.

¹⁰ Askatari tsoa ifofayamakāfe. Akka nā Epa Niospa katoni fisti na Cristo fisti mā Ifofatiro.

¹¹ Nā fatora fetsa xanīfo ipai nā ato yonoxomis keskara itiro. Nāskaxō ato afara axosharatiro.

¹² Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfofā sharakōi nīchitiro,” ixō Jesús ato yoini.

¹³ Nāskata Jesús a Moisés yoikī kirika keneni keskara ato tāpimamisfoya fariseofo yoini iskafakī: “Moisés meka ato tāpimamisfāfe, māri fariseofāfe ea nikasharakāfe. Māfi ato pārapaimiski. Mākai a mā yoia keskara mā ato yoimisma. Mā ato xītimis Epa Nios Ifofayamanōfo. Māri mā Nios Ifofamisma. Nā Nios Ifofapaiyairo mā ato xītimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakī: ‘Nō mato afara shara faxōira,’ ixō mā ato pāramis. Akka kēro ifomafa mā pāraxō mā pexe fīamis. Nāskaxō mā Nios kīfikī mā chaikōi

kīfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

¹⁵ “¡Ooa, a Moisés yoikī kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

¹⁶ “¡Ooa! Niospa mato omiskōimaxii, mā ato mēstekōi yoimiskēma. Mā tāpiamafixō mā ato paramiski ato tāpimapaikī. Mā fēxo keskarakī fēxo afe fēxo iyoikai nā rafe fenotirofo. Nāskarifiakī Niospa meka anoriyamafiano mā ato paramiski iskafakī mā ato yoikī: ‘Ē mato paraima. Nāskakē ē mato yoi, nā ē mato yoiyoa keskara ē ayamaito Nios kīfiti pexefānē ea omiskōimatiro,’ mā imis. ‘Akka nā Nios kīfiti pexefā aneōxō mā yoiyoa keskafakī mā ato axoyamaxō shināchakayamakāfe. Askafixō nā Nios kīfiti pexefā mēranoa oro aneōxō mā ato yoiyoa keskafakī ato axokāfe,’ ixō mā ato yoimis.

¹⁷ Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfiti pexefā mēranoa oro raka sharafinakōia, askayamai Nios kīfiti pexefā raka sharafinakōia. Akka oro ares rakax shara itiro. Akka Nios kīfiti pexefā mēramāi rakax shara itiro.

¹⁸ “Nāskarifiakī, ‘Nā ē mato yoiyoa keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoimisfo. Akka mā fariseofāfe,

anorima mā ato yoikī iskaŋamis: ‘Nā mīsamāfā aneōxō mā ato yoiyomis keskaŋakī mā ato axoyamaŋixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoiyomis keskara akāfe,’ ixō mā ato yoimis.

19 “Akka mā fēxo keskarakōi. Akka, ʔfato sharaŋinakōiamē? Nā afarafo mā Nios ināi raka sharaŋinakōia, askayamai a kamakixō yoinā koati mīsamāfā raka sharaŋinakōia. Akka nā yoinā ina ares shara itiroma. Askafax nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama.

20 Akka nā koati mīsamāfā aneōxō afara yoiaito nā koati mīsafā fistiōnoa aneima. Akka nā mīsamāfā kamaki rakaōnoari yoi.

21 Akka nā Nios kīfiti pexefā aneōxō afara yoikī Nios kīfiti pexefā fistiōnoa yoima. Akka Niosri a mēra ikano mā yoi.

22 Akka nā nai aneōxori mā afara yoikī, nai fistiōnoa mā yoima. Nā Nios Xanīfo nai mēra ika anoafori mā yoi.

23 “ʔOoa, a Moisés yoikī kirika keneni keskara ato tāpimamīsfāfe fariseofo feta! Ea nikakapo. Māfi ato parapaimiski. Māto afama mīstifo mā Nios ināpaifikī a Niospa afara fetsa yoia keskara mā shināmīsama. Mā māto fana mīstifo nā korātorofo fana fetsa mīstifori mā Nios ināmīsis. Akka fetsafo mā ato yonomaxō afara fichipaifiaifāfe mā ato noikima mā ato afaa ināmīsama. Epa Niospa yoini keskaŋakī mā ato noima. Akka a mā yoiaki keskara tsōa māto meka chanīmara fatiroma. Nāskaxō māto fana mīstifo mā Nios ināfikī a Niospa yoia keskara mā shināima.

24 Akka mā nā fēxo afe fēxo iyotiroma keskarāfo. Nāskarifiakī māri mēstekōi shināsharaima yorafo Niospa meka tāpimapaifikī. Nāskaxō afara sharakōifo mā ato tāpimasharamisma. Akka afara sharama mā ato tāpimamis. Akka nāpe pishta mātō kecho mēra naneano, mā fixō mā potamiski. Akka nā camello efpakōi mā potakaspakī mā ayamis.

25 “¡Ooa, a Moisés yoikī kirika keneni keskara ato tāpimamisfāfe fariseofo feta! Mā ato parapaimiskōi. Akka mātō kecho yafi mātō sapa femākīa fisti chokasharafikī, oke mērakai mā chokasharamisma, nachoshtax pisikōi itiro. Nāskarifiakī mā yorafo ōimapai nafo sharafora noko fanōfora ixō. Akka mātō shinā mēraxō mā shara shināyamafikī, oa choshta pisi keskaraxō. Nāskaxō afarafo mā ato fīamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii.

26 Fariseofāfe, mā kai mēstekōi shināsharamisma. Akka iskaratīa mātō shinā mēraxō shināsharakāfe, isharakōixikakī. Anā afaa chaka shinākakima. Nāskaxō mā yorafo ikisharakōitiroki.

27 “¡Ooa, a Moisés yoikī kirika keneni keskara ato tāpimamisfāfe, fariseofo feta! Māfi ato parapaimiski. Māfi nā mafa kini keskaraki. Akka mafa kini femākīa oxo sharakōi nō ōifiaino oke mēra sharama. A namisfāfe āto xafo fospikōia pisia fetsa fetsatapafo.

28 Nāskarari shara keskara yorafāfe mato ōikani. Akka mātō shinā mēraxō mā shara shināima. Afara chakakōifo mā shināmis, ato mā parakōimis.

29 “¡Ooa, a Moisés yoikī kirika keneni keskara ato tāpimamisfāfe, fariseofo feta! Mā ato parapaimis.

Nāskakē Niospa mato omiskōimakī finakōixii. Nā mato xinifo a Niospa meka yoimisfo fetsafāfe ato retenifo maiāfo ano mā tokiri famis a mato xinifo namisfo ato shināxikī. Nāskaxori a maiāfo mǎnǎo charofori mā famis yorafāfe ōikakī na mēra sharakōira fanōfora ixō.

³⁰ Nāskaxō mā yoimis iskafakī: ‘Nōko xinifāfe a Niospa meka ato yoimisfo retenifo keskafakī nōri niyoxō nō ato retekeranima,’ ixō mā yoimis.

³¹ Akka nā mā yoiai keskara chanīma. Māto xinifāfe ato chakafakī ato retenifo. Māri ato keskarakōifo.

³² Nā Niospa matoki nīchiari mā retexii. Akka nā mā apaiyai keskafakī ayotakāfe.

³³ “Mā afara chakafa fafafāini. Nāskakē mā rono keskarafo. Mā chakafa fafafāini. Mā rono paekapato fake keskarakōifo. Nāskakē mā omiskōipakenakafo mēra mā kaxii. Akka afeskax mā faki ichotiroma. Askatari tsōakai mato nētefatiroma.

³⁴ Nāskakē a Niospa meka yoimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskatari a Moisés yoikī kirika keneni keskara ato tāpimamisfori ē matoki nīchixii. Nāskakē atiri mā ato retexii. Askatari fetsafori ifi cruz ikaki mā ato mastaxii nanōfo. Askatari fetsafori mato ichanāti pexe mēraxō mā ato koshaxii. Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā.

³⁵ Nāskakē Epa Niospa matori omiskōimaxii nā mato xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafiafono ato retenifo. Chipori mā xini ichapa finōano nā Zacarías, Berequías fake,

mãto xinifãfe retenifo. Nã Zacarías feronãfake sharafiano Nios kīfiti pexefã chaimashtaxō koati mīsamãfã nakirafexō retenifo. Nãskakē Niospa atoõxō mato omiskōimaki finakōixii.

³⁶ Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani
(Lc. 13.34-35)*

³⁷ Anã Jesús ato yoini iskafakī: “¡Ooa, Jerusalén ano ikafãfe! Mãfi a Niospa meka yoimisfo mã ato retemiski. Askatari aōnoa ãfe meka shara yoi-tanōfo Niospa mato ano nīchiafori mã ato tokorinī tsakakī retemis. Oa takaranã ãfe fakefo ãfe pei nãmã onetiro keskafakī ē mato kexepaifiato mã ea nikakaspamis. Mãfi ekeki omismakī ē mato ĩkipanã.

³⁸ Akka òikapo, iskaratīa anã tsōa mato kexeima nã mã imis anoa.

³⁹ Ē mato yoinō, iskaratīakai mã ea anã òima. Nã ē oaitīa mã ea òixii. Nã ē nai mēranoax ē oaitīa mã yoikī iskafaxii: ‘Nafi Niospa nokoki nīchia. Fãsi sharafinakōia Epa Niospa na shara fapanaka,’ ixō mã eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefã pãoixii,” ixō
(Mr. 13.1-2; Lc. 21.5-6)*

¹ Nãskata Jesús Nios kīfiti pexefã mēranoax tsekekainaino, aōxō tãpimisfo akiki fēkaxō yoinifo iskafakakī: “Ifo, òipo. Nōko Nios kīfiti pexefã sharakōi,” fanifo.

² Askafaifono Jesús ato yoini: “Na mā òiai, akka ã mato pãraima anãkai tokirifo petsanãmëxima, keyokõi pãoixii. Na tokirifori maoui fetsexii,” ato fani.

Afaa afeskaximãkai mā chaima nõko mai keyoaino Jesús ato yoini

(Mr. 13.3-23; Lc. 21.7-24; 17.22-24)

³ Askata fonifo mächifã Olivos ano. Nãno Jesús tsaoni. Nãskakẽ aõxõ tãpimisfo akiki fonifo yõkaxikakĩ iskafakakĩ: “Nõ tãpipai mĩ noko yoinõ afetĩa iximẽ a mĩ yoiai keskai. Afeskaxõ nõ tãpitiromẽ a mĩ anã oxiai mā mai keyoaino noko yoife,” fanifo.

⁴ Askafaifono Jesús ato kemani: “Kex-emesharakani mā ato nikaino mato afara chakafamatirofoki.

⁵ Yora ichapa fẽkaxõ, ‘Ë Cristora,’ ixõ mato paraxikani.

⁶ Nãskaxori mā nikaxii yorafo retenãifãfe chai inoax. Nãskatari nonoaxri askaxikani retenãkani. Askara õi, rateyamakãfe. Nã ã mato yoimis keskakõi kiki. Nãskafiax nõko mai fena keyoxima kiki, chipo ixii.

⁷ Akka yorafo mai fetsa anoax mẽenãpaiyaifono yora fetsafori mai fetsa anoax retenãxikani. Askatari fonãiki finakõixikani afaa pikanima. Nãskatari nã mai fetsa anoax mai naya naya ixii. Askatari pae finakõia fetsa fetsatapafu nokoxii kiki.

⁸ Akka taei nã omiskõiaifo, askai fetsexii.

⁹ “Nãskata mato achikaxõ fetsafo mato inãxikani mato omiskõimanõfo. Nãskaxõ mato retenõfo.

Nāskaxō keyokōi nā mai tio anoxō eōxō mato noikaspaxikani.

¹⁰ Nāskatari yora ichapafāfekai ea anā chanīmara fakanima. Nāskakanax āa ranā noikaspafaatanāxikani. Nāskakaxō yora fetsa yōsixikani ato achinōfo.

¹¹ Nāskatari yora ichapafo āa chanīxikani iskakani: ‘Ea Niospa shināmani kiki ē Niospa meka mato yoinō,’ iki āa chanīxikani. Nāskaxō yora ichapafo ato pāraxikani.

¹² Nāskaxō ato chakakōi faxikani. Ato noimisfo keskafakī atirififāfe anā ato noisharaxikanima.

¹³ Akka nā ea shināmāxixoma ea shinākōiai nāfi ēfe Epa Nios fe ipaxatiroki.

¹⁴ Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ipaxanō. Na maifo tii ano ato yoiaifono, chipo nōko mai keyoxii.

¹⁵ “Nā Niospa meka yoimisto Daniel a inōpokoai yoikī keneni iskafakī: ‘Nios kīfiti pexefā mēra afara chakakōi faxikani,’ ixō kirika keneni. Nāskakē na kirika kenea anexō tāpikāfe.

¹⁶ Nā chakafinākōia ōikanax, nā Judea anoafomachi keya ano ichorisatakāfe.

¹⁷ Askatari āfe pexe māmākīa tsoaxō ato fichiax koshikōi fotopakekafā āfe afaa fiamax ichotiro.

¹⁸ Askatari a āfe tare ano yonoaito anā oxō āfe rapati fitiroma.

¹⁹ Askatari a kēro fake naneafo fe a fake yome pishta chocho amaifo omiskōixikani māmāi yorafo omiskōifinākōiaifono.

²⁰ Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitīa askaya-

mai yōtaino matsi meexikakīma, ixō yoikāfe.

²¹ Askatari a omiskōiaifo nokoxii, taeyoi askakat-saxakīma. Nā Niospa yora onifakī taefanitīa tsōa askara ōiyomisma. Askatari anā tsoa chipo omiskōinakama.

²² Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafo ato noikī omiskōinōfoma xateni atomāi katonixakī.

²³ “Akka fētsa mato yoikī iskafaino: ‘Ōikapo, nakīa Cristo,’ mato fayanā, ‘Oa onokīa, ōikapo,’ mato faito nikayamakāfe.

²⁴ Akka nā chanīmisfo fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanás yōshixō mato parapaikakī. Nā Niospa ato katoafori nāfo ato parapaikani.

²⁵ Mē mato yoikai iyoamano shināsharakāfe.

²⁶ Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe.

²⁷ Akka nā kana peikī fafetanaito nō ōitiro keskara, nāskarifiāi ē oxii xafakīakōi ea ōixikani ē oaito.

²⁸ Akka nā naafo ano ishpifo ichanātiro. Nāskari fakī keyokōichi ea tāpixonikani ē oaito,” ato fani.

“Niospa Fake fotoaino afe keskara iximākai,” ixō Jesús ato yoini

(Mr. 13.24-37; Lc. 17.26-30, 34-36; 21.25-33)

²⁹ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax

pakei fetsexii, askatari nã nai mēranoafo naya naya iki fetsexii.

³⁰ Nãskatari õixikani nai mēranoax afara afeskaraito mã tãpinõ ē fotoaitia. Nãskatari keyokõi nã maitio anoax ratei fetseyanã oiaxikani. Nãskatari ea õixikani ē nai mēranoax nai kõinĩ fotoiyoaite. Ē sharaḡnakõia ēfe sharaõnoax ē fotoaito ea õixikani.

³¹ Nãskatari ēfe ājirifori ē yoixii āto maneti fãsikõi manekakĩ chãi chãisafanõfo a nikakanax efe yorafo a ē ato katoa ichanãnõfo. Chai inoax fisti rasi efe yorafo fexikani nãno fistiax ichanãxikakĩ.

³² “Akka shinãkapo ē mato yoinõ. Mã yõkkafiaino mã tãpitiro āfe pei sirikiaite. Nãskakẽ āfe peifo keyopakeaito õikĩ mã tãpitiro mãmãi chaima xiniaite.

³³ Nãskarifiakĩ afarafo afeskaraito õikĩ mã tãpitiro mẽ chaima oaino askai fetsexii.

³⁴ Ē mato pãraima ē mato yoikõi, na ē mato yoiai keskara nono mai anoxõ yorafãfe nayokaxoma õiyokani.

³⁵ Akka nai fe mai keyoi. Akka ēfe meka fisti keyonakama, nã ē mato yoiai keskakõi.

³⁶ “Afetĩara nai mēranoax ē oxii tsõakai tãpiama. Nã ājirifãfe nai mẽra ifiakaxõ tãpiafoma. Ērikai tãpiama. Ēfe Epa Nios fistichi tãpia.

³⁷ Akka nã Noé niyoano ini keskai, nãskarifixii ē anã oaino.

³⁸ Nãskata fakafãnē ato maiyoamano, Noé kanõanãfã mẽra ikini, yorafo pikãta, ayakãta fianãkãta ikaifono.

³⁹ Akka tsõa shinãyamaino mã faka faipafaxõ keyokõi ato āsakĩ mitokõini. Nãskarifixii ē oaino ea shinãtama afara chakafaifono.

40 Nāskatari feronāfake rafeta āto tare ano yonokani. Fetsa ea ari kai yamarisatatiro. Akka fetsa nētetiro nā omiskōipakenakafo mēra kaxiki.

41 Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki.

42 “Nāskakē itipinīsharakāfe oa mā moinākafanai keskakāfe. Akka mā tāpiamaki afetīara ē anā oxikai.

43 Nāskakē māri nā keskara tāpisharakāfe. Akka pexe ifāfe mā tāpixō afetīa yometso nokoimāakai ixō āfe pexe itipinīshara fatiro mā moixō, a mēra ikiax yometsoyamanō.

44 Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

Ina shara yafi ina chakaōnoa Jesús yoini

(Lc. 12.41-48)

45 Anā Jesús ato yoini iskafakī: “Ē mato yoinō afe keskaramākī a yonoxomis shara mā tāpinō. Xanīfāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō.

46 Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax.

47 Ē mato paraima. Nāskaxō āfe xanīfāfe mā xanīfo imaxō āfe afama mīshtifo kexexonō inātiro.

48 Akka nā yonoxomis chakapa shinātiro: ‘Ēfe xanīfo fena oimara,’ ixō.

49 Nāskaxō a yonoxomis fetsafori ato seteket-sani. Askatari nā pāemisfo fe rafexō ato feta piyanā askatari ato feta ayayanā.

⁵⁰ Iskaratīa ěfe xanīfo oimara ixō manasharaya-maino nā penata ěfe xanīfo nokorisatani.

⁵¹ Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiaiyanā omiskōipakenaka,” ixō Jesús ato yoini.

25

Meka fetsafaxō Jesús ato yoini diez xotofake xomayaōnoa

¹ Anā Jesús ato yoini iskafakī: “Ě mato yoinō meka fetsafaxō mā tāpinō ě anā oxii a Nios Ifo-faafōnoax afe keskara ixikanimākai. Akka nā diez xotofake xomayafāfe āto rāpari fifaikani fonifo. Feronāfāke rama āfiyaino afe fista mēra foxikakī manai fokani fonifo.

² Akka nā cinco xomayafāfe shināsharanifoma, itipinīnifoma. Akka nā cincofāferi shināsharanifo.

³ Akka nā shināsharaifāfema āto rāpari foiyakakī āto kirosī fonifoma anā fospifaxikakima.

⁴ Akka nā shināsharakōiaifāfe āto manishomoki kirosī fonifo. Askatari āto rāpari fonifo.

⁵ Akka feronāfake fena nokoyamaino, mā fak-ishaino, oxakatsa ikani. Nā kēro xomayafo oxanifo.

⁶ Nāskakē yame nakekafanaino nikanifo ke-naifāfe iskaifono: ‘¡Mā nā feronāfake oi kiki! ¡Moinīfofākāfe, ifixikaki!’ ato faifono.

⁷ Nāskakē nā kēro xomayafo moinīfofākata itipinī fakī fetsanifo āto rāparifo ōtaketsakakī.

⁸ Nāskata nā cinco xotofake shināsharaifāfema nā cinco xotofake shināsharaifo āto kirosī pishta

yōkanifo: ‘Noko kirosī pishta inākāfe. Nōko rāpari otasharaima kiki,’ ato fanifo.

⁹ “Ato askafaifono nā xotofake shināsharaifāfe ato kemanifo ato iskafakakī: ‘Maa. Nō mato inātiroma, nōri afaa otatiroma. Akka mā kaxō fitiro a kirosī miniaifo anoa fitakāfe mātonā faxikakī,’ ato fanifo.

¹⁰ Akka nā cinco xotofakefāfe kirosī fiifofāfono nā manaifo feronāfake nokoni. Nāskakē nā cinco xotofakefo shara shināmisfo nā feronāfake mā nokoaino afe pexe mēra ikinifo afeta fista ayanā pixikāki. Nāskakaxō pexe fepoti feponifo.

¹¹ Nāskano nā xotofakefo kirosī fitakani anā fenifo. Mā fēkaxō iskafakī yoitoshinifo: ‘Xanīfo, noko fepoti fēpexōfe nō ikikanō,’ faifāfe,

¹² ato kemani: ‘Maa. Ēkai mato ōimisma, ē mato ikimatiroma,’ ato fani.

¹³ “Nāskarifiakī māri isharakōixō ea manasharakōikāfe. Afetīara ē anā matoki oxikai tsōa tāpiamaki,” Jesús ato fani.

*Meka fetsafaxō koriōnoa Jesús ato yoini
(Lc. 19.11-27)*

¹⁴ Anā Jesús ato yoini iskafakī: “Ē anā mato yoinō Nios xanīfo iskaraki. Feronāfake mā mai fetsa ari kakī a yonoxomis kenaxō yoini āfe kori kexexonō.

¹⁵ Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari.

¹⁶ Akka āfe ina fetsa nā cinco mil fiato nā kōri afama mīshti finī. Nāskaxō anā cinco mil finī āfe afama mīshtiōxō.

17 Nāskafakīri nā dos mil kori fiato nāatori nāskarifani aflanā dos mil kori fikī.

18 Akka nā mil kori fiato nāato kori oneni āfe xanīfo mekexokī. Mai kini mēra maifani.

19 “Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī.

20 Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: ‘Xanīfo, mī ea cinco mil kori ināti. Akka ē finōmainīfofā anā cinco mil faxō ē fia. Ōipo. Nakīa mī kori,’ fani.

21 “Askafaito āfe xanīfāfe yoini: ‘Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīshtifo ichapakōi ē mia anā ināi mī ea kexexonō. Nāskakē nā ē inimai keskariai mīri inimafe,’ ixō yoini.

22 “Nāskatari a yonoxomis fetsari chipo oni, nā dos mil kori fini. Oxō yoini iskafakī: ‘Xanīfo, mī ea dos mil kori ināni. Akka ē finōmainīfofā anā dos mil faxō ē fia. Nakīa mī kori,’ fani.

23 Nāatori askafaito āfe xanīfāfe yoini: ‘Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīshtifo ē mia anā kexemani. Nāskax mīri nā ē inimai keskariai mīri inimafe,’ fani.

24 “Nāskata a yonoxomis fetsari oni nā mil kori fini. Mā oxō āfe xanīfo yoini: ‘Xanīfo, ē tāpia mī feronāfake mitsisipakōi. A mī fanama anoa mī fimis. Askatari a mī saakama anoafori mī fimis.

25 Nāskakī ē mesekī ē mia kori maifaxōa. Nakīa mī kori,’ faito āfe xanīfāfe kemani:

26 ‘Mī ea yonoxomis chakakōi. Askatari mī xanikōi. Akka, ¿mī shināmē a ē fanama anoafō fita, a ē saakama anoafori ē fimis?’

27 Nāskakī nānori mī shinākī mī kori banco ano ea fāxōama anā oxō ē kori ichapa fikerana mā ēfe kori ichapano ē anā fikerana,' fani.

28 Nāskaxō nā anoafoto yoini: 'Nā feronāfake nā mil kori fiakāfe fetsa ināxikakī nā kori diez milya,' ato fani.

29 Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fiatiro anā afaa ichapaya iyamanō.

30 Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō," ixō Jesús ato yoini.

Mā mai keyoaino nā omiskōipakenakafoōnoa Jesús ato yoini

31 Anā Jesús ato yoini iskafakī: "Ē mato anā yoinō, ea nikakapo. Ē nai mēranoax oni. Ē Niosfiak feronāfakekōi ē oni. Ē anā nai mēranoax fo toyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaoti ano tsaoxikani. Keyokōi sharafinakōia ōixikani.

32 Nāskatari yorafo keyokōi nā maitio anoafoto ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafoya āfe cabrafo paxkanā fatiro keskafakī.

33 Nā āfe inafoto kexemisto āfe inafoto paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii,

akka a ea Ifofaafomafori ěfe pōya mishkiori ě ato nĩchixii.

³⁴ Nāskaxō mẽ xanĩfoxō ě ato yoixii nā ěfe pōya kayakai aōrinoafō ekeki fekāfe, ěfe Epa Niospa mato inimamamiski. Nāskakē ěfe Epa Xanĩfo ano mā afara fikai nā mai onifaitĩa mato yoiyoni keskara.

³⁵ Akka ě fonāikaito mā ea pimamis; ě nōamāikaitori mā ea ayamamis; ě pexemaisax kafāsaitori, ‘Nono ěfe pexe ano ofe nono oxaxiki,’ mā ea famis.

³⁶ Askatari ě rapatimaiskē mā ea ināmis; ě isinĩ ikaitori mā ea kexesharamis; ě karaxa mēra ikikēri kaxō mā ea ōimis.

³⁷ “Ě ato askafaito ea yōkaxikani iskafakākĩ: ‘Ifo, ĵafetĩa nō mia ōimismē mĩ fonāikaito, akka mĩ fonāikaito nō mia pimamis? Askatari, ĵafetĩa nō mia ōimismē mĩ nōamāikaito, akka mĩ nōimāikaito nō mia ayamamis?’

³⁸ Askatari, ĵafetĩa nō mia ōimismē pexemaisax mĩ kafasaito, akka nō mia pexe ināmis ano mĩ ox-anō, askatari mĩ rapatimaiskē akka nō mia rapati ināmis?

³⁹ Askatari, ĵafetĩa mĩ isinĩ ikaito nō mia ōimismē? Askatari, ĵafetĩa karaxa mēranoa nō mia ōikamismē?’ ixō ea yōkaxikani.

⁴⁰ “Ea askafaifono ě ato kemaxii: ‘Ě mato paraima, nā fetsafo omiskōiaino mā tanaima isharaxō eōxō mā axomis.’

⁴¹ “Askatari na ěfe pōya mishkiorino a ě ato yoikĩ iskafaxii: ‘Na ěfe pōya mishkiorino a emakinoax fotakāfe mā chakakōikĩ. Chii xoisai mēra fotakāfe anoax omiskōixikaki. Nā ě chii xoisai itipinĩ fani

měranoax Satanás chaka fe āfe yōshi chakafori anoax afe omiskōinakafo.

⁴² Akka ē fonāikaito mā ea pimamisma. Askatari ē nōamāikaito mā ea ayamamisma.

⁴³ Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmisma. Askatari karaxa mēraoa mā ea ōikamisma. Askatari ē isinī ikaito mā ea ōikamisma, ixō ē ato yoixii.

⁴⁴ “Ato askafaito yorafetsafāfe yōkaxikani iskafakakī: ‘Ifo, ¿afetīa nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

⁴⁵ “Ea aškafaifono ē Xanīfokōixō ē ato kemaxii iskafakī: ‘Ē mato paraima. Nā omiskōiaifo mā ato tanamisma nafokai afaafoma ixō askatari eari mā tanamisma,’ ixō ē ato yoixii.

⁴⁶ Nāskakē nāfo nā omiskōipakenakafo mēra foxikani. Akka nā ea Ifofafo efe nīpanakafo,” ixō Jesús ato yoini.

26

*“¿Afeskaxō nō Jesús retetiromē?” ixō shinānifo
(Mr. 14.1-2; Lc. 22.1-2; Jn. 11.45-53)*

¹ Nāskata mā ato yoikī keyota Jesús aōxō tāpimisfo yoini:

² “Mā mā tāpiakī oxa rafeta Pascua fista ikiki. Nāskatari Pascua fistatīa ea achikani fetsafāfe ea mastanōfo,” ixō Jesús ato yoini.

³ Nāskakē a Niospa meka yoimis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini.

⁴ Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo.

⁵ Nāskakanax yoinānifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

Kēromā Jesús shinākī āfe mapoki pirofomā nachini

(Mr. 14.3-9; Jn. 12.1-8)

⁶ Nāskata Jesús Betania ano ini Simón pexe ano. Nā Simón “Rashkishiai” fapaonifo.

⁷ Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoxō piaino, nā kēromā āfe mapoki pirofomā nachini.

⁸ Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē?”

⁹ Mī ato minixō mī kori ichapa fixō a afaamaisfo mī ato inākerana,” fanifo.

¹⁰ Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani.

¹¹ “Akka nā afaamaisfori mato fe ipanakafo. Akka eakai mēxotaima mā ea anā ōima.

¹² Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo.

¹³ Ĕ mato pāraima, fanĩxōra na meka shara eōnoa yoikakĩ nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakĩ,” ixō Jesús ato yoini.

Judaspa aōxō tāpifikatsaxakĩ Jesús ato achimani
(Mr. 14.10-11; Lc. 22.3-6)

¹⁴ Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kĩfixomis xanĩfofo ano.

¹⁵ Mā kaxō ato yoini: “¿Afe tii mā ea kori inātiromē Ĕ mato Jesús achimanō?” ato faito yoinifo: “Treinta nō mia inātiro,” fanifo.

¹⁶ Nāskaxō Judaspa shinākĩ taefani: “¿Afeskaxomāi Ĕ Jesús ato achimanō?” ixō shināni.

Mā chaima reteaifono Jesús aōxō tāpimisfo feta
yātapake pini
(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Akka nā Pascua fistatīa pāa faraxatimais pi-paonifo. Nāskata mā fista pakeano aōxō tāpimisfo akiki fokaxō yōkanifo: “¿Fanĩ mĩ fichipaimē ano kaxō nō itipinĩ fanō, anoxō Pascuatīa yātapake pixiki?” fanifo.

¹⁸ Askafaifono Jesús ato kemani iskafakĩ: “Oa pexe rasi ano fotakāfe. Nānoa feronāfake fetsa fichixō yoitakāfe iskafakĩ: ‘Nōko Ifāfe noko yoia nō mia yoiyonō iskafaki: Mē chaima naikai. Nōko fistatīa mĩ pexe anoxō eōxō tāpimisfo feta Ĕ pii kaikai,’ ixō yoitakāfe,” ato faano,

¹⁹ nāskafakĩ yoinifo nā āto Ifāfe ato yoia keskafakĩ. Nānoxō itipinĩ fanifo Pascua fistatīa pixikakĩ.

20 Jesús mā fakishaino pexe ano nokoax mīsa ano tsaoni a aōxō tāpimiskōifo fe.

21 Nānoxō piyanā ato yoini: “Ē mato pāraima, fatora mā fētsa ea mā ato achimafainaka,” ato fani.

22 Ato askafaito nikai shināmitsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

23 Askafaifono Jesús ato kemani: “Nā efeta sapakinoa pāa momoxō piaito nāato ea ato achimaxii.

24 Ē Niospa Fakekōifiax ě yorakōi. Nā eōnoa yoikī kirika kenenifo keskakōi fakī ě asharakōitiro. Akka nā feronāfāke ea ato achimafiax akairi omiskōikōixii. Akka nā feronāfake shara ikerana fakeyamanixakī,” ixō Jesús ato yoini.

25 Nāskakē Judaspa nā ato achimanaito yōkani: “Maestro, ¿Ēraka?” faito, “Ēje, nā mī yoiai keskarakīa,” Jesús fani.

26 Nāskakaxō piaifono Jesús pāa tsomainīfofā Apa Nios kīfini. Mā Apa kīfita pāa kaxkeketsaxō aōxō tāpimisfo ināni ato iskafayanā: “Na ěfe nami keskara pikāfe,” ato fani.

27 Ato askafata kechokinoa fimi ene tsomainīfofāxō Apa Nios kīfini. Nāskaxō aōxō tāpimisfo ato ayamani ato iskafayanā: “Na fimi ene ayakāfe,” ato fani.

28 Nāskaxō ato yoini: “Nafi ěfe imi keskaraki. Akka nā ě mato yoiyoni keskai mē nai. Nāskakaxō ěfe imi ōikaxō tāpitirofo Epa Niospa yoiyoni keskafakī yora ichapafo ě ato chaka soaxonō.

29 Akka anā ě mato yoinō ě anā mato feta fena na fimi ene ayaima. Mā mā nai mēra kano ě mato feta anā fimi ene yaxii ěfe Epa xanīfo anoxō,” ixō Jesús ato yoini.

*“Ē Jesús ōimisma,” Pedro ixiaino Jesús ato yoini
(Mr. 14.26-31; Lc. 22.31-34; Jn. 13.36-38)*

³⁰ Nāskakata mā fanāiki xatekata machi Olivos ano fonifo.

³¹ Nānoxō Jesús ato yoini: “A na fakishi keyokōi mā ea shināmaki fetsei. Nānori kirika kenenifo iskafakakī: ‘Āfe ifo reteafono, āfe ovejafo ichoi fetsetirofo,’ ixō kirika kenenifo,” ato fani.

³² “Akka ea retefiafono ē otoax ē Galilea ano rekē kai mā kayoamano,” ato faino,

³³ Pedro kemani: “Keyokōi shināmakifiaifono, akka ēkai mia shināmakima,” fani.

³⁴ Askafaito nikakī Jesús yoini: “Ē mia pāraima na fakishi takara fene keofamano, ‘Ē Jesús ōimismara,’ mī ea fai tres fakī,” fani.

³⁵ Askafaito nikakī anā Pedro kemani: “Maa. Mia retefiaifono ē mefe nai. Ē ōimismara ē mia faima,” fani. Pedro askafaito nikakakī keyokōichi aōxō tāpimisfāfe askafakī fetsanifo.

*Getsemaní anoxō Jesús Apa Nios kīfini
(Mr. 14.32-42; Lc. 22.39-46)*

³⁶ Nāskata Jesús kani aōxō tāpimisfo fe Getsemaní ano. Nānoxō ato yoini: “Nono tsaokāfe onī chaimashta kaxō ē Epa Nios kīfiyotanō,” ato fani.

³⁷ Akka Pedro iyoni, Zebedeo fake rafe yafi. Nāskaxō āfe yora meeni shināmitsakōiyanā fekaxteaito.

³⁸ Anoxō ato yoini: “Ēfe yōshi shināmitsai napaiyaito ē meikai. Nono nētekāfe oxakakima māri efeta ōisharaxikakī,” ato fani.

³⁹ Ato askafata Jesús ares fisti ori chaimashta kani. Nānoax maikiri fepepakekafata āfe fishpi mai tiisani. Nāskaxō Apa kīfini iskafakī: “Epa, na

ĕ omiskōiai ekeki nokoyamafe. Akka nã ĕ apaiyai keskafakima. Nã mĩ ea amapaiyai keskafafe,” fani.

⁴⁰ Nãskata anã anoris oni aōxō tãpimisfo ano. Oxō ato ōia oxafo inifo. Nãskaxō Pedro yoini: “ĵMã efeta pishta oxa tenetiromamē?” ato fani.

⁴¹ Nãskafata anã yoini: “Moikaxō Epa Nios kĩfikãfe Satanás chakata mato chakafamapaiyai keskara axikakima. Chanĩma, nã Epa Niospa mato amapaiyai keskara mãto shinã mēraxō mã apaifikĩ mã atiroma. Akka mãto yora pachikōikĩ,” ato fani.

⁴² Ato askafata anã kani Apa Nios kĩfikai iskafakĩ: “Epa, ea mĩa omiskōimayamakĩ ea mĩa omiskōimatiroma. Akka nã mĩ ea amapaiyai keskafafe,” fani.

⁴³ Nãskata anã oxō ato fichitoshini aōxō tãpimisfo oxafono, oxa paemei fetsoafono.

⁴⁴ Nãnoa ato ōifaini kaxō anã Apa Nios kĩfini, afia yoitana keskafakĩ.

⁴⁵ Nãskata Jesús anã oni aōxō tãpimisfo ano. Mã oxō ato yoini: “ĵAimã oxamē tenekōiyanã? Akka iskaratĩa a ea ato achimaniyoai mã chaima oi kiki. Yora chakafãfe ea achifenōfo ato efei kiki.

⁴⁶ Fininĩfofãkãfe nō kanō. Mã chaima oi kiki a ea ato achimaniyoai,” Jesús ato fani.

Jesús achinifo

(Mr. 14.43-50; Lc. 22.47-53; Jn. 18.2-11)

⁴⁷ Jesús ato yoiaino Judas nokoni, nã Judaspa Jesúsxō tãpifikatsaxakĩ, yorafã rasifo fe oni. Nã yorafo kenofoya ifi xatefoya fenifo, a ato Nios kĩfixomisfãfe ãto xanĩfofo feta judeofãfe ãto xanĩfofofãfe ato nĩchiafono.

⁴⁸ Judaspa nã ato efeaito ato yoiyoni iskafakĩ: “A ã kokoki tsoo akaito õikĩ achirisafaxikãki,” ato fani.

⁴⁹ Mã Jesús ano nokoxõ Judaspa iskafakĩ yoini: “Maestro, ¿mĩmẽ?” fatishoni. Nãskaxõ kokoto-shini.

⁵⁰ Askafaito õikĩ Jesús kemani: “Efe yora, nã mĩ apaiyai keska farisafafe,” fani.

Askafaito õikakĩ nã Judas fe foafãfe Jesús achinifo.

⁵¹ Akka Jesús achiaifãfe õikĩ a aõxõ tãpimis fẽtsa ãfe keno chainipa tsekainĩfofã a ato Nios kĩfixomisfãfe ãto xanĩfãfe ina paxteni.

⁵² Askaito õikĩ Jesús yoini: “Mĩ keno fafe. Akka nõ kenopa retenãino kenopari noko retetirofo.

⁵³ ¿Mĩ tãpiamamẽ Epa Nios ã yoiãito iskaratĩa ãfe ãjirifo ichapakõi ea nĩchixotiro ea kexei fenõfo?” fani.

⁵⁴ “Ë iskaratĩa ãjiri kenano ea kexeaifono ã naima. Akka nã Niospa meka yoikĩ kirika kenekĩ yoinifo keskai ã naikai,” Jesús ato fani.

⁵⁵ Askaifono õikĩ Jesús yorafo yõkani: “¿Afeskai kenofoya ifixatefoya mã oamẽ ea achiyoi oa ã yometso keskarakẽ? Pena tii ã mato fe itiani Nios kĩfiti pexefã mẽraxõ ã mato tãpimani, akka mãkai ea achipaimisma.

⁵⁶ Akka nã eõnoa yoikĩ kenenifo keskafakĩ mã ea achi,” ixõ Jesús ato yoini.

Ato askafaino aõxõ tãpimisfo Jesús õifaikani. Ichoi fetsenifo a makinoax.

Xanĩfo finakõiafo ano Jesús iyonifo

(Mr. 14.53-65; Lc. 22.54-55, 63-71; Jn. 18.12-14, 19-24)

57 Mā Jesús achikaxō a ato Nios kīfixomisfāfe āto xanīfo Caifás āfe pexe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nā tsaofo ano Jesús iyonifo.

58 Pedro chai ixō ōini faki Jesús iyoi fokanimākai. Nāskaxō ato chīfafoni. Nāskata nā ato Nios kīfixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

59 Nā Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiromē Jesús afaa chakakōi faamakī nō retexiki?” ixō shinānifo.

60 Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa chaka nikanifoma. Nāskakē feronāfake raferi mekafai fekani fenifo.

61 Nā rafeta yoinifo: “Mā nō nikaita Jesús iskaito: ‘Ē na Nios kīfiti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

62 Askafaifono a ato Nios kīfixomis xanīfo finīnkafāta Jesús yōkani: “¿Mī kemamitsaimamē afamē na mīōnoa meka chaka yoiaifo?” ixō yoini.

63 Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nipanakato mia ōi kiki mī yoikai chanīmakōi, noko yoife mīmākī Cristo Niospa Fake,” fani.

64 Askafaito nikakī Jesús kemani: “Nā mī ea yoiai keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

⁶⁵ Ato askafaito nikakakĩ a Nios ato kĩfixomisfãfe ãto xanĩfãfe ãfe rapati faxteni yorafãfe tãpinõfo Jesús yoiaito nikakaspakĩ. Askafata yoini: “Na feronãfãke ãfe meka chakakõi Nios chakafakĩ mekafai. Mã nõakõi nõ nikakĩ noko anã tsõa yoitromaki nõ tãpinõ,” ato fani.

⁶⁶ “¿Afe keskara mã shinãimẽ?” ato faito keyokõichi kemanifo: “¡Nanõki!” fanifo.

⁶⁷ Mã fenexkaxõ ãfe femãnãki kemo mechoket-sayanã koshaketsanifo. Atirito fepasketsanifo.

⁶⁸ Iskafakĩ yoiyanã: “Mĩkai Cristomãkĩ, noko yoife tsõa mia koshaketsamakĩ,” fanifo.

“Ë Jesús õimisma,” Pedro ini

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro nãno ato fe pexefã emãiti tsaono, nãno kãro xomaya a xanĩfo yonoxomis akiki kaxõ yoini: “Mĩri Jesús fe kafãsamis Galilea anoax,” faito,

⁷⁰ Pedro kemani, yorafãfe õiaifono iskafakĩ: “Ëkai Jesús õimisma. Ëkai afaa tãpiama tsoaraõnoa mã yoi,” fani.

⁷¹ Nãskafata pexe fepoti ano kani. Nãnoa kãro xomaya fẽtsari fichixõ fetsafo yoini: “A nari Jesús fe Nazarete anoax kafãsamis,” fani.

⁷² Askafaino anã Pedro kemani: “Maa, nã mã yoiiai keskara Niospa tãpia ã na feronãfãke õimisma,” fani.

⁷³ Nãskafaino nã anoafãfe Pedro ano fõkaxõ yoinifo: “Chanĩma, mĩri Jesús fe rafemis mã nõ mia nikai mã mekaito, nã keskara,” fanifo.

⁷⁴ Nãskafaifono Pedro ato yoikĩ taefani iskafakĩ: “Ë mato paraima, Niospa ea õi ã chanĩkẽ Niospa ea omiskõimatiro. Niospa tãpia ã mato yoikõi nã feronãfãke ã õimisma,” ixõ ato yoini.

Pedro askaino takara keoinākafani.

⁷⁵ Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara,’ mī ixii,” ixō Jesús yoita keskara Pedro shinātani. Nāskata Caifás pexefā mēranoax kāikainax oiai finakōini.

27

Pilato ano Jesús iyonifo

(Mr. 15.1; Lc. 23.1-2; Jn. 18.28-32)

¹ Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetiromē?” ikanax yoinānifo.

² Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma anoa ini.

Judas nani

³ Judaspa Jesús ato achimaxō reteaifāfe ōikī shināmitsayanā ato treinta kori exe ināni, a ato Nios kīfixomis xanīfofoya judeo anifofo.

⁴ Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retenōfo,” ato faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofofāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromaki,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo.

⁸ Nāskakē nā mai anakī fetsafanifo. “Imi Mai,” fanifo. Akka iskaratīari, “Imi Mai,” famisfo.

⁹ Nāskakē nā Niospa meka yoimisto Jeremías a inōpokoai yoikī kirika keneni keskakōini. Iskafakī yoikī keneni:

Kori exe treinta fixikani nā israelifāfe yoinifo keskakakī.

¹⁰ Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskakakī, ixō Jeremías keneni.

Pilato xanīfāfe Jesús yōkani

(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyoa-fono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

¹² Akka nā ato Nios kīfixomis xanīfofo feta judeo anifofofāfe, “Mī chakakōi famis,” pārakī fanifo. Askafaifono Jesús ato kemanima.

¹³ Nāskakē Pilato yōkani: “¿Mī nikaimamē mia chakafakī mekaifaifāfe?” fani.

¹⁴ Askafaito nikakī, Jesús kai pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

Pilato ato yoini Jesús retenōfo

(Mr. 15.6-20; Lc. 23.13-25; Jn. 18.38-19.16)

¹⁵ Akka Pascua fistatīa xanīfo Pilato yora fisti karaxa mēranoa kāimapaoni. Nā yorafāfe kāimapaiyāifo ato kāimaxopaoni.

16 Akka nã karaxa mēra ika feronãfake chakakōi ini, ãfe ane Barrabás ini.

17 Nãskakē yorafo ichanãfono Pilato ato yōkani: “¿Fato mã fichipaimē ē mato kãimaxonō? ¿Barrabás iyamai Jesús nã Cristo nã Niospa nĩchini ē kãimatiromē?” ato fani.

18 Akka mã Pilato tãpia ini judeo xanĩfãfe shinãchakaito nō anã xanĩfo itiomara ixō, a ano Jesús iyoaifono.

19 Nã xanĩfãfe tsaoti kamaki tsoxō Pilato shinãino, ãfe ãfinĩ ãfe ina nĩchini Pilato yoitanō: “Mĩ ãfinĩ ea yoia ē mia yoinō iskafakĩ: ‘Na feronãfãke afaa chakafamismakĩ afeska fayamafe. Ēfe namapa aōxō chakakōi ē namakĩ,’ mia faa,” ãfe inapa fani.

20 Akka nã ato Nios kĩfixomisfãfe ãto xanĩfofo feta judeo anifofofãfe ãfe yorafo ato yoinifo iskafakakĩ: “Jesús kãiyamanō. Akka Barrabás kãinō. Jesús ato retemanō Pilato yoikãfe,” ato fanifo.

21 Askafãfe xanĩfo Pilato anã ato yōkani: “Fato mã fichipaimē ē mato kãimaxonō ea yoikãfe,” ato feito, “Barrabás kãimafe,” fanifo.

22 Anã Pilato ato yōkani: “Akka, ¿ē Jesús nã Cristo famisfo ē afeska faimē?” ato feito, keyokōichi kemanifo: “¡Ifi cruz ikaki mastamafe!” fanifo.

23 Askafãfãfe nikakĩ Pilato ato yoini: “Akka, ¿naato afaa chakafamē?” ato fani.

Ato askafaito nikakakĩ fãsikōi yoinifo: “¡Mastafe!” fanifo.

24 Akka Pilato ōia tsōa nikakanima inifo. Yorafã rasi fãsikōi mekanifo. Nãskakē ãfe ina faka fixotanō nĩchini. Askata mechokomeni yorafãfe

ferotaifi òinòfo ato iskafakĩ yoiyanã: “Èkai afaa-maki na feronãfake ã retepanã. Mã mã apaikai akãfe. Eõnoax naima kiki. Matoõnoax nai kiki,” ato fani.

²⁵ Ato askafaito yorafãfe kemanifo: “Akka nõ akikai retekĩ nõ tenetiroma nokoõnoax nai. Nõko fakefoõnoaxri nai,” fanifo.

²⁶ Nãskakẽ Pilato Barrabás ato kãimaxoni. Nãskata mã Jesús ato koshamata ifi cruz ikaki mastatanõfo ato yoini.

²⁷ Askata sorarofãfe Jesús iyonifo xanĩfãfe pex-efã ano. Nãnoax sorarofõ ichanãkanax Jesús kemataima niakenifo.

²⁸ Nãskakaxõ ãfe rapati pẽkakaxõ, rapati õshi nana safemanifo, xanĩfãfe tari keskara.

²⁹ Nãskatari moxa chainipafo maiti fãkaxõ maimanifo. ãfe mẽke kaiyakai aõriri ifi chati tsomamanifo. Nãskakaxõ ãfe ferotaifi ratokonõ mai chachipakefõfã ãto xanĩfo feyakanakõi keskarakaxõ kaxemetsamakõi fanifo, iskafakĩ: “Mĩ sharakõi. Mĩfi judeofãfe ãto xanĩfo,” fanifo kaxefakakĩ.

³⁰ Nãskakata akiki kemo mechokata, afia ifi xate tsoma fĩakaxõ aõ mapoki koshanifo.

³¹ Mã kaxemetsama fakaxõ, tari õshi fĩakata, Jesús ãfe rapatikõi safemakaxõ iyonifo mã mastai fokakĩ.

Jesús ifi cruz ikaki mastanifo

(Mr. 15.21-32; Lc. 23.26-43; Jn. 19.17-27)

³² Anoax fõkakĩ, feronãfake fisti fichinifo ãfe ane Simón. Nã Simón Cirene anoa ini. Nãskaxõ yoinifo: “Na Jesús ifi cruz ika foxõi afe,” fanifo.

³³ Nãskakata nokonifo machi ãfe ane Gólgota ano. (Nã ãfe ane fetsa Mapo Xao fanifo.)

34 Nānoxō fimi ene moka osia Jesús ayama-painifo. Akka Jesús mā meexō ayakaspani.

35 Nāskata mā Jesús mastakaxō āfe rapati fīanifo. Sorarofāfe makex tokoronō tsakaketsakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo.

36 Mā Jesús mastakanax nāno tsaonifo anoxō kexexikakī.

37 Nāskaxō āfe mapo mānāori tafaraki kenexō mastanifo. Mā retetakaxō kenekī iskafanifo: “Jesúsfi judeofāfe xanīfoki,” ikaxō kenenifo.

38 Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo.

39 Nā ano finōfāifāfe ĭchayanā āto mapo rafe rafeanifo.

40 Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mā ifimefe. Mī Niospa Fakemākī na ifi cruz ikakinoax fotopakekafāfe,” fanifo.

41 Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo a judeofāfe āto xanīfofori āa ranā yoinānākani iskanifo:

42 “Naato fetsafo ififitiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai.

43 A naato Nios shināmis. Mēxotaima noko yoimis: ‘Ēpa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

44 Nāskaxō nā yometso rafeya mastafono fětsa chakafakī mekafakī ĭchani.

Jesús nani

(Mr. 15.33-41; Lc. 23.44-49; Jn. 19.28-30)

45 Nāskata xini keya nā mai tio fakishifākōi itani. Nāskax mā xini kaino anā penani.

46 Nāskata mā penano Jesús fāsikōi āfe mekapa kenai iskani: “Elí, Elí, ¿lema sabactani?” Nōko mekapa iskafakī yoini: “Ĕfe Nios, Ĕfe Nios, ¿afeskakī mīa ea potamē?” fani.

47 Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

48 Nāskaito nikafaini fetsa ichoni xapo keskara fikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini.

49 Askafaito ranārīto yoinifo: “Enefe. Elías nai mēranoax fotoxō ifimākai nō ōinō,” fanifo.

50 Anā Jesús fāsikōi ea ini. Nāskax nani.

51 Mā Jesús natanaino, sama nami Nios kīfiti pexefā mēranoax naki rafekōi faxtepakekafāni fomākīanoax. Nāskatari mai naya naya ini. Tokirinīfāfori kaxkei fetseni.

52 Nāskakē a maiāfo anoax kini fepekemetani. Akka a Nios Ifofaāfo nakatsaxakakī otoiñifofānifo.

53 Nāskakata maiāfo anoax fonifo. Mā Jesús otoi-tano, Jerusalén ano fonifo. Nānoxō yora ichapafāfe ōinifo.

54 Nāskata soraro xanīfāfe a afeta Jesús kexeāfo feta ōinifo mai naya naya ikaito afarāfori afeskara ikaito. Nāskakē ratekōiyanā yoinānifo iskayanā: “Chanīma, na feronāfake Niospa Fake ika,” fanifo.

⁵⁵ Kērofāferi chaimashta nikaxō òinifo. Kēro ichapafāferi Jesús fe fopaonifo Galilea anoax ato afara axosharamisno.

⁵⁶ Nā tiixō Jesús òinifo. María Magdalena ikaino María fetsari ikaino, nā María Jacobo feta José āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús òinifo chaimashta nikaxō.

Jesús makex kini mēra maifanifo

(Mr. 15.42-47; Lc. 23.50-56; Jn. 19.38-42)

⁵⁷ Akka mā fakishaino feronāfake kori ichapaya fisti kani āfe ane José. Nā José Arimatea mai anoa ini. Nāatori Jesús Ifofamis ini.

⁵⁸ Nā José xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo.

⁵⁹ Nāskata José mā Jesús yora fixō, sama oxosharakōipa rakoni.

⁶⁰ Nāskaxō makex kini a tsoa maiyomisma mēra ratani. Nā makex kini fakī José ayoni. Nāskata nā Jesús maifaa ano makex kini tokirinīfanē fepofaini kani.

⁶¹ Akka María Magdalena fe María fetsa nāno nētekanax a Jesús maia ano tsaokaxō òinifo.

Sorarofāfe Jesús maia ano kexenifo

⁶² Mā askaitano, judeofo āfe pena tenetitīa a ato Nios kīfixomisfāfe āto xanīfofo fe fariseofo fonifo Pilato òifokani.

⁶³ Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ě otoxii,’ ixō yoimis.

⁶⁴ Nāskakē mī sorarofō nīchife a maia ano kexey-onōfo tres nia aōxō tāpimisfo fakishi fēkaxō āfe yora fiyamanōfo. Fīakaxō yorafo yoitirofo iskafakī: ‘Mā Jesús otoaki,’ ato fatirofoki. Akka ē otoxira ikax a chanīmiskī. Nāskakē mā otoara ikaxō ato parakī finakōitirofoki,” fanifo.

⁶⁵ Askafaifono Pilato ato yoini: “Nakīa sorarofō. Ato iyotakāfe. Fokaxō mafa kini kexesharatakāfe nā mā apaiyai keskafakī,” ato fani.

⁶⁶ Nāskakanax fonifo. Mā fōkaxō itipinī fanifo nā mafa kini. Nāskata nā aō fepoa tokirinīfā si-chopa marakka fanifo. Nāskakaxō ano sorarofō nīchitakani fenifo anoxō kexesharanōfo.

28

Jesús otoni

(*Mr. 16.1-8; Lc. 24.1-12; Jn. 20.1-10*)

¹ Judeofāfe āto pena teneti safaro mā finōano, nāskata nomīkonō fakishparikōi fonifo a Jesús maia ano. María Magdalenanō María fetsanō fonifo a Jesús maia ano ōifokani.

² Nāskata samamakōi fāsikōi mai naya naya ini, nōko Ifo Niospa āfe ājiri nai mēraxō fotomanaino. Mā fotota a Jesús maia ano kaxō, a aō fēpoita tokirinīfā fepeta a kamaki tsaoni.

³ Nā nōko Ifo Niospa āfe ājiri fafekōini, nā kana peeikai keskara. Āfe rapati oxofinakōi ini.

⁴ Askaito ōikani sorarofō choayanā ratekōinifo. Nāskakanax oa naa keskara nāmā pake pakefōfānifo.

⁵ Akka nā nōko Ifo Niospa āfe ājirinī nā kēro rafe yoini: “Rateyamakāfe. Mē tāpiakī mā Jesús fenaiyoaki a mastaitafo,” ato fani.

⁶ “Nonomaki, mā otoaki a mato yoimis keskai. Ōifekapo, a rātaifafo ano.

⁷ Koshikōi fōkaxō aōxō tāpimisfo yoirisafatakāfe iskafakī: ‘Mā otoaki. Galilea ano kai kiki mā kayoamano. Nānoa mā ōikaikai ato yoitakāfe. Mē mato yoikai shināmakiyamakāfe,’ ” ato fani.

⁸ Ato askafaito nikafaikani nā kēro rafe koshikōi fonifo nā Jesús maita anoax. Ratefiyanā āto shinā mēra inimakōinifo aōxō tāpimisfo chanifaifokani ichonifo.

⁹ Ichoaifono Jesús atoki nokorisatani nā kēro rafeki. Nāskaxō, “Mē oi,” ato fani. Ato askafaino nā kēro rafe Jesúsiki fōkaxō akiki inimakakī ratokonō mai chachipakefofā āfe fitax ano achinifo. “Mī sharakōi,” fanifo.

¹⁰ Nāskaxō ato yoini: “Rateyamakāfe. Fokaxō ēfe extofo ē yoimis keska fakī ea ato yoixotakāfe Galilea ano fotanōfo. Nānoa ea fichifokani kiki,” ixō ato yoini.

Sorarfāfe ato yoinifo

¹¹ Mā nā kēro rafe foaifono, nā Jesús maia ano kexekanax soraro ranāri fonifo pexe rasi ano. Mā fōkaxō a ato Nios kīfixomis āto xanīfofo yoinifo nā ōiafo keskara.

¹² Nā xanīfo ano fonifo. Nā anifofo fe meikai fokani, ato fe yoināsharaxikaki. Nāskakaxō sorarofokori ichapakōi inānifo.

¹³ Ato iskafanifo: “Ato iskafakakī yoitakāfe: ‘Nō fakishchāi oxano Jesús āfe inafō fēkaxō āfe yora yometsoanafo,’ ato fatakāfe.

¹⁴ Mā ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

15 Nāskakaxō sorarofāfe mā kori fīkaxō, mā fōkaxō nā ato yoiāfo keskafakī ato yoinifo. Nāskakē nā maitio anoxō nikaketsanifo. Iskaratīari a keskara chanīmara famisfo judeofāfe.

Jesús aōxō tāpimisfo yoini aōxō keyokōi yoihofāsafatanōfo

(Mr. 16.14-18; Lc. 24.36-49; Jn. 20.19-23)

16 Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari.

17 Nāskakata Jesús ōikakī, “Aicho, mī nōko Ifo Jesús nō mia noikōi,” fanifo. Akka Jesús otoano ranārīto chanīmara fanifoma.

18 Nāskaifono Jesús atoki kaxō ato yoini: “Ēfe Epa Niospa ea yoia nai mēranoafoya nono mai anoāfori ē ato yoinō.

19 Akka nā maitio ano yorafoki fotakāfe ato yoixikakī ea Ifofasharanōfo. Nāskaxō ēfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Šharaōxori ato askafatakāfe.

20 Nāskaxō ato yoisharakāfe nikasharakōinōfo nā ē mato yoia keskara. Akka ē mato fe mēxotaima ipanakaki,” Jesús ato fani.

Niospa meka fena Jesucristo^{noa}
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

6c7b7ce2-9d87-5405-91e6-71ce1387adcc